

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿՐԹՈՒԹՅԱՆ ԵՎ ԳԻՏՈՒԹՅԱՆ ՆԱԽԱՐԱՐՈՒԹՅՈՒՆ
ՀԱՅԱՍՏԱՆԻ ՊԵՏԱԿԱՆ ԶԱՐՏԱՐԱԳԻՏԱԿԱՆ ՀԱՄԱԼՍԱՐԱՆ
(ՊՈԼԻՏԵԽՆԻԿ)

*Կիրառական մաթեմատիկայի և
ֆիզիկայի ֆակուլտետ
Ընդհանուր մաթեմատիկական
կրթության ամբիոն*

ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅՈՒՆ

Ուսումնական ձեռնարկ

ԵՐԵՎԱՆ
ԶԱՐՏԱՐԱԳԵՏ
2013

ՀՏԴ 519.2
ԳՄԴ

*Հրատարակվում է Հայաստանի պետական
ճարտարագիտական համալսարանի
27.12.2012թ. գիտական խորհրդի նիստում
հաստատված 2013թ. հրատարակչական
սյլանի համաձայն*

Գրախոսներ՝ ֆ.մ.գ.թ.դոց. Ֆ.Ն. Գալստյան
ֆ.մ.գ.թ.դոց. Ի.Վ. Հովհաննիսյան

Խմբագիր՝ Բ.Գ.Թ. դոց. Հ.Յ. Պետրոսյան

Առաքելյան Ա.Հ.

ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅՈՒՆ: Ուսումնական ձեռնարկ/
Ա.Հ. Առաքելյան, Գ.Ս. Գրիգորյան, Ս.Կ. Արզումանյան; ՀՊՃՀ. -Եր.: Ճարտարա-
գետ, 2013. - էջ:

Ձեռնարկը ընդգրկում է «Հավանականությունների տեսություն» դասընթացի ուսումնա-
կան նյութը: Բերված են տեսության որոշ արդյունքներ, մեծ քանակությամբ լուծված օրինակ-
ներ, որոնք լուսաբանում են տեսական նյութը:

Ձեռնարկը նախատեսված է բուհերի տեխնիկական մասնագիտությունների ուսանող-
ների համար: Կարող է օգտակար լինել նաև հավանականության տեսությամբ հետաքրքրվող
ընթերցող լայն շրջաններին:

ՀՏԴ
ԳՄԴ

ISBN

© ՃԱՐՏԱՐԱԳԵՏ 2013
© Առաքելյան Ա.Հ. 2013
© Գրիգորյան Գ.Ս. 2013
© Արզումանյան Ս.Կ. 2013

ԲՈՎԱՆԴԱԿՈՒԹՅՈՒՆ

Նախաբան	6
Գ Լ Ո Ւ Խ 1. ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ	
 ՀԻՄՆԱԿԱՆ ՀԱՍԿԱՅՈՒԹՅՈՒՆՆԵՐ	7
§1.1. Կոմբինատորիկայի տարրերը	7
§1.2. Պատահականություններ և գործողություններ դրանց հետ	12
§1.3. Պատահականների դիսկրետ տարածությունը	15
§1.4. Երկրաչափական հավանականություն	18
Գ Լ Ո Ւ Խ 2. ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ	
 ԱՔՍԻՈՄԱՏԻԿԱՆ	22
§2.1. Պատահականների հանրահաշիվ և սիգմա-հանրահաշիվ	22
§2.2. Հավանականության սահմանումը	26
Գ Լ Ո Ւ Խ 3. ՊԱՅՄԱՆԱԿԱՆ ՀԱՎԱՆԱԿԱՆՈՒԹՅՈՒՆ	
 ԵՎ ՊԱՏԱՀՈՒՅԹՆԵՐԻ ԱՆԿԱԽՈՒԹՅՈՒՆ	30
§3.1. Պայմանական հավանականություն	30
§3.2. Պատահականների անկախություն	32
§3.3. Լրիվ հավանականության և Բայեսի բանաձևերը	36
Գ Լ Ո Ւ Խ 4. ԲԵՌՆՈՒԼԻԻ ՍԽԵՄԱՆ	38
§4.1. Բեռնուլիի բանաձևը	38
§4.2. Անկախ փորձերի խնդրի ընդհանրացումը	39
§4.3. Պուասոնի թեորեմը Բեռնուլիի սխեմայի համար	41

Գ Լ ՈՒԽ 5. ՊԱՏԱՀԱԿԱՆ ՄԵԾՈՒԹՅՈՒՆՆԵՐ ԵՎ ԴՐԱՆՑ

ԲԱՇԽՈՒՄԸ	44
§5.1. Պատահական մեծություններ	44
§5.2. Պատահական մեծությունների բաշխումը	47
§5.3. Բաշխման ֆունկցիան. նրա հատկությունները	50
§5.4. Դիսկրետ բաշխումների օրինակներ	53
§5.5. Բացարձակ անընդհատ բաշխումների օրինակներ	55
§5.6. Նորմալ բաշխման հատկությունները	58

Գ Լ ՈՒԽ 6. ԲԱԶՄԱԶՍՓ ԲԱՇԽՈՒՄՆԵՐ **60**

§6.1. Համատեղ բաշխում	60
§6.2. Բազմաչափ բաշխման տեսակները	61
§6.3. Բազմաչափ բաշխման օրինակներ	63
§6.4. Պատահական մեծությունների անկախությունը	64
§6.5. Ֆունկցիաներ պատահական մեծություններից	66

Գ Լ ՈՒԽ 7. ՊԱՏԱՀԱԿԱՆ ՄԵԾՈՒԹՅՈՒՆՆԵՐԻ ԹՎԱՅԻՆ

ԲՆՈՒԹԱԳՐԻՉՆԵՐԸ	72
§7.1. Մաթեմատիկական սպասելի	72
§7.2. Մաթեմատիկական սպասելիի հատկությունները	73
§7.3. Ստանդարտ բաշխումների մաթեմատիկական սպասելիները	78
§7.4. Դիսպերսիա և բարձր կարգի մոմենտներ	80
§7.5. Դիսպերսիայի հատկությունները	83
§7.6. Ստանդարտ բաշխումների դիսպերսիաները	84
§7.7. Բաշխումների այլ թվային բնութագրիչներ	86
§7.8. Պատահական մեծությունների կովարիացիա. կոռելյացիայի գործակից	88

Գ Լ ՈՒ Խ 8. ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ

ՍԱՀՄԱՆԱՅԻՆ ԹԵՈՐԵՄՆԵՐ	92
-----------------------------------	-----------

§8.1. Չեփիշևի անհավասարությունները:

Մեծ թվերի օրենքը	92
------------------------	----

§8.2. Ծնորդ ֆունկցիա	97
----------------------------	----

§8.3. Բնութագրիչ ֆունկցիա	102
---------------------------------	-----

§8.4. Թույլ զուգամիտություն. անընդհատության թեորեմ	106
--	-----

§8.5. Կենտրոնական սահմանային թեորեմ	110
---	-----

Օգտագործված գրականություն	112
--	------------

ՆԱԽԱԲԱՆ

Ուսումնական ձեռնարկի հիմքում ընկած են հեղինակների՝ «Հավանականությունների տեսություն» դասընթացի վերաբերյալ Հայաստանի պետական ճարտարագիտական համալսարանում կարդացած դասախոսությունները: Ձեռնարկը նախատեսված է բուհերի տեխնիկական մասնագիտությունների ուսանողների համար, ովքեր ունեն պատրաստվածություն «Բարձրագույն մաթեմատիկա» առարկայի հիմնական դասընթացներից:

Հեղինակները փորձել են տեսական նյութը շարադրել հնարավորինս ամբողջական և մատչելի լեզվով՝ ձգտելով լիակատար մաթեմատիկական խստության: Տեսության որոշ արդյունքներ ձեռնարկում բերված են առանց ապացուցման: Լուծված են մեծ քանակությամբ օրինակներ, որոնք լուսաբանում են բերված տեսական նյութը և պարզաբանում որոշ տեխնիկական կիրառություններ:

Ձեռնարկը գրելիս նկատի է առնվել ընթերցողների լայն շրջանի համար հայերեն լեզվով «Հավանականությունների տեսության» համառոտ դասընթաց ունենալու անհրաժեշտությունը և բարձրագույն կրթական համակարգի ժամանակակից պահանջները:

Գ Լ ՈՒԽ 1

ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ ՀԻՄՆԱԿԱՆ ՀԱՍԿԱՅՈՒԹՅՈՒՆՆԵՐԸ

§1.1. Կոմբինատորիկայի տարրերը

Կոմբինատորիկան մաթեմատիկայի բաժին է, որն ուսումնասիրում է տրված բազմությունից տարրերի ընտրության և դրանք ըստ խմբերի դասավորելու հետ կախված խնդիրները: Մասնավորապես, դիտարկվում են խնդիրներ՝ կապված բազմության վերջավոր թվով տարրերի հնարավոր կոմբինացիաների քանակի հաշվարկի հետ: Դրանցից յուրաքանչյուրում անհրաժեշտ է հաշվել որոշակի գործողության (կապուկից խաղաքարտի ընտրություն, խաղոսկրի կամ մետաղադրամի նետում և այլն) արդյունքների հնարավոր եղանակների թիվը: Կոմբինատոր բանաձևերը հնարավորություն են տալիս հաշվելու գործողության կատարման հնարավոր եղանակների կամ դրա հնարավոր ելքերի թիվը:

Բազմապատկման սկզբունք: Կոմբինատորիկայի հիմնական սկզբունքը հետևյալն է. Եթե A օբյեկտը կարելի է ընտրել k եղանակներով, իսկ B օբյեկտը՝ m եղանակներով, ապա A և B օբյեկտների (A, B) կարգավորված զույգը կարելի է կազմել $k \cdot m$ եղանակներով:

Թեորեմ 1.1: Դիցուք $A = \{a_1, \dots, a_k\}$ բազմությունը բաղկացած է k տարրերից, իսկ $B = \{b_1, \dots, b_m\}$ բազմությունը՝ m տարրերից: Այդ դեպքում հնարավոր է կազմել ճիշտ $k \cdot m$ հասարակ (a_i, b_j) զույգեր՝ վերցնելով առաջին տարրը A բազմությունից, իսկ երկրորդը՝ B -ից:

Ապացույց: Կարող ենք կազմել a_1 տարրը պարունակող m հատ զույգ՝ $(a_1, b_1), (a_1, b_2), \dots, (a_1, b_m)$: Հեշտ է նկատել, որ նույնքան զույգ կարելի է կազմել a_2 տարրով և A բազմության k տարրերից յուրաքանչյուրով: Այսպիսով, հնարավոր է կազմել ընդհանուր $k \cdot m$ զույգ,

որտեղ առաջին տարրը ընտրված է A բազմությունից, իսկ երկրորդը՝ B -ից: \square

Վարժություն: Թեորեմ 1-ի միջոցով ապացուցել, որ.

ա) երեք մետաղադրամի նետման դեպքում հնարավոր են $2 \cdot 2 \cdot 2 = 8$ ելքեր

բ) երկու խաղոսկրի նետման դեպքում հնարավոր են $6 \cdot 6 = 36$ տարբեր ելքեր

գ) եռանիշ թվերի քանակը՝ $9 \cdot 10 \cdot 10 = 900$:

Արկղային սխեմաներ: Դիցուք արկղը պարունակում է n հատ համարակալված գնդակներ: Հաջորդաբար ընտրում ենք արկղից k գնդակ: Ընտրության արդյունքում կստանանք հավաք k գնդակներից: Պարզենք, թե հնարավոր քանի եղանակով կարելի է n գնդակներից ընտրել k հատը: Այլ կերպ ասած, k երկարությամբ քանի միմյանցից *տարբեր* հավաքներ են հնարավոր:

Հարցին միարժեքորեն հնարավոր չէ պատասխանել, քանի որ հայտնի չէ՝

ա) ինչպես է իրականացվել ընտրությունը;

բ) ինչ ենք հասկանում *տարբեր* հավաքներ ասելով:

Դիտարկենք ընտրություն կատարելու հետևյալ հնարավոր եղանակները:

1. Ընտրություն *վերադարձով*. արկղից վերցված յուրաքանչյուր գնդակ վերադարձվում է արկղ, և յուրաքանչյուր հաջորդն ընտրվում է լրիվ արկղից: Այսպիսով, ստացված k երկարությամբ հավաքում համարները *կարող են* կրկնվել:

2. Ընտրություն *ստանց վերադարձի*. Վերցված գնդակները արկղ չեն վերադարձվում, ուստի ստացված հավաքում համարները կրկնվել *չեն* *կարող*:

Այժմ պայմանավորվենք, թե միևնույն երկարությամբ որ հավաքները կհամարենք միմյանցից *տարբեր*:

1. *Կարգավորված* հավաքներ. միևնույն երկարությամբ գնդակների համարների երկու հավաքներ համարվում են տարբեր, եթե դրանք տարբերվում են կամ իրենց կազմով, կամ համարների դասավորության կարգով: Այսպիսով, օրինակ՝ $(1, 5, 2)$, $(2, 5, 1)$ և $(4, 4, 5)$ հավաքները տարբեր են:

2. Ոչ կարգավորված հավաքներ. այս դեպքում գնդակների համարների երկու հավաքներ համարվում են տարբեր, եթե դրանք տարբերվում են միայն իրենց կազմով: Տվյալ դեպքում արդեն $(1, 5, 2)$ և $(2, 5, 1)$ հավաքները տարբեր չեն, իսկ, օրինակ, $(1, 5, 2)$ և $(4, 4, 5)$ հավաքները տարբեր են:

Ընտրության չորս սխեմաներից յուրաքանչյուրի համար հաշվենք բոլոր հնարավոր, միմյանցից տարբեր արդյունքները (հավաքները):

Թեորեմ 1.2: *n տարրերի բազմությունից առանց վերադարձի ընտրված k երկարությամբ կարգավորված հավաքների ընդհանուր թիվը հավասար է*

$$A_n^k = n(n-1) \cdot \dots \cdot (n-k+1) = \frac{n!}{(n-k)!};$$

A_n^k թիվը կոչվում է n տարրերից k -ական կարգավորությունների թիվ:

Ապացույց: Առաջին գնդակը կարելի է ընտրել n եղանակներով: Առաջին գնդակի ցանկացած ընտրության դեպքում երկրորդը կարող ենք ընտրել $n-1$ եղանակներով: Այդ երկու գնդակների ցանկացած ընտրության դեպքում էլ երրորդը կարելի է ընտրել $n-2$ եղանակով և այլն: Հաջորդաբար կիրառելով թեորեմ 1-ը, ստանում ենք, որ k գնդակների ընդհանուր հավաքների թիվը հավասար է k հատ բազմապատկիչների արտադրյալին՝ $n(n-1) \cdot \dots \cdot (n-k+1)$: \square

Հետևանք 1.1: n տարրերից բաղկացած բազմության տարրերի բոլոր տեղափոխությունների քանակը հավասար է $P_n = n!$:

Օրինակ 1: Պատվո հարթակի (առաջին, երկրորդ և երրորդ տեղեր) քանի՞ տարբերակ է հնարավոր, եթե մրցմանը մասնակցում են 10 մարզիկներ:

Լուծում: Պարզ է, որ պատվո հարթակները կարող են տարբերվել թե մարզիկների կազմով, թե նրանց զբաղեցրած դիրքերով, ուստի բոլոր հնարավոր տարբերակների թիվն է՝

$$A_{10}^3 = \frac{10!}{(10-3)!} = 8 \cdot 9 \cdot 10 = 720:$$

Օրինակ 2: 7 տարբեր ազգանուններից քանի՞ տարբեր ցուցակներ կարելի է կազմել, որոնք կտարբերվեն ազգանունների հերթականությամբ:

Լուծում: Ունենք $P_7 = 7! = 5040$:

Վարժություն: Գտնել հետևյալ փորձերում բոլոր հնարավոր ելքերի քանակը.

ա) 36 խաղաթուղթ պարունակող կապուկից մեկական խաղաթուղթ են տալիս երեք խաղացողների;

բ) ոչ զրոյական տարբեր թվանշաններով կազմված է եռանիշ թիվ:

գ) երեք տարբեր գույններից պատրաստում են եռագույն դրոշակ:

Թեորեմ 1.3: n տարրերի բազմությունից առանց վերադարձի ընտրված k երկարությամբ ոչ կարգավորված հավաքների ընդհանուր թիվը հավասար է՝

$$C_n^k = \frac{A_n^k}{k!} = \frac{n!}{k!(n-k)!} :$$

C_n^k թիվը կոչվում է n տարրերից k -ական զուգորդությունների թիվ:

Ապացույց: Համաձայն հետևանք 1-ի՝ k երկարությամբ ցանկացած ոչ կարգավորված հավաքից կարելի է ստանալ $k!$ կարգավորված հավաքներ: Այսպիսով, յուրաքանչյուր զուգորդությունից, տեղափոխությունների միջոցով, կարելի է ստանալ $k!$ հատ կարգավորություն, իսկ C_n^k հատ զուգորդությունից՝ $C_n^k \cdot k!$ կարգավորություն, հետևաբար՝ $A_n^k = C_n^k \cdot k!$: \square

Օրինակ 3: Մրցման նախնական փուլին մասնակցում են 10 թիմեր, որոնցից եզրափակիչ են դուրս գալիս 3-ը: Եզրափակիչ դուրս եկած թիմերի քանի՞ եռյակ է հնարավոր:

Լուծում: Ի տարբերություն օրինակ 1-ի, այստեղ կարևոր չէ եզրափակչին մասնակցող թիմի զբաղեցրած տեղը (կարգը), ուստի բոլոր հնարավոր եռյակների թիվը կլինի՝

$$C_{10}^3 = \frac{10!}{3!(10-3)!} = 120 :$$

Վարժություն: Գտնել հետևյալ փորձերում բոլոր հնարավոր ելքերի քանակը.

ա) 36 խաղաթուղթ պարունակող կապուկից 3 խաղաթուղթ տալիս են մեկ խաղացողների;

բ) խմբի 20 ուսանողներից 2-ն ընտրվում են ուսանողական խորհրդի անդամ:

Թեորեմ 1.4: *n տարրերի բազմությունից վերադասարձով ընտրված k երկարությամբ կարգավորված հավաքների ընդհանուր թիվը հավասար է n^k :*

Ապացույց: Առաջին գնդակը կարելի է ընտրել n եղանակներով: Այդ եղանակներից յուրաքանչյուրի դեպքում երկրորդը կարելի է ընտրել նույնպես n եղանակներով, և այդպես k անգամ: Հետևաբար՝ հավաքների ընդհանուր թիվը հավասար է $n \cdot n \cdot \dots \cdot n = n^k$: \square

Վարժություն: Գտնել հետևյալ փորձերում բոլոր հնարավոր ելքերի քանակը.

ա) մետաղադրամը նետում են հինգ անգամ;

բ) հնգանիշ թիվը կազմում են միայն կենտ թվանշաններով:

Թեորեմ 1.5: *n տարրերի բազմությունից վերադասարձով ընտրված k երկարությամբ ոչ կարգավորված հավաքների ընդհանուր թիվը հավասար է՝*

$$C_{n+k-1}^k = C_{n+k-1}^{n-1} :$$

Ապացույց: Կիրառենք ինդուկցիայի մեթոդը: Հետաքրքրող հավաքների ընդհանուր թիվը նշանակենք $N(n, k)$ -ով: Պարզ է, որ՝

$$N(m, 1) = m = C_{m+1-1}^1, \quad m \leq n :$$

Այժմ ենթադրենք՝ $N(m, k) = C_{m+k-1}^k, m \leq n$ և ցույց տանք, որ բանաձևը ճիշտ է, եթե k -ն փոխարինենք $(k+1)$ -ով: $[a_1, a_2, \dots, a_{n+1}]$ ոչ կարգավորված հավաքները դիտարկելիս կարելի է ենթադրել, որ դրանք դասավորված են աճման կարգով՝ $a_1 \leq a_2 \leq \dots \leq a_{n+1}$: Ակնհայտ է, որ այն ոչ կարգավորված հավաքների թիվը, որտեղ $a_1 = 1$ հավասար է $N(n, k)$ -ի, երբ $a_1 = 2$, այդ թիվը $N(n-1, k)$ է և այլն: Հետևաբար՝

$$N(n, k+1) = N(n, k) + N(n-1, k) + \dots + N(1, k) =$$

$$= C_{n+k-1}^k + C_{n-1+k-1}^k + \dots + C_n^n =$$

$$= (C_{n+k}^{k+1} - C_{n+k-1}^{k+1}) + (C_{n-1+k}^{k+1} - C_{n-1+k-1}^{k+1}) + \dots + (C_{n+1}^{k+1} - C_n^n) + C_n^n = C_{n+k}^{k+1},$$

որտեղ օգտվեցինք բինոմական գործակիցների հետևյալ հեշտ ստուգվող հատկությունից՝

$$C_n^{k-1} + C_n^k = C_{n+1}^k :$$

\square

Վարժություն: Գտնել .

ա) $k \in \mathbb{N}$ թվի հնարավոր վերլուծությունների քանակը n հատ ոչ բացասական ամբողջ թվերի գումարի տեսքով, եթե կարևոր է գումարելիների հաջորդականության կարգը:

բ) n փոփոխականի ֆունկցիայի k -րդ կարգի ածանցյալների քանակը:

§1.2. Պատահույթներ և գործողություններ դրանց հետ

Տարրական պատահույթների տարածություն: Հավանականությունների տեսության հիմնական հասկացություններից է տվյալ փորձի բոլոր հնարավոր արդյունքների տարածությունը:

Մահմանում 1.1: Տարրական *պատահույթների տարածություն* կոչվում է տվյալ փորձի բոլոր հնարավոր ելքերի բազմությունը. այն ընդունված է նշանակել Ω -ով, իսկ նրա տարրերը՝ *տարրական պատահույթները* կամ *տարրական ելքերը*՝ ω -ով:

Նշենք, որ ցանկացած որ դատարկ Ω բազմություն կարելի է դիտարկել, որպես որևէ փորձի տարրական պատահույթների տարածություն:

Մահմանում 1.2: Ω բազմության ենթաբազմությունները կոչվում են *պատահույթներ*: Ընդունված է ասել, որ A պատահույթը *տեղի է ունեցել*, եթե փորձի ելքը՝ ω տարրական պատահույթը, պատկանում է A բազմությանը:

Դիտողություն: Ընդհանրապես Ω բազմության ոչ բոլոր ենթաբազմություններն են անվանվում պատահույթներ, այլ առանձնացվում է ենթաբազմությունների մի որոշակի դաս: Այս սահմանափակման իմաստին կանդրադառնանք ստորև:

Այսպիսով, տարրական պատահույթը փորձի այնպիսի հնարավոր արդյունք է, որը, կախված փորձի նպատակներից, այլևս չի տրոհվում նոր բաղադրիչների, իսկ պատահույթը կարող է բաղկացած լինել մեկ կամ մի քանի տարրական պատահույթներից:

Օրինակ 1: 36 խաղաթղթերի կապուկից պատահականորեն ընտրվում է մեկ խաղաթուղթ: Այս փորձում «Խաչի թագավորի», կամ «Սրտի տասանոցի» բացվելը տարրական պատահույթ է, իսկ որևէ «թագավորի» բացվելը արդեն ոչ տարրական պատահույթ է: Բոլոր հնարավոր տարրական պատահույթների թիվը 36 է:

Օրինակ 2. Նետվում է խաղոսկրը: Նրա վերին նիստի վրա երկու միավորի ("2") բացվելը տարրական պատահույթ է: Այս փորձում տարրական պատահույթների տարածությունը բաղկացած է 6 տարրերից՝

$$\Omega = \{ "1", "2", \dots, "6" \} :$$

$A = \{ "2", "4", "6" \}$ պատահույթը նշանակում է, որ փորձի արդյունքում խաղոսկրի նիստին բացվել են զույգ թվով միավորներ:

Օրինակ 3. Դրամը նետվում է՝ մինչև առաջին զինանշանի բացվելը: Նշանակենք «զինանշան»- \mathcal{Q} , «գիր»- \mathcal{F} : Փորձի տարրական պատահույթները կլինեն՝

$$\mathcal{Q}, \mathcal{F}\mathcal{Q}, \mathcal{F}\mathcal{F}\mathcal{Q}, \dots, \underbrace{\mathcal{F}\mathcal{F}\dots\mathcal{F}}_{n-1}\mathcal{Q}, \dots$$

Օրինակ 4. Կետը պատահականորեն նետում ենք $[0,1]$ հատվածի վրա: Հատվածի ցանկացած կետի հետ նրա համընկնելը տարրական պատահույթ է:

Օրինակ 3-ում $\Omega = \{ \omega_1, \omega_2, \dots, \omega_n, \dots \}$, որտեղ $\omega_n = \underbrace{\mathcal{F}\mathcal{F}\dots\mathcal{F}}_{n-1}\mathcal{Q}$: Այս դեպքում Ω -ն հաշվելի բազմություն է:


Օրինակ 5-ում $\Omega = \{ x : 0 \leq x < 1 \}$ -ն ավելի քան հաշվելի բազմություն է: Այս դեպքում ասում են, որ բազմությունը *կոնտինուում* տիպի է (ցանկացած վերջավոր կամ անվերջ ինտերվալ թվային առանցքի վրա կոնտինուում տիպի բազմություն է):

Այսպիսով, կատարված է տարրական պատահույթների բազմության դասակարգում՝ վերջավոր, հաշվելի և կոնտինուում տիպի: Ω -անվանում են տարրական պատահույթների *դիսկրետ փարածություն*, եթե այն վերջավոր կամ հաշվելի բազմություն է, և *անընդհատ փարածություն*, եթե այն կոնտինուում տիպի է:

Գործողություններ պատահույթների հետ: Քանի որ պատահույթը, ըստ սահմանման, նույնացվել է բազմության հետ, ապա պատահույթների հետ կարելի է կատարել նույն գործողությունները, ինչ որ բազմությունների հետ: Մասնավորապես, ստացվում են հետևյալ գործողությունները և հարաբերությունները:

$A \cup B$ կամ $A + B$ - *պատահույթների գումար*: Այս պատահույթի էությունը փորձի արդյունքում A կամ B պատահույթներից գոնե մեկի տեղի ունենալն է:


$A \cap B$ կամ AB - *պատահույթների արտադրյալ*: Այս պատահույթը նշանակում է, որ երկու պատահույթներն էլ համատեղ տեղի են ունեցել (նկ. 1.1):



Նկ. 1.1. Պատահույթների գումար և արտադրյալ

$A \setminus B$ կամ $A - B$ - *պատահույթների տարբերություն*: Այս պատահույթը նշանակում է, որ A -ն տեղի է ունեցել, իսկ B -ն՝ ոչ:

$\bar{A} = \Omega \setminus A$ - A -ի *հակադիր պատահույթ*. այն է, որ փորձի արդյունքում A պատահույթը հանդես չի գալիս (նկ. 1.2):



Նկ. 1.2. Պատահույթների տարբերություն և հակադիր պատահույթ

Ω -ի ենթաբազմություններից առանձնացնենք հետևյալ երկուսը.

հավասարի պատահույթ՝ Ω . պատահույթ, որը հանդես է գալիս փորձի ցանկացած ելքի դեպքում;

անհնարին պատահույթ՝ \emptyset . պատահույթ, որը փորձի արդյունքում չի կարող հանդես գալ:

Ակնհայտ է, որ $\bar{\Omega} = \emptyset$, $\bar{\emptyset} = \Omega$, $A \cap \bar{A} = \emptyset$, $A \cup \bar{A} = \Omega$: Պատահույթների գումարի և արտադրյալի գործողությունները միմյանց հետ կապված են հետևյալ շատ կարևոր առնչությամբ՝

$$\overline{A \cup B} = \bar{A} \cap \bar{B}, \quad \overline{A \cap B} = \bar{A} \cup \bar{B}:$$


Բազմությունները կարող են հատվել կամ չհատվել, ընկած լինել մեկը մյուսի մեջ կամ ընկած չլինել: Հավանականությունների տեսությունում այս բոլոր հարաբերությունները կարելի է արտահայտել պատահականության տերմիններով:

A և B պատահականությունները կոչվում են *անհամատեղելի*, եթե $A \cap B$ -ն անհնարին պատահականություն է՝ $A \cap B = \emptyset$:

Ասում են, որ A պատահականության *քիսում է* B -ն և գրում են $A \subseteq B$, եթե B պատահականությունը հանդես է գալիս ամեն անգամ, երբ հանդես է գալիս A - ն (նկ. 1.3):

A_1, A_2, \dots, A_n պատահականությունները կազմում են *պատահականության լրիվ խումբ*, եթե նրանք զույգ առ զույգ անհամատեղելի են, և դրանց գումարը հավասար է հավաստի պատահականության, այսինքն՝ $A_i A_j = \emptyset$, ցանկացած $1 \leq i \neq j \leq n$ և $A_1 \cup A_2 \cup \dots \cup A_n = \Omega$:

Օրինակ 5. Վերջավոր թվով ելքերով փորձի տարրական պատահականությունների համակարգը պատահականության լրիվ խումբ է:



Նկ. 1.3. Անհամատեղելի և ներդրված պատահականություն

§1.3. Պատահականության դիսկրետ տարածությունը

Հիշեցնենք, որ տարրական պատահականության տարածությունը կոչվում է դիսկրետ, եթե Ω բազմությունը վերջավոր է կամ հաշվելի. $\Omega = \{\omega_1, \omega_2, \dots, \omega_n, \dots\}$:

Պարզ է, որ յուրաքանչյուր պատահականություն կարող է տեղի ունենալ փորձի որոշ ելքերի դեպքում և տեղի չունենալ այլ ելքերի դեպքում: Այսինքն՝ ամեն մի պատահականության համապատասխանում է տարրական ելքերի այնպիսի բազմություն, որոնցից յուրաքանչյուրի դեպքում պատահականությունը հանդես է գալիս: Նշված տարրական ելքերն անվանում են *պատահականության նպատարավոր ելքեր*:

Այժմ պատահականության դիսկրետ տարածության յուրաքանչյուր պատահականության համար սահմանենք հավանականության գաղափարը:

Սահմանում 1.3 : Յուրաքանչյուր ω_i , $i = 1, 2, \dots$ տարրական էլքի համապատասխանության մեջ դնենք $P(\omega_i) = p_i \in [0, 1]$ թիվ այնպես, որ

$$\sum_{i=1}^{\infty} p_i = 1: \quad (1.1)$$

A պատահույթի *հավանականություն* կանվանենք

$$P(A) = \sum_{i: \omega_i \in A} p_i \quad (1.2)$$

թիվը, որը հավասար է A -ին նպաստավոր տարրական էլքերի հավանականությունների գումարին: Երբ $A = \emptyset$, ապա վերցնում ենք $P(A) = 0$: (Պարզ է, որ (1.2) գուգամետ է, քանի որ գուգամետ է (1.1) շարքը):

Դիտողություն: Հավանականությունների տեսության արքիոմատիկան ներմուծելուց հետո պատահույթների հավանականությունները կսահմանենք անմիջականորեն, այլ ոչ պատահական էլքերի հավանականությունների միջոցով: Չէ՞ որ (1.2) բանաձևով կարելի է որորշել միայն այն պատահույթների հավանականությունները, որոնք բաղկացած են վերջավոր կամ հաշվելի թվով տարրական պատահույթներից: Սակայն տարրական պատահույթների դիսկրետ տարածությունում միշտ հնարավոր է հավանականության ներմուծումը՝ համաձայն սահմանում 1.3-ի:

Օրինակ 1: Պարագրաֆ 1.2-ի օրինակ 3-ի փորձում դրամը նետվում էր մինչև առաջին անգամ զինանշանի բացվելը: Վերագրենք պատահական էլքերին հետևյալ հավանականությունները.

$$\begin{array}{cccccc} \omega_i : & Գ & ԳԶ & ԳԳԶ & ԳԳԳԶ & \dots \\ p_i : & \frac{1}{2} & \frac{1}{4} & \frac{1}{8} & \frac{1}{16} & \dots \end{array}$$

Ստուգենք (1.1) պայմանը: Համաձայն անվերջ նվազող երկրաչափական պրոգրեսիայի գումարի բանաձևի՝

$$\sum_{i=1}^{\infty} p_i = \sum_{i=1}^{\infty} \frac{1}{2^i} = \frac{1/2}{1 - 1/2} = 1:$$

$A = \{\omega_2, \omega_4, \dots, \omega_{2n}, \dots\}$ պատահույթի (զինանշանը բացվել է մետաղադրամի զույգ քանակությամբ նետումների արդյունքում) հավանականությունը հավասար է՝

$$P(A) = p_2 + p_4 + \dots = \sum_{i=1}^{\infty} \frac{1}{2^{2i}} = \frac{1/4}{1 - 1/4} = \frac{1}{3}:$$

Հավանականության դասական սահմանումը: Դիտարկենք կանոնավոր մետաղադրամի նետման պարզագույն փորձը: Փորձի արդյունքը ստույգ որոշել հնարավոր չէ, քանի որ անհնար է հաշվի առնել դրավրա ազդող բոլոր գործոնները: Մյուս կողմից, եթե մետաղադրամը նետվում է n անգամ, ապա «գիր» և «գինանշան» բացվելու թվերի՝ $n(\mathcal{G})$ և $n(\mathcal{Q})$, հարաբերությունները n -ի, որոնք կոչվում են *հարաբերական հաճախականություններ*, փորձնականորեն n -ի մեծացմանը զուգընթաց ավելի ու ավելի են մոտենում $1/2$ -ին:

Այս փորձում տարրական պատահույթները *հավասարահնարավոր են* (հիմք չկա պնդելու, որ դրանցից մեկի հանդես գալը գերադասելի է մյուսներից), և որպես նրանց հանդես գալու օբյեկտիվ հնարավորության քանակական բնութագիր չ կարելի է վերցնել $1/2$ թիվը:

Կանոնավոր խաղոսկրի նետման դեպքում ունենք 6 հավասարահնարավոր ելքեր՝ "1", "2", ..., "6", և դրանցից յուրաքանչյուրի հանդես գալու հնարավորությունը կարելի է գնահատել $1/6$ թվով:

Դիտարկենք ավելի ընդհանուր դեպք: Դիցուք Ω -ն վերջավոր բազմություն է՝ $\Omega = \{\omega_1, \omega_2, \dots, \omega_n\}$, որտեղ բոլոր ω_i , $i = \overline{1, n}$ ելքերը հավասարահնարավոր են: Այս դեպքում նրանցից յուրաքանչյուրին կարող ենք համապատասխանեցնել $1/n$ թիվը, որը և կանվանենք տարրական պատահույթի *հավանականություն*:

Յուրաքանչյուր փորձ, որին համապատասխանող տարրական պատահույթների Ω բազմությունը վերջավոր հավասարահնարավոր ելքերի բազմություն է, կոչվում է *դասական սխեմա*:

Դասական սխեմայում հավանականության գաղափարը տարրական պատահույթներից տարածվում է կամայական պատահույթների վրա՝ հետևյալ ձևով:

Եթե $A = \{\omega_{i_1}, \omega_{i_2}, \dots, \omega_{i_k}\}$ պատահույթը կազմված է k ($1 \leq k \leq n$) տարրական ելքերից, ապա բնական է A պատահույթի հավանականությունը սահմանել հետևյալ ձևով՝

$$P(A) = p_{i_1} + p_{i_2} + \dots + p_{i_k} = \frac{1}{n} + \frac{1}{n} + \dots + \frac{1}{n} = \frac{k}{n} = \frac{N(A)}{N(\Omega)},$$

կամ

$$P(A) = \frac{N(A)}{N(\Omega)}:$$

Այսպիսով, դասական սխեմայում ցանկացած A պատահույթի հավանականությունը հավասար է այդ պատահույթին նպաստավոր տարրական ելքերի և թվի փորձի բոլոր հնարավոր ելքերի թվի հարաբերությանը:

Օրինակ 2: 36 խաղաթղթերի կապուկից պատահականորեն հանում ենք մեկը: Ինչպիսին է հավանականությունը, որ հանված խաղաթուղթը «կարմիր» է:

Մեզ հետաքրքրող $A = \{\text{հանված է «կարմիր» խաղաթուղթ}\}$ պատահույթին նպաստավոր կլինեն փորձի 36 ելքերից 18-ը («կարմիր» խաղաթղթերի թիվը կապուկում): Հետևաբար՝ $P(A) = 18/36 = 1/2$:

Օրինակ 3: Երկու խաղոսկր նետելիս որոշել բացվող նիշերի գումարի՝ չորսին չգերազանցելու հավանականությունը:

Քանի որ երկու խաղոսկր գցելիս փորձի բոլոր հնարավոր ելքերի թիվը 36 է, իսկ մեզ հետաքրքրող A պատահույթին նպաստավոր են հետևյալ վեց ելքերը՝ $(1,1), (1,2), (1,3), (2,1), (2,2), (3,1)$, հետևաբար՝ $P(A) = 6/36 = 1/6$:

§1.4. Երկրաչափական հավանականություն

Վերադառնանք §1.2-ի օրինակ 4-ին: Կետը պատահականորեն նետում ենք $[0,1]$ հատվածի վրա: Հատվածի յուրաքանչյուր կետ պատահական ելք է: Այս դեպքում որոշել հավասարահնարավոր տարրական $\omega \in [0,1]$ պատահույթների հավանականությունն այնպես, ինչպես վերջավոր տարածության դեպքում անհնար է: Իսկապես, եթե վերցնենք $P(\omega) = a > 0$, ապա $P(\Omega) = \infty$, այսինքն՝ խախտվում է $P(\Omega) = 1$ պայմանը, իսկ եթե վերցնենք $p(\omega) = 0$, ապա $P(\Omega) = 0$, և դարձյալ խախտվում է $P(\Omega) = 1$ պայմանը: Այս վիճակից ելքն այն է, որ հավանականությունը սահմանվի տարրական ելքերի բազմությունների համար: Բնական է ընդունել, որ կետի $[0,1] \subseteq [a,b]$ հատվածին ընկնելու հավանականությունը համեմատական է նրա երկարությանը՝ $(b-a)$ -ին: Մյուս կողմից՝ հայտնի է, որ $[0,1]$ հատվածի ոչ բոլոր բազմությունների համար է հնարավոր որոշել դրանց երկարությունը:

Այսպիսով, հավանականությունը հնարավոր է որոշել միայն պատահույթների որոշ բազմությունների վրա: Հավանականային տարածության այդպիսի օրինակ է *հավանականության երկրաչափական սահմանումը*:

Դիցուք Ω -ն n - չափանի էվկլիդյան \mathbb{R}^n տարածության սահմանափակ բազմություն է, որն ունի « n -չափանի ծավալ»:

\mathbb{R}^3 -ում Ω -ն մարմին է, որի «ծավալը» համընկնում է սովորական երկրաչափական ծավալ գաղափարի հետ:

\mathbb{R}^2 -ում Ω -ն հարթ պատկեր է, իսկ «երկրաչափական ծավալը» նրա մակերեսն է:

\mathbb{R}^1 -ում Ω -ն հատված է, իսկ նրա «ծավալը» հատվածի երկարությունն է:

Նշանակենք \mathcal{F} -ով Ω -ի « n -չափանի ծավալ» ունեցող ենթաբազմությունների բազմությունը:

Սահմանում 1.4: \mathcal{F} բազմության ցանկացած A ենթաբազմության (պատահույթի) հավանականություն կանվանենք A -ի «ծավալի» հարաբերությունը Ω -ի «ծավալին»

$$P(A) = \frac{mes A}{mes \Omega}: \quad (1.3)$$


Մեկնաբանություն: (1.3) բանաձևը $\Omega \subset \mathbb{R}^n$ սահմանափակ բազմության վրա պատահականորեն նետված կետի՝ $A \subset \Omega$ ենթաբազմության վրա ընկնելու հավանականությունն է:

Օրինակ 1: Կետը պատահականորեն նետում ենք $[0,1]$ հատվածի վրա: Հավանականությունը, որ այն կընկնի $0,5$ կետի վրա, հավասար է զրոյի, քանի որ կետի «ծավալը» (կետի երկարությունը) հավասար է զրոյի: Սակայն $0,5$ կետն ընկնելը անհնար պատահույթ չէ. Դա փորձի տարրական ելքերից մեկն է:

Օրինակ 2: Երկու մարդ պայմանավորվում են l ժամանակահատվածում հանդիպել որոշակի վայրում: Հանդիպման վայր առաջինը եկածը սպասում է մյուսին a ($a < l$) ժամ: Գտնել հանդիպման հավանականությունը:

Լուծում: Դիցուք A պատահույթն այն է, որ հանդիպումը կայացել է: Նշանակենք x -ով և y -ով հանդիպողների գալու պահերը:

Պարզ է, որ $x, y \in [0, l]$, և Ω -ն l կողմով քառակուսի է: Որպեսզի հան-



Նկ. 1.4.


դիպումը կայանա, անհրաժեշտ է և բավարար, որ տեղի ունենա $|x - y| \leq a$ անհավասարությունը, այսինքն՝ A պատահության այն է, որ քառակուսու վրա նետված կետն ընկնի նկ. 1.4-ում ստվերագծված տիրույթ: Ուստի

$$mesA = l^2 - (l - a)^2 = a(2l - a)$$

և հետևաբար՝ ըստ (1.3) բանաձևի՝

$$P = \frac{mesA}{mes\Omega} = \frac{a(2l - a)}{l^2}:$$

Բյուֆոնի խնդիր: Հարթության վրա միմյանցից a հեռավորությամբ տարված են զուգահեռ ուղիղներ: Հարթության վրա պատահականորեն նետում ենք l ($l < a$)



Նկ. 1.5.

երկարության ասեղ: Գտնել ասեղի՝ ուղիղներից որևէ մեկը հատելու հավանականությունը:

Լուծում: x -ով նշանակենք ասեղի միջնակետի հեռավորությունը մոտակա ուղղից և φ -ով՝ ասեղի և նրա միջնակետից ուղղին իջեցրած ուղղահայացի կազմած սուր անկյունը (նկ. 1.5):


(x, φ) զույգը որոշում է ասեղի դիրքը ուղիղների նկատմամբ և բավարարում է

$$\begin{cases} 0 \leq x \leq a/2, \\ 0 \leq \varphi \leq \pi/2 \end{cases}$$

անհավասարություններին:

Ω -ն $a/2$ և $\pi/2$ կողմերով ուղղանկյուն է (նկ. 1.6):

Ասեղի՝ ուղղի հետ հատմանը (A պատահույթ) նպաստավոր են այն



Նկ. 1.6.

(x, φ) ելքերը, որոնք բավարարում են $x \leq l/2 \cdot \cos \varphi$ անհավասարությանը: Այլ կերպ ասած՝ A պատահույթին նպաստավոր է (x, φ) կետի՝ նկ. 1.6-ի ստվերագծված տիրույթ ընկնելը: Հետևաբար՝

$$mes A = \int_0^{\pi/2} \frac{l}{2} \cos \varphi d\varphi = \frac{l}{2} \sin \varphi \Big|_0^{\pi/2} = \frac{l}{2}:$$

Համաձայն (1.3) բանաձևի՝ կստա-

նանք .

$$P(A) = \frac{mes A}{mes \Omega} = \frac{\frac{l}{2}}{\frac{a}{2} \cdot \frac{\pi}{2}} = \frac{2l}{\pi a}:$$

Գ Լ ՈՒ Խ 2
ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ
ԱՔՍԻՈՄԱՏԻԿԱՆ

§2.1. Պատահականության հանրահաշիվ և սիգմա-հանրահաշիվ

Պատահականության դիսկրետ տարածությունում P հավանականությունը որոշվում է Ω -ի բոլոր ենթաբազմությունների բազմության վրա: Երկրաչափական հավանականությունը սահմանվում է Ω -ի՝ բոլոր “ծալի” ունեցող ենթաբազմությունների \mathcal{F} բազմության համար:

Կամայական Ω բազմության դեպքում նախ առանձնացվում են Ω -ի որոշակի \mathcal{F} դասի ենթաբազմություններ, որոնք կանվանենք պատահականություն, այնուհետև հավանականությունը սահմանվում է որպես ֆունկցիա՝ որոշված *միայն* պատահականության բազմության վրա:

Այսպիսով, պատահականություն կանվանենք Ω -ի ոչ թե բոլոր ենթաբազմությունները, այլ որոշակիորեն առանձնացված խմբի տարրերը: Ընդ որում, անհրաժեշտ է հետևել, որ այդ խումբը լինի *փակ* պատահականության հետ կատարվող սովորական գործողությունների նկատմամբ: Այսինքն, պատահականության միավորումը, հատումը և հակադրումը կրկին պետք է հանգեցնի պատահականության:

Ասվածից բխում է, որ Ω -ից առանձնացված դասը հանրահաշվական կառուցվածք է: Սովորաբար, որպես \mathcal{F} դաս օգտագործվում է պատահականության σ -*հանրահաշիվը*, որի սահմանման համար նախապես ներմուծենք պատահականության *հանրահաշվի* գաղափարը:

Սահմանում 2.1: Ω -ի ենթաբազմությունների \mathcal{A} դասը կոչվում է *հանրահաշիվ*, եթե այն բավարարում է հետևյալ արքիոմներին.

- (A1) $\Omega \in \mathcal{A}$,
- (A2) եթե $A \in \mathcal{A}$, ապա $\bar{A} \in \mathcal{A}$,
- (A3) եթե $A \in \mathcal{A}$, $B \in \mathcal{A}$, ապա $A \cup B \in \mathcal{A}$:

(A1) և (A2) արքիոմներից բխում է, որ $\emptyset = \bar{\Omega}$ -ն նույնպես պատկանում է \mathcal{A} հանրահաշվին:

Հատկություն 1: Հանրահաշվի սահմանման մեջ (A3) արքիոմը կարելի է փոխարինել (A4)-ով.

(A4) եթե $A \in \mathcal{A}$, $B \in \mathcal{A}$, ապա $A \cap B \in \mathcal{A}$:

Ապացույց: Ցույց տանք, որ եթե բավարարված են (A1) և (A2) արքիոմները, ապա (A3)-ից հետևում է (A4)-ը: Եթե $A, B \in \mathcal{A}$, ապա ըստ (A2)-ի $\bar{A} \in \mathcal{A}$ և $\bar{B} \in \mathcal{A}$: Կիրառելով (A3) արքիոմը \bar{A} -ի և \bar{B} -ի նկատմամբ՝ կստանանք, որ $\overline{\bar{A} \cup \bar{B}} \in \mathcal{A}$: Դարձյալ օգտվելով (A2)-ից՝ կունենանք, որ $\overline{\bar{A} \cup \bar{B}} \in \mathcal{A}$: Համաձայն երկակիության առնչության՝

$$A \cap B = \overline{\bar{A} \cup \bar{B}} \in \mathcal{A}:$$

Հանգունորեն ցույց է տրվում, որ եթե բավարարված են (A1) և (A2) արքիոմները, ապա (A4)-ից հետևում է (A3)-ը: \square

Հատկություն 2: Եթե $A_1, A_2, \dots, A_n \in \mathcal{A}$, ապա $\bigcup_{i=1}^n A_i \in \mathcal{A}$:

Հատկություն 2-ն ապացուցվում է ինդուկցիայով (ըստ n -ի)՝ կիրառած (A3) արքիոմի նկատմամբ:

Օրինակ 1. Դիցուք $\Omega = \{\clubsuit, \diamond, \heartsuit, \spadesuit\}$: Ω -ի ենթաբազմությունների հետևյալ խմբերը հանրահաշիվներ են.

1. $\mathcal{A} = \{\emptyset, \Omega\} = \{\{\clubsuit, \diamond, \heartsuit, \spadesuit\}, \emptyset\}$ (տրիվիալ հանրահաշիվ);

2. $\mathcal{A} = \{\{\clubsuit, \diamond, \heartsuit, \spadesuit\}, \emptyset, \{\diamond\}, \{\clubsuit, \heartsuit, \spadesuit\}\}$;

3. $\mathcal{A} = 2^\Omega$ (Ω -ի բոլոր ենթաբազմությունների բազմություն):

Վարժություն: Ապացուցել, որ եթե Ω -ն բաղկացած է վերջավոր թվով n հատ տարրերից, ապա դրա ենթաբազմությունների բազմությունը բաղկացած է ճիշտ 2^n տարրերից:

Պատահույթների սիգմա - հանրահաշիվ: Հավանականությունների տեսությունում հաճախ հարկ է լինում միավորել (հասել) հաշվելի թվով պատահույթներ և այդպիսի միավորման (հատման) արդյունքը նույնպես համարել պատահույթ: Ընդ որում, հանրահաշվի (A3) արքիոմը բավական չէ. դրանից դեռ չի բխում, որ հանրահաշվին

պատկանող հաշվելի թվով ենթաբազմությունների հատումը նույաես պատկանում է այդ հանրահաշվին: Այդ պատճառով բնական է ավելի խիստ սահմանափակում դնել պատահույթների դասի վրա:

Սահմանում 2.2: Ω -ի ենթաբազմությունների \mathcal{F} դասը կոչվում է σ -հանրահաշիվ, եթե այն բավարարում է հետևյալ արքիոմներին.

$$(S1) \quad \Omega \in \mathcal{A},$$

$$(S2) \quad \text{եթե } A \in \mathcal{A}, \text{ ապա } \bar{A} \in \mathcal{A},$$

$$(S3) \quad \text{եթե } A_1, A_2, \dots \in \mathcal{F}, \text{ ապա } \bigcup_{n=1}^{\infty} A_n \in \mathcal{F}:$$

Արքիոմների այս խումը բավարար է, որպեսզի \mathcal{F} դասը փակ լինի բազմությունների հետ կատարվող բոլոր այլ հաշվելի թվով գործողությունների նկատմամբ: Մասնավորապես, հատկություն 1-ին համանմանորեն ապացուցվում է հետևյալ պնդումը:

Հատկություն 3: σ -հանրահաշվի սահմանման մեջ (S3) արքիոմը կարելի է փոխարինել (S4)-ով.

$$(S4) \quad \text{եթե } A_1, A_2, \dots \in \mathcal{F}, \text{ ապա } \bigcap_{n=1}^{\infty} A_n \in \mathcal{F}:$$

Հատկություն 4: Ցանկացած σ -հանրահաշիվ հանրահաշիվ է:

Ապացույց: Դիցուք \mathcal{F} -ը σ -հանրահաշիվ է: Ցույց տանք, որ այն բավարարում է (A3) արքիոմին, այսինքն, եթե $A \in \mathcal{F}$ և $B \in \mathcal{F}$, ապա $A \cup B \in \mathcal{F}$: Վերածենք A , B գույզը պատահույթների հաշվելի հաջորդականության հետևյալ կերպ. $A_1 = A$, $A_2 = B$, երբ $i \geq 2$:

Ակնհայտ է, որ $A \cup B$ պատահույթը համընկնում է $\bigcup_{i=1}^{\infty} A_i$ պատահույթին, և քանի որ \mathcal{F} -ը σ -հանրահաշիվ է, ապա՝

$$A \cup B = \bigcup_{i=1}^{\infty} A_i \in \mathcal{F}: \quad \square$$

Այսպիսով, ցանկակացած σ -հանրահաշիվ հանրահաշիվ է, սակայն հակառակ պնդումը ճիշտ չէ: Օրինակ 1-ում բերված բոլոր հանրահաշիվները σ -հանրահաշիվներ են, քանի որ պարունակում են վերջավոր թվով տարրեր; Ընդհանրապես, վերջավոր բազմության վրա հանրահաշիվ և σ -հանրահաշիվ գաղափարները համընկնում են:

(Ω, \mathcal{F}) գույզը, որտեղ \mathcal{F} -ը Ω -ի ենթաբազմությունների որևէ σ -հանրահաշիվ է, կոչվում է *չափելի տարածություն*:

Բորելյան բազմություններ: Կառուցենք σ -հանրահաշվի մի օրինակ, որն անհրաժեշտ է մեզ հետագայում: Դա իրական առանցքի բորելյան բազմությունների σ -հանրահաշվին է:

Դիցուք $\Omega = \mathbb{R}$, իսկ \mathcal{U} բազմությունը բաղկացած է (a, b) տիպի բոլոր բաց միջակայքերից. $\mathcal{U} = \{(a, b) \mid -\infty < a < b < \infty\}$:

Սահմանում 2.3: Իրական առանցքի բոլոր միջակայքերի \mathcal{U} բազմությունը պարունակող մինիմալ σ -հանրահաշիվը կոչվում է *բորելյան σ -հանրահաշիվ* և նշանակվում է $\mathcal{B}(\mathbb{R})$ -ով:

Պարզ է, որ $\mathcal{B}(\mathbb{R})$ -ը բոլոր (a, b) տիպի միջակայքերը պարունակող σ -հանրահաշիվների հատումն է: Այն դատարկ չէ, քանի որ այդպիսի σ -հանրահաշիվ կա՝ \mathbb{R} -ի բոլոր ենթաբազմությունների բազմությունը:

Թվարկենք թվային առանցքի որոշ բազմություններ, որոնք պատկանում են $\mathcal{B}(\mathbb{R})$ -ին: Համաձայն (S1) աքսիոմի՝ $\mathbb{R} \in \mathcal{B}(\mathbb{R})$: Այժմ ցույց տանք, որ բոլոր մեկկետանի $\{x\}$ բազմությունները նույնպես պատկանում են $\mathcal{B}(\mathbb{R})$ -ին: Իրոք, ըստ սահմանման $(x - \frac{1}{n}, x + \frac{1}{n})$ միջակայքերը պատկանում են $\mathcal{B}(\mathbb{R})$ -ին ցանկացած n -ի դեպքում: Քանի որ $\mathcal{B}(\mathbb{R})$ -ը σ -հանրահաշիվ է, ապա, համաձայն (S4) աքսիոմի, իր տարրերի հաշվելի հատումը պատկանում է իրեն, այսինքն՝

$$\{x\} = \bigcap_{n=1}^{\infty} \left(x - \frac{1}{n}, x + \frac{1}{n}\right) \in \mathcal{B}(\mathbb{R}):$$

Նկատենք, որ $\mathcal{B}(\mathbb{R})$ -ին են պատկանում նաև բոլոր $(a, b]$ ($[a, b)$ և $[a, b]$) տիպի միջակայքերը, որպես բաց միջակայքի և կետի (երկու կետերի) միավորում. $(a, b] = (a, b) \cup \{b\}$:

Բորելյան σ -հանրահաշիվը \mathbb{R}^n -ում կառուցվում է ճիշտ նույն ձևով, ինչպես \mathbb{R} -ում: Այն մինիմալ σ -հանրահաշիվն է, որը պարունակում է բոլոր $(a_1, b_1) \times (a_2, b_2) \times \dots \times (a_n, b_n)$ տեսքի բազմությունները, որոնք արդեն միջակայքեր չեն ինչպես \mathbb{R} -ում, այլ ուղղանկյուններ են \mathbb{R}^2 -ում, զուգահեռանիստեր \mathbb{R}^3 -ում և այլն: Ընդ որում, $\mathcal{B}(\mathbb{R}^n)$ պարունակում է բոլոր «սահմանային» բազմությունները: Օրինակ, շրջանը \mathbb{R}^2 -ում բորելյան բազմություն է. Այն ներսից կամ դրսից կարելի է մոտարկել ուղղանկյունների միավորումով:

Այսպիսով, սահմանեցինք Ω -ի ենթաբազմությունների հատուկ \mathcal{F} դասը (σ -հանրահաշիվ): Հաշվելի թվով գործողությունների կիրառումը \mathcal{F} դասի բազմությունների նկատմամբ կրկին տալիս է բազմություն \mathcal{F} դասից, այսինքն՝ դուրս չի բերում այդ դասի սահմաններից: Այսուհետ *պատահականություններ* կանվանենք միայն $A \in \mathcal{F}$ բազմությունները:

§2.2. Հավանականության սահմանումը

Տարրական պատահականությունների դիսկրետ տարածության դեպքում հավանականությունը սահմանվում էր Ω -ի բոլոր ենթաբազմությունների համար: Երկրաչափական հավանականությունը սահմանվում էր Ω -ի բոլոր «ծավալ» ունեցող ենթաբազմությունների համար: Այժմ սահմանենք *հավանականության* գաղափարը՝ որպես ֆունկցիա որոշված պատահականության վրա (ֆունկցիա, որն ամեն մի պատահականության համապատասխանեցնում է որոշակի թիվ՝ այդ պատահականության հավանականությունը): Նշենք նաև, որ հավանականությունը կսահմանենք որպես *ոչ բացասական նորմալիզոված չափ* տրված Ω -ի ենթաբազմությունների \mathcal{F} σ -հանրահաշիվի վրա:

Դիցուք (Ω, \mathcal{F}) -ը չափելի տարածություն է, այսինքն՝ Ω -ն տարրական ելքերի տարածություն է, իսկ \mathcal{F} -ը՝ Ω -ի ենթաբազմությունների (պատահականությունների) σ -հանրահաշիվ:

Սահմանում 2.4: $m : \mathcal{F} \rightarrow \mathbb{R}$ թվային ֆունկցիան կոչվում է *չափ* (Ω, \mathcal{F}) տարածության վրա, եթե այն բավարարում է հետևյալ պայմանները.

$$(m1) \quad m(A) \geq 0, \quad \forall A \in \mathcal{F} :$$

(m2) Եթե հաշվելի թվով զույգ առ զույգ անհամատեղելի $A_1, A_2, \dots, A_n, \dots$ պատահականությունները պատկանում են \mathcal{F} -ին, ապա՝

$$m\left(\bigcup_{k=1}^{\infty} A_k\right) = \sum_{k=1}^{\infty} m(A_k) :$$

Օրինակ 1. Դիցուք $\Omega = \mathbb{N}$, $\mathcal{F} = 2^{\mathbb{N}}$: \mathcal{F} հանրահաշիվի վրա m չափը սահմանենք հետևյալ առնչությամբ. $m(A) = |A|$, որտեղ $|A|$ -ն A բազմության տարրերի քանակն է:

Օրինակ 2 (Լեքեզի չափ): Երկրաչափական հավանականությունը, սահմանելիս օգտագործեցինք \mathbb{R}^n -ում A բազմության « n -չափանի ծավալ» տերմինը՝ նկատի ունենալով «երկարություն» ուղղի դեպքում, «մակերես» հարթության դեպքում և «ծավալ» տարածության դեպքում: Հարց է առաջանում, այս հասկացություններն արդյոք հանդիսանում են չափեր՝ սահմանում 2.4-ի իմաստով: Տանք այս հարցի պատասխանը ուղղի դեպքում:

Դիտարկենք իրական ուղղի բորելյան բազմությունների σ -հանրահաշիվը: Սահմանման համաձայն՝ այս σ -հանրահաշիվը բոլոր միջակայքերը պարունակող մինիմալ σ -հանրահաշիվն է: Ցանկացած (a, b) միջակայքի համար $b - a$ թիվը կանվանենք (a, b) միջակայքի երկարություն: Ճիշտ է հետևյալ պնդումը, որի ապացույցն այստեղ չենք բերի:

Թեորեմ 2.1: $(\mathbb{R}, \mathcal{B}(\mathbb{R}))$ չափելի տարածությունում գոյություն ունի միակ λ չափ, որի արժեքը ցանկացած միջակայքի համար հավասար է այդ միջակայքի երկարությանը՝ $\lambda(a, b) = b - a$: Այդ չափը կոչվում է Լեքեզի չափ:

Այժմ կարող ենք հավանականության գաղափարը սահմանել որպես նորմավորված չափ:

Սահմանում 2.5: (Ω, \mathcal{F}) չափելի տարածության վրա հավանականություն կամ հավանականային չափ է կոչվում $P : \mathcal{F} \rightarrow \mathbb{R}$ թվային ֆունկցիան, որը բավարարում է հետևյալ աքսիոմներին.

$$(P1) \quad P(\Omega) = 1,$$

$$(P2) \quad P(A) \geq 0, \quad \forall A \in \mathcal{F},$$

(P3) Եթե $A_1, A_2, \dots, A_n, \dots$ պատահույթները պատկանում են \mathcal{F} -ին և զույգ առ զույգ անհամատեղելի են, ապա՝

$$P\left(\bigcup_{k=1}^{\infty} A_k\right) = \sum_{k=1}^{\infty} P(A_k):$$

(Ω, \mathcal{F}, P) եռյակը, որտեղ (Ω, \mathcal{F}) -ը չափելի տարածություն է, իսկ P -ն՝ \mathcal{F} -ի տարրերի վրա որոշված հավանականություն, կոչվում է հավանականային տարածություն:

Անմիջապես հավանականության սահմանումից հետևում են հավանականության հետևյալ հատկությունները.

Թեորեմ 2.2: Նավանականությունն օժտված է հետևյալ հատկություններով.

1. $P(\emptyset) = 0$,

2. $P(\bar{A}) = 1 - P(A)$,

3. Եթե A_1, A_2, \dots, A_n պատահույթները պարկանում են \mathcal{F} -ին և զույգ առ զույգ անհամատեղելի են, ապա

$$P\left(\bigcup_{k=1}^n A_k\right) = \sum_{k=1}^n P(A_k),$$

4. Եթե $A \subset B$, ապա $P(A) \leq P(B)$,

5. $P(A \cup B) = P(A) + P(B) - P(AB)$:

Ապացույց: 1. $A_1 = \Omega$ և $A_i = \emptyset$, $i \geq 2$ պատահույթները զույգ առ զույգ անհամատեղելի են, և դրանց միավորումը Ω -ն է: Համաձայն (P1) և (P3) արսիոնների՝

$$1 = P(\Omega) = \sum_{i=1}^{\infty} P(A_i) = 1 + \sum_{i=2}^{\infty} P(\emptyset):$$

Վերջինս հնարավոր է միայն այն դեպքում, երբ $P(\emptyset) = 0$:

2. Վերցնենք $A_i = \emptyset$, երբ $i > n$: $A_1, A_2, \dots, A_n, \emptyset, \emptyset, \dots \in \mathcal{F}$ պատահույթները զույգ առ զույգ անհամատեղելի են, և ըստ (P3) արսիոնի՝

$$P\left(\bigcup_{k=1}^n A_k\right) = P\left(\bigcup_{k=1}^{\infty} A_k\right) = \sum_{k=1}^{\infty} P(A_k) = \sum_{k=1}^n P(A_k):$$

3. Ω հավաստի պատահույթը կարելի է ներկայացնել որպես A և \bar{A} անհամատեղելի պատահույթների միավորում՝ $\Omega = A \cup \bar{A}$: Համաձայն հատկություն 2-ի՝ $1 = P(\Omega) = P(A) + P(\bar{A})$:

4. Եթե $A \subset B$, ապա պարզ է, որ B -ն կարելի է ներկայացնել $B = A \cup B\bar{A}$ տեսքով, հետևաբար՝

$$P(B) = P(A) + P(B\bar{A}) \geq P(A):$$

5. $A \cup B$ և B պատահույթները ներկայացնենք $A \cup B = A \cup B\bar{A}$ և $B = BA \cup B\bar{A}$ տեսքերով: Նկատենք, որ այս հավասարումների աջ մասերում գրված են անհամատեղելի պատահույթներ, հետևաբար՝

$$P(A \cup B) = P(A) + P(B\bar{A}), \quad P(B) = P(BA) + P(B\bar{A}):$$

Հատկություն 5-ը անմիջապես բխում է վերջին հավասարություններից: \square

Թեորեմ 2.3 (անընդհատության աքսիոմ): \mathcal{F} σ -հանրահաշվի պարահոյթների ցանկացած նվազող $C_1 \supseteq C_2 \supseteq \dots \supseteq C_n \supseteq \dots$ հաջորդականության համար այնպես, որ $P(C_1) < \infty$ և

$$\bigcap_{n=1}^{\infty} C_n = C \in \mathcal{F},$$

տեղի ունի

$$\lim_{n \rightarrow \infty} P(C_n) = P(C):$$

հավասարությունը:

Ապացույց: Նշանակենք $B_n = C_n \setminus C_{n+1}$: C, B_1, B_2, \dots բազմությունները զույգ առ զույգ անհամատեղելի են, ուստի

$$C_1 = C \cup \left(\bigcup_{i=1}^{\infty} B_i \right), \quad C_n = C \cup \left(\bigcup_{i=n}^{\infty} B_i \right)$$

ներկայացումներից, համաձայն (P3) աքսիոմի, կստանանք նմանատիպ հավասարություններ հավանականությունների համար՝

$$P(C_1) = P(C) + \sum_{i=1}^{\infty} P(B_i), \quad P(C_n) = P(C) + \sum_{i=n}^{\infty} P(B_i):$$

Համաձայն $P(C_1) < \infty$ պայմանի՝ $\sum_{i=1}^{\infty} P(B_i)$ շարքը բացարձակ գումարաւոր է, հետևաբար՝ շարքի պոչը՝ $\sum_{i=n}^{\infty} P(B_i)$ ձգտում է զրոյի, երբ $n \rightarrow \infty$: Այդ պատճառով

$$P(C_n) = P(C) + \sum_{i=n}^{\infty} P(B_i) \xrightarrow{n \rightarrow \infty} P(C) + 0 = P(C): \quad \square$$

Հետևանք: \mathcal{F} σ -հանրահաշվի պարահոյթների ցանկացած աճող $C_1 \subseteq C_2 \subseteq \dots \subseteq C_n \subseteq \dots$ հաջորդականության համար

$$\bigcup_{n=1}^{\infty} C_n = C \in \mathcal{F},$$

հետևապես՝ տեղի ունի $\lim_{n \rightarrow \infty} P(C_n) = P(C)$ հավասարությունը:

Նշենք, որ անընդհատության հատկությունը բնորոշ է ոչ միայն հավանականությանը, այլ և կամայական չափի: Դրա օգտակարությունը միանգամից պարզ է դառնում՝ դիտարկելով հետևյալ վարժությունը:

Վարժություն: Կիրառելով անընդհատության աքսիոմը $C_n = (x_n - 1/n, x_n + 1/n)$ բազմությունների նվազող հաջորդականության նկատմամբ, ցույց տալ, որ թվային ուղղի մեկկետանի $\{x\}$ ենթաբազմության Լեբեգի չափը հավասար է զրոյի՝ $\lambda\{x\} = 0$: Օգտագործելով այս փաստը՝ ապացուցել, որ $\lambda(\mathbb{N}) = 0$, $\lambda(\mathbb{Z}) = 0$, $\lambda(\mathbb{Q}) = 0$:

Գ Լ ՈՒ Խ 3

ՊԱՅՄԱՆԱԿԱՆ ՀԱՎԱՆԱԿԱՆՈՒԹՅՈՒՆ ԵՎ ՊԱՏԱՀՈՒՅԹՆԵՐԻ ԱՆԿԱԽՈՒԹՅՈՒՆ

§3.1. Պայմանական հավանականություն

Խնդիր 1: Դիտարկենք n հատ հավասարահնարավոր տարրական ելքեր պարունակող Ω բազմությունը: Դիցուք A պատահույթի իրականացմանը նպաստավոր են k ($1 \leq k \leq n$) հատ տարրական ելքեր, իսկ B և AB պատահույթներին՝ համապատասխանաբար m ($1 \leq m \leq n$) և s ($1 \leq s \leq \min(k, m)$): Պահանջվում է գտնել A պատահույթի հավանականությունը, եթե հայտնի է, որ իրականացել է B պատահույթը: Նշանակենք այդ հավանականությունը $P(A | B)$ -ով:

Ակնհայտ է, որ

$$P(A) = \frac{k}{n}, \quad P(B) = \frac{m}{n}, \quad P(AB) = \frac{s}{n}:$$

Քանի որ B պատահույթն արդեն տեղի է ունեցել, ապա A -ին կնպասեն s ելքեր հնարավոր m ելքերից: Հետևաբար՝ $P(A | B) = \frac{s}{m}$:

Մյուս կողմից՝ $\frac{s}{m} = \frac{s/n}{m/n} = \frac{P(AB)}{P(B)}$, որից բխում է

$$P(A | B) = \frac{P(AB)}{P(B)}, \quad (P(B) > 0) \quad (3.1)$$

հավասարությունը:

Խնդիր 2: n -չափանի էվկլիդյան տարածության վերջավոր ծավալի Ω տիրույթի վրա նետվում է կետ: Ω -ի A, B և AB ենթաբազմություններն ունեն $\text{mes } A$, $\text{mes } B$ և $\text{mes } AB$ վերջավոր ծավալներ: Գտնել հավանականությունը, որ Ω նետված կետը կընկնի A տիրույթ, եթե հայտնի է, որ այն ընկել է B տիրույթ: Ըստ էության, կետը նետ-

վում է B տիրույթ, հետևաբար հավանականությունը, որ այն կընկնի B -ի ենթաբազմության՝ AB վրա, համաձայն երկրաչափական հավանականության, կլինի՝

$$P(A | B) = \frac{\text{mes } AB}{\text{mes } B},$$

որտեղ $P(A | B)$ -ն որոնելի հավանականությունն է: Մյուս կողմից՝

$$\frac{\text{mes } AB}{\text{mes } B} = \frac{\text{mes } AB}{\text{mes } \Omega} \cdot \frac{\text{mes } \Omega}{\text{mes } B} = \frac{P(AB)}{P(B)},$$

այսինքն՝ կրկին ստացվում է (3.1)-ը:

Այսպիսով, ցանկացած (Ω, \mathcal{F}, P) հավանականային տարածության համար բնական է հետևյալ սահմանումը:

Մահմանում 2.1: Դիցուք $A \in \mathcal{F}$, $B \in \mathcal{F}$ և $P(B) > 0$: A պատահույթի պայմանական հավանականություն՝ $P(A | B)$, այն պայմանով, որ իրականացվել է B պատահույթը, կոչվում է A և B պատահույթների համատեղ իրականացման հավանականության հարաբերությունը B պատահույթի հավանականությանը՝

$$P(A | B) = \frac{P(AB)}{P(B)}:$$

Հատկություններ:

$$1. \quad P(A | B) = \frac{P(AB)}{P(B)} \geq 0,$$

$$2. \quad \text{Եթե } B \subseteq A, \text{ ապա } P(A | B) = \frac{P(AB)}{P(B)} = \frac{P(B)}{P(B)} = 1,$$

$$3. \quad \text{Եթե } A_1, A_2, \dots \text{ պատահույթները զույգ առ զույգ անհամա-}$$

տեղելի են, ապա $P(\bigcup_{n=1}^{\infty} A_n | B) = \sum_{n=1}^{\infty} P(A_n | B)$:

Առաջին երկու հատկություններն ակնհայտ են, ապացուցենք երրորդը: Ունենք

$$P\left(\bigcup_{n=1}^{\infty} A_n | B\right) = \frac{P\left(\bigcup_{n=1}^{\infty} A_n \cap B\right)}{P(B)} = \frac{P\left(\bigcup_{n=1}^{\infty} (A_n B)\right)}{P(B)}:$$

Օգտվելով հաշվելի ադիտիվության հատկությունից՝ կստանանք՝

$$\frac{P\left(\bigcup_{n=1}^{\infty} (A_n B)\right)}{P(B)} = \frac{\sum_{n=1}^{\infty} P(A_n B)}{P(B)} = \sum_{n=1}^{\infty} \frac{P(A_n B)}{P(B)} = \sum_{n=1}^{\infty} P(A_n | B):$$

Որոշ դեպքերում հնարավոր է լինում գտնել պայմանական հավանականությունը նույնիսկ $P(B) = 0$ պայմանով: Նկարագրենք դրանցից մեկը:

Դիտարկենք (Ω, \mathcal{F}, P) հավանականային տարածությունը, $A \in \mathcal{F}$, $B \in \mathcal{F}$ և $P(B) = 0$: Եթե գտնվի $B_1 \supset B_2 \supset B_3 \supset \dots$ այնպիսի հաջորդականություն, որ $\bigcap_{n=1}^{\infty} B_n = B$, $P(B_n) > 0$, $\forall n \geq 1$, և գոյություն ունենա

$$\lim_{n \rightarrow \infty} \frac{P(AB_n)}{P(B_n)} = \lim_{n \rightarrow \infty} P(A | B_n), \quad (3.2)$$

սահմանը, ապա բնական է այն անվանել A պատահույթի պայմանական հավանականություն՝ B -ի իրականացման պայմանով: Իսկապես, $P(B) = 0$ պայմանից հետևում է $P(AB) = 0$ պայմանը, ուստի $P(A | B) = \frac{P(AB)}{P(B)}$ -ն $\frac{0}{0}$ տիպի անորոշություն է: Այդ իսկ պատճառով

(3.2) սահմանի գոյությունը հնարավոր է:

Նշենք, որ (Ω, \mathcal{F}, P) -ում ֆիքսած B պատահույթի նկատմամբ որոշված պայմանական հավանականությունը թույլ է տալիս ներմուծել նոր հավանականային տարածություն՝ $(\Omega, \mathcal{F}, P(\circ | B))$: Վերջինիս հիմնավորման համար բավական է ստուգել հավանականության աքսիոմները: Աքսիոմներ 1 և 3-ը համընկնում են պայմանական հավանականության հատկություններին, իսկ աքսիոմ 2-ը բխում է հատկություն 2-ից $A = \Omega$ դեպքում:

§3.2. Պատահույթների անկախություն

Դիտարկենք (Ω, \mathcal{F}, P) հավանականային տարածությունը: Դիցուք $A \in \mathcal{F}$, $B \in \mathcal{F}$ և $P(A) > 0$, $P(B) > 0$: Համաձայն (3.1) բանաձևի

$$P(AB) = P(B) \cdot P(A | B) = P(A) \cdot P(B | A): \quad (3.3)$$

(3.3)-ը կոչվում է *բազմապարկման բանաձև*: Այն թույլ է տալիս կատարել հետևյալ ընդհանրացումը:

Ենթադրենք՝ A_1, A_2, \dots, A_n -ը պատահույթներ են, և $P(A_1 A_2 \dots A_n) > 0$: Այդ դեպքում՝

$$P(A_1 A_2 \dots A_n) = P(A_1) \cdot P(A_2 | A_1) \cdot P(A_3 | A_1 A_2) \cdot \dots \cdot P(A_n | A_1 \dots A_{n-1}):$$

Իսկապես, ցանկացած k -ի համար ($1 \leq k \leq n$) $A_1 A_2 \dots A_n \subseteq A_1 A_2 \dots A_k$, հետևաբար՝ $P(A_1 A_2 \dots A_k) > 0$:

Համաձայն (3.1) բանաձևի՝ հետևյալ հավասարությունների շղթան հիմնավորված է՝

$$\begin{aligned} P(A_1 A_2 \dots A_n) &= \frac{P(A_1 A_2 \dots A_n)}{P(A_1 A_2 \dots A_{n-1})} \cdot \frac{P(A_1 A_2 \dots A_{n-1})}{P(A_1 A_2 \dots A_{n-2})} \cdot \dots \cdot \frac{P(A_1 A_2)}{P(A_1)} \cdot P(A_1) = \\ &= P(A_n | A_1 A_2 \dots A_{n-1}) \cdot P(A_{n-1} | A_1 A_2 \dots A_{n-2}) \cdot \dots \cdot P(A_2 | A_1) \cdot P(A_1) = \\ &= P(A_1) \cdot P(A_2 | A_1) \cdot \dots \cdot P(A_n | A_1 A_2 \dots A_{n-1}) : \end{aligned}$$

Բնական է A և B պատահույթները անվանել *անկախ*, եթե դրանցից որևէ մեկի իրականացումը չի ազդում մյուսի իրականացման վրա: Եթե ենթադրենք, որ $P(A) > 0$ և $P(B) > 0$, ապա այդ փաստը կարելի է ձևակերպել հետևյալ հավասարություններով՝

$$P(A | B) = P(A), \quad P(B | A) = P(B) : \quad (3.4)$$

Համեմատելով (3.3) և (3.4) բանաձևերը՝ ստանում ենք՝

$$P(AB) = P(A) \cdot P(B) :$$

Ընդհանուր դեպքում այս հավասարությունը կարելի է ընդունել որպես պատահույթների անկախության սահմանում:

Սահմանում 2.2 : A և B պատահույթները կոչվում են *անկախ*, եթե

$$P(AB) = P(A) \cdot P(B) : \quad (3.5)$$

Սահմանումից բխում է, որ $\Omega \setminus (\emptyset)$ պատահույթը և ցանկացած A պատահույթ անկախ են:

Հատկություն 1 : Եթե A և B պատահույթները անկախ են, ապա անկախ են նաև \bar{A} և B պատահույթները:

$$\begin{aligned} \text{Իրոք, ունենք } P(B) &= P((AB) \cup \bar{A}B) = P(AB) + P(\bar{A}B), \text{ որտեղից} \\ P(\bar{A}B) &= P(B) - P(AB) = P(B) - P(A)P(B) = P(B)(1 - P(A)) = P(B)P(\bar{A}) : \end{aligned}$$

Հատկություն 2 : Եթե A և B_1 , A և B_2 պատահույթներն անկախ են, B_1 և B_2 պատահույթները անհամատեղելի են, ապա A և $B_1 \cup B_2$ պատահույթներն անկախ են:

Իրոք՝

$$\begin{aligned} P[A(B_1 \cup B_2)] &= P(A B_1 \cup A B_2) = P(A B_1) + P(A B_2) = \\ &= P(A)P(B_1) + P(A)P(B_2) = P(A) \cdot [P(B_1) + P(B_2)] = P(A) \cdot P(B_1 \cup B_2): \end{aligned}$$

Հատկություն 2-ում B_1 և B_2 պատահականության անհամատեղելիությունը էական է A և $B_1 \cup B_2$ պատահականության անկախության համար: Իսկապես, եթե $B_1 B_2 \neq \emptyset$, ապա A և $B_1 \cup B_2$ պատահականությունները կարող են լինել կախյալ:

Օրինակ 1: Դիտարկենք քառանիստ, որի նիստերը համարակալված են 1, 2, 3, 4 թվանշաններով և ներկված են հետևյալ ձևով. 1, 2 և 3 նիստերը ներկված են համապատասխանաբար կարմիր, դեղին և կանաչ գույներով, իսկ նիստ 4-ը բոլոր երեք գույներով: Պատահականորեն ընտրում ենք քառանիստի որևէ նիստ: Դիցուք A , B_1 և B_2 պատահականությունները այն են, որ ընտրված նիստի վրա առկա են համապատասխանաբար կարմիր, դեղին և կանաչ գույները: Ունենք

$$\Omega = \{\omega_1, \omega_2, \omega_3, \omega_4\},$$

որտեղ $\omega_i = \{ \text{ընտրված նիստը } i\text{-ն է} \}$, $i = \overline{1, 4}$; $P(\omega_i) = 1/4$:

Պարզ է, որ $A = \{\omega_1, \omega_4\}$, $B_1 = \{\omega_2, \omega_4\}$, $B_2 = \{\omega_3, \omega_4\}$:

Ակնհայտ է նաև, որ $P(AB_1) = P(AB_2) = P(\{\omega_4\}) = 1/4$, իսկ $P(A) \cdot P(B_1) = 1/2 \cdot 1/2 = 1/4$, $P(A) \cdot P(B_2) = 1/2 \cdot 1/2 = 1/4$, այսինքն՝ A և B_1 , A և B_2 զույգերը անկախ են (ընդ որում՝ $B_1 B_2 = \{\omega_4\} \neq \emptyset$); միաժամանակ՝

$$P\{A(B_1 \cup B_2)\} = P(\{\omega_4\}) = \frac{1}{4} \neq \frac{1}{2} \cdot \frac{3}{4} = P(A) \cdot P(B_1 \cup B_2):$$

Երկու պատահականության անկախության (զույգ առ զույգ անկախության) գաղափարը ընդհանրացվում է ցանկացած վերջավոր թվով պատահականությունների դեպքում:

Դիտարկենք A_1, A_2, A_3 պատահականությունները: (3.5) բանաձևի նմանությամբ երեք պատահականությունների անկախության սահմանումը, համաձայն

$$P(A_1 A_2 A_3) = P(A_1) \cdot P(A_2) \cdot P(A_3) \quad (3.6)$$

հավասարության, հիմնավորված չէ, քանի որ (3.6)-ը դեռ բավարար չէ A_1 և A_2 պատահականությունների անկախության համար: Դրանում կարելի է համոզվել՝ դիտարկելով հետևյալ օրինակը:

Օրինակ 2: Դիցուք $\Omega = \{\omega_1, \omega_2, \dots, \omega_8\}$, $P(\omega_k) = 1/8$, $k = \overline{1, 8}$: Նշանակենք $A_1 = \{\omega_1, \omega_2, \omega_3, \omega_8\}$, $A_2 = \{\omega_4, \omega_5, \omega_6, \omega_8\}$, $A_3 = \{\omega_5, \omega_6, \omega_7, \omega_8\}$: Ակնհայտ է, որ (3.6) հավասարությունը տեղի ունի, բայց

$$P(A_1 A_2) = \frac{1}{8} \neq \frac{1}{2} \cdot \frac{1}{2} = P(A_1) \cdot P(A_2),$$

այսինքն՝ A_1 և A_2 պատահույթների անկախ չեն:


Նկատի ունենալով այս հանգամանքը՝ բնական է ընդունել հետևյալ սահմանումը:

Սահմանում 2.2: A_1, A_2, \dots, A_n պատահույթները կանվանենք *անկախ՝ համախմբության մեջ*, եթե ցանկացած k -ի ($1 \leq k \leq n$) և i_1, i_2, \dots, i_k -ի ($1 \leq i_1 < i_2 < \dots < i_k \leq n$) համար տեղի ունի

$$P\left(\bigcap_{j=1}^k A_{i_j}\right) = \prod_{j=1}^k P(A_{i_j}) \quad (3.7)$$

հավասարությունը:

A_1, A_2, \dots, A_n պատահույթների համախմբության մեջ անկախությունից հետևում է նրանց զույգ առ զույգ անկախությունը: Հակառակը, ընդհանուր առմամբ, ասած, ճիշտ չէ, ինչը հաստատում է հետևյալ օրինակը:



Նկ. 3.1.

Օրինակ 3: Դիտարկենք քառանիստ, որի S գագաթից դուրս եկող կողերը համարակալված են 1, 2, 3 թվանշաններով: S գագաթով յուրաքանչյուր նիստի վրա ընտրենք կոնտուրը շրջանցող ուղղություն (ժամսլաքի կամ հակառակ ուղղությունը.)

$1/2$ հավանականությամբ: Նշանակենք A_i -ով քառանիստի երկու նիստերի ընդհանուր i -րդ ($i = \overline{1, 3}$) կողը շրջանցող ուղղությունների համընկնելու պատահույթը: Դժվար չէ նկատել, որ

$$P(A_i) = \frac{1}{2} \quad (i = 1, 2, 3), \quad P(A_i \cap A_j) = \frac{1}{4}, \quad i \neq j \quad \text{և} \quad P(A_1 A_2 A_3) = 0:$$

Դիտողություն 3.1: Չի կարելի նույնացնել պատահույթների *անկախության* և *անհամարեղելիության* գաղափարները: Ավելին,

երե A և B պատահականությունները անհամատեղելի են ($AB = \emptyset$) և $P(A) > 0$, $P(B) > 0$, ապա A -ն և B -ն անկախ չեն, որը հետևում է (3.5)-ից:

Ասվածը երեք պատահականությունների համար ցուցադրված է օրինակ 3-ում: Պատահականությունները անհամատեղելի են, բայց անկախ չեն համախմբության մեջ:

§3.3. Լրիվ հավանականության և Բայեսի բանաձևերը

Դիցուք A -ն որևէ պատահականություն է, իսկ B_1, B_2, \dots, B_n -ը զույգ առ զույգ անհամատեղելի պատահականությունների այնպիսի հաջորդականություն, որ $A \subseteq \bigcup_{k=1}^n B_k$ և $P(B_k) > 0$, $k = \overline{1, n}$:

Թեորեմ 3.1: *Տեղի ունի, այսպես կոչված, լրիվ հավանականության բանաձևը՝*

$$P(A) = \sum_{k=1}^n P(B_k)P(A | B_k): \quad (3.8)$$

Ապացույց: Նկատենք, որ $A = \bigcup_{k=1}^n AB_k$, որտեղ AB_1, AB_2, \dots, AB_n պատահականությունները զույգ առ զույգ անհամատեղելի են: Վերջավոր ադիտիվության հատկությունից հետևում է, որ

$$P(A) = P\left(\bigcup_{k=1}^n AB_k\right) = \sum_{k=1}^n P(AB_k): \quad (3.9)$$

(3.8)-ը ստանալու համար բավական է (3.9)-ի աջ մասի նկատմամբ կիրառել հավանականությունների բազմապատկման բանաձևը: \square

Օգտվելով հաշվելի ադիտիվության հատկությունից՝ (3.8) բանաձևը կարելի է տարածել հաշվելի թվով զույգ առ զույգ անհամատեղելի $B_1, B_2, \dots, B_n, \dots$ պատահականությունների վրա, որոնց համար $A \subseteq \bigcup_{k=1}^{\infty} B_k$ և $P(B_k) > 0$, $k \geq 1$.

$$P(A) = \sum_{k=1}^{\infty} P(B_k)P(A | B_k): \quad (3.10)$$

Թեորեմ 3.2: *Եթե նախորդ թեորեմի պայմաններում $P(A) > 0$, ապա տեղի ունեն, այսպես կոչված, Բայեսի բանաձևերը՝*

$$P(B_k | A) = \frac{P(B_k)P(A | B_k)}{\sum_{k=1}^n P(B_k)P(A | B_k)}, \quad 1 \leq k \leq n: \quad (3.11)$$

Ապացույց: Համաձայն պայմանական հավանականության սահմանման և լրիվ հավանականության բանաձևի, կստանանք՝

$$P(B_k | A) = \frac{P(B_k \cap A)}{P(A)} = \frac{P(B_k)P(A | B_k)}{\sum_{k=1}^n P(B_k)P(A | B_k)}: \quad \square$$

Դիտողություն 3.2: Լրիվ հավանականության և Բայեսի բանաձևերը մասնավորապես տեղի ունեն այն դեպքում, երբ B_1, B_2, \dots, B_n պատահույթները կազմում են լրիվ խումբ, և այդ դեպքում ընդունված է B_1, B_2, \dots, B_n անվանել *հիպոթեզներ*:

Օրինակ 1: Լամպեր պատրաստող գործարանում առաջին, երկրորդ և երրորդ մեքենաները համապատասխանորեն արտադրում են ամբողջ արտադրանքի 25, 35 և 40%-ը: Արտադրանքում խոտանը կազմում է համապատասխանաբար 5, 4 և 2: Որոշել՝

ա) հավանականությունը, որ արտադրանքից պատահականորեն վերցված լամպը խոտանված է,

բ) հավանականությունը, որ արտադրանքից պատահականորեն վերցված լամպը պատրաստված է երկրորդ մեքենայով, եթե հայտնի է որ այն խոտանված է:

Լուծում: ա) Ներմուծենք B_1, B_2, B_3 հիպոթեզները, որտեղ՝
 $B_i = \{ \text{արտադրանքից պատահականորեն վերցված լամպը պատրաստված է } i - \text{րդ մեքենայով} \}, i = \overline{1, 3}:$

Պարզ է, որ՝
 $P(B_1) = 25/100 = 0,25; P(B_2) = 35/100 = 0,35; P(B_3) = 40/100 = 0,4;$

Դիցուք $A = \{ \text{արտադրանքից պատահականորեն վերցված լամպը խոտանված է} \}$: Համաձայն խնդրի պայմանների՝

$$P(A | B_1) = 0,05; P(A | B_2) = 0,04; P(A | B_3) = 0,02:$$

Կիրառելով լրիվ հավանականության բանաձևը, կստանանք՝

$$P(A) = \sum_{i=1}^3 P(B_i) \cdot P(A | B_i) = 0,0345: \quad (3.12)$$

բ) Համաձայն Բայեսի բանաձևերի և (3.12)-ի՝ կունենանք՝

$$P(B_2 | A) = \frac{P(B_2)P(A | B_2)}{\sum_{i=1}^3 P(B_i)P(A | B_i)} = \frac{0,35 \cdot 0,04}{0,0345} = \frac{140}{345}:$$

Գ Լ ՈՒ Խ 4

ԲԵՌՆՈՒԼԻԻ ՍԽԵՄԱՆ

§4.1. Բեռնուլիի բանաձևը

Սահմանում 4.1: Համախմբության մեջ անկախ փորձերի հաջորդականությունը, որոնցից յուրաքանչյուրում հնարավոր են երկու ելքեր, կոչվում է *Բեռնուլիի սխեմա* կամ Բեռնուլիի փորձեր:

Բեռնուլիի սխեմայում յուրաքանչյուր փորձի հնարավոր երկու ելքերը կանվանենք «հաջողություն» և «անհաջողություն», ընդ որում, հաջողությունը յուրաքանչյուր փորձում տեղի է ունենում $p \in (0,1)$ հավանականությամբ, իսկ անհաջողությունը՝ $q = 1 - p$:

Նշանակենք μ_n -ով Բեռնուլիի n փորձերում հաջողությունների հանդես գալու թիվը: Պարզ է, որ այս մեծությունը կարող է ընդունել 0-ից մինչև n բոլոր ամբողջ արժեքները:

Թեորեմ 4.1 (Բեռնուլիի բանաձև): *Ցանկացած $k = 0, 1, 2, \dots, n$ թվի համար տեղի ունի*

$$P(\mu_n = k) = C_n^k p^k q^{n-k} : \quad (4.1)$$

Ապացույց: $A = \{\mu_n = k\}$ պատահույթը նշանակում է, որ Բեռնուլիի n փորձերում հաջողությունը տեղի է ունեցել ճիշտ k անգամ: Դիտարկենք այս պատահույթին նպաստավոր տարրական ելքերից մեկը՝

$$A_1 = (\underbrace{h, h, \dots, h}_k, \underbrace{u, u, \dots, u}_{n-k}),$$

երբ առաջին k փորձերը ավարտվել են հաջողությամբ, իսկ մնացածը՝ անհաջողությամբ: Քանի որ փորձերը անկախ են, ապա այս տարրական ելքի հավանականությունը հավասար է $p^k q^{n-k}$: Նկատենք, որ A -ին նպաստավոր այլ տարրական ելքեր տարբերվում են A_1 -ից միայն k հաջողությունների դիրքերով n հնարավոր տեղերում: Կոմ-

բինատոր բանաձևերից հայտնի է, որ k հաջողությունները n հնարավոր տեղերում կարելի է դասավորել C_n^k եղանակներով: Այսպիսով, A պատահույթը բաղկացած է C_n^k տարրական ելքերից, որոնցից յուրաքանչյուրի հավանականությունը հավասար է $p^k q^{n-k}$, հետևաբար՝

$$P(\mu_n = k) = P(A) = C_n^k p^k q^{n-k} : \quad \square$$

Սահմանում 4.2 : $\{C_n^k p^k q^{n-k}, k = 0, 1, \dots, n\}$ թվերի հաջորդականությունը կոչվում է հավանականությունների *բինոմիական* բաշխում:

Նշանակենք ν -ով Բեռնուլիի սխեմայում առաջին հաջող փորձի համարը:

Թեորեմ 4.2 : *Նավանականությունը, որ առաջին հաջողությունը տեղի կունենա k -րդ ($k \in \mathbb{N}$) փորձում, հավասար է՝*

$$P(\nu = k) = p q^{k-1} :$$

Ապացույց: Հավանականությունը, որ առաջին $k-1$ փորձերում տեղի կունենա անհաջողություն, իսկ վերջին k -րդում՝ հաջողություն, հավասար է՝

$$P(\nu = k) = P(\underbrace{u, u, \dots, u}_{k-1}, h) = p^k q^{n-k} : \quad \square$$

Սահմանում 4.3 : $\{p q^{k-1}, k = 0, 1, \dots, n\}$ թվերի հաջորդականությունը կոչվում է հավանականությունների *եքսպոնենցիալ* բաշխում:

§4.2. Անկախ փորձերի խնդրի ընդհանրացումը

Դիտարկենք անկախ փորձերի սխեմա՝ յուրաքանչյուր փորձում ոչ թե երկու, այլ մի քանի հնարավոր ելքերով:

Օրինակ 1 : Խաղոսկրը նետվում է 15 անգամ: Գտնել հավանականությունը, որ "3"-ը հանդես կգա ճիշտ տասը անգամ, իսկ "1"-ը՝ երեք:

Այս օրինակում խաղոսկրի նետման յուրաքանչյուր փորձում հնարավոր են երեք ելքեր.՝ "3"-ի, "1"-ի և ցանկացած այլ նիստի հանդես գալը: Հետևաբար, օգտագործել Բեռնուլիի բանաձևը հնարավոր չէ:

Դուրս բերենք համապատասխան բանաձև որոնելի հավանականությունը հաշվելու համար: Դիցուք յուրաքանչյուր փորձում հնարավոր են m ելքեր՝ A_1, A_2, \dots, A_m , ընդ որում, A_i պատահույթի հավանականությունն ամեն մի առանձին փորձում կախում չունի

փորձի համարից և հավասար է p_i -ի, որտեղ $p_1 + p_2 + \dots + p_m = 1$:
Նշանակենք $P(n_1, n_2, \dots, n_m)$ -ով հավանականությունը, որ n անկախ
փորձերում A_1 պատահույթը հանդես կգա n_1 անգամ, A_2 -ը՝ n_2
անգամ և վերջապես A_m -ը՝ n_m անգամ:

Թեորեմ 4.2: Յանկայաժ $n \in \mathbb{N}$ քնական թվի և n_1, n_2, \dots, n_m ոչ
բացասական ամբողջ թվերի համար, որոնց գումարը հավասար է
 n -ի, տեղի ունի

$$P(n_1, n_2, \dots, n_m) = \frac{n!}{n_1! \dots n_m!} p_1^{n_1} \cdot \dots \cdot p_m^{n_m}$$

քանանք:

Ապացույց: Դիտարկենք մեզ հետաքրքրող պատահույթին նպաս-
տավոր տարրական ելքերից մեկը, երբ, օրինակ, A_1 պատահույթը
հանդես է գալիս առաջին n_1 փորձերում, A_2 -ը՝ հետևյալ n_2 փորձերում,
և այլն, A_m -ը՝ վերջին n_m փորձերում.

$$(\underbrace{A_1, \dots, A_1}_{n_1}, \underbrace{A_2, \dots, A_2}_{n_2}, \underbrace{A_m, \dots, A_m}_{n_m}): \quad (4.2)$$

Այս պատահույթի իրականանալու հավանականությունը, համաձայն
անկախ պատահույթների բազմապատկման թեորեմի, հավասար է՝

$$p_1^{n_1} \cdot \dots \cdot p_m^{n_m} :$$

Նկատենք, որ ամեն մի այլ նպաստավոր ելք կտարբերվի (4.2)
մասնավոր դեպքից՝ միայն A_1, A_2, \dots, A_m ելքերի դիրքերով n հնարա-
վոր տեղերում: Այսպիսի ելքերի թիվը հավասար է n տեղերում n_1
հատ A_1 , n_2 հատ A_2 և այլ, n_m հատ A_m դասավորելու հնարավոր
եղանակների թվին, այսինքն՝

$$C_n^{n_1} \cdot C_{n-n_1}^{n_2} \cdot C_{n-n_1-n_2}^{n_3} \cdot \dots \cdot C_{n-n_1-\dots-n_{m-1}}^{n_m} = \frac{n!}{n_1! \dots n_m!} :$$

Այսպիսով, բոլոր նպաստավոր ելքերի քանակը $\frac{n!}{n_1! \dots n_m!}$ է, որոն-
ցից յուրաքանչյուրի իրականացման հավանականությունը նույնն է և
հավասար է $p_1^{n_1} \cdot \dots \cdot p_m^{n_m}$ -ի, հետևաբար, գումարման աքիսումի
համաձայն, կստանանք՝

$$P(n_1, n_2, \dots, n_m) = \frac{n!}{n_1! \dots n_m!} p_1^{n_1} \cdot \dots \cdot p_m^{n_m} : \quad \square$$

Այժմ կարող ենք վերադառնալ օրինակ 1-ի լուծմանը: Հավանակա-

նությունը, որ խաղոսկրի 15 նետումների արդյունքում կստանանք տասը "3", երեք հատ "1" և երկու այլ միավորներ, հավասար է՝

$$P(10, 3, 2) = \frac{15!}{10! 3! 2!} \cdot \left(\frac{1}{6}\right)^{10} \cdot \left(\frac{1}{6}\right)^3 \cdot \left(\frac{4}{6}\right)^2,$$

քանի որ յուրաքանչյուր փորձում "3"-ի և "1"-ի երևան գալու հավանականությունը $1/6$ է, իսկ այլ միավորներինը՝ $4/6$:

§4.3. Պուասոնի թեորեմը Բեռնուլիի սխեմայի համար

Հավանականությունների հաշվումը (4.1) բանաձևով զգալիորեն դժվարանում է n -ի մեծացման դեպքում, կապված բանաձևում ֆակտորիալների առկայության հետ: Ընդ որում, եթե p -ն մնում է անփոփոխ, ապա ցանկացած թվով հաջողություններ ստանալու հավանականությունը փոքրանում է՝ ձգտելով զրոյի: Անհրաժեշտ է, որ հաջողության հավանականությունը՝ $p = p_n$, փոքրանա n -ի մեծացմանը զուգընթաց: Բայց, համաձայն Բեռնուլիի սխեմայի սահմանմանը, հաջողության p հավանականությունը փորձից փորձ փոփոխվել չի կարող: Հետևաբար, կոիտարկենք, այսպես կոչված, անկախ փորձերի «սերիաների սխեման»։ Եթե կատարվում է մեկ փորձ, ապա հաջողության հավանականությունը հավասար է p_1 -ի, եթե փորձերը երկուսն են, ապա հաջողության հավանականությունը յուրաքանչյուր փորձում հավասար է p_2 -ի և այլն: Այսինքն՝ հաջողության հավանականությունը փոփոխվում է ոչ թե մեկ սերիայի ներսում, այլ սերիայից սերիա, երբ փոխվում է ընդհանուր փորձերի թիվը:

Թեորեմ 4.3 (Պուասոնի թեորեմ): Եթե $n \rightarrow \infty$ և $p_n \rightarrow 0$, այնպես, որ $np_n \rightarrow \lambda > 0$, ապա հավանականությունը, որ հաջողության p_n հավանականությամբ Բեռնուլիի սխեմայի n փորձերում հաջողությունը տեղի կունենա m անգամ ձգտում է $e^{-\lambda} \frac{\lambda^m}{m!}$ սահմանին՝

$$P(\mu_n = m) = C_n^m p_n^m (1 - p_n)^{n-m} \xrightarrow{n \rightarrow \infty} \frac{\lambda^m}{m!} e^{-\lambda} :$$

Ապացույց: Նշանակենք $\lambda_n = np_n$: Ըստ թեորեմի պայմանների՝ $\lambda_n \rightarrow \lambda > 0$: Համաձայն Բեռնուլիի (4.1) բանաձևի՝

$$\begin{aligned}
P(\mu_n = m) &= \frac{n!}{m!(n-m)!} p_n^m (1-p_n)^{n-m} = \\
&= \frac{n(n-1)(n-2)\dots(n-m+1)}{m!} \cdot \frac{(np_n)^m}{n^m} \cdot (1-p_n)^{n-m} = \\
&= \frac{(np_n)^m}{m!} \cdot \frac{n(n-1)(n-2)\dots(n-(m-1))}{n \cdot n \cdot n \cdot \dots \cdot n} \cdot (1-p_n)^{n-m} = \\
&= \frac{\lambda_n^m}{m!} (1-p)^{n-m} \prod_{k=1}^{m-1} \left(1 - \frac{k}{n}\right) : \tag{4.3}
\end{aligned}$$

Եթե հաշվի առնենք, որ $n \rightarrow \infty$, $\lambda_n = np_n \rightarrow \lambda$ և

$$(1-p_n)^{n-m} = \frac{(1-p)^n}{(1-p)^m} = \frac{(1-\frac{\lambda_n}{n})^n}{(1-\frac{\lambda_n}{n})^m} \xrightarrow{n \rightarrow \infty} \frac{e^{-\lambda}}{1} = e^{-\lambda},$$

այսպես, (4.3)-ում անցնելով սահմանի, երբ $n \rightarrow \infty$, կստանանք հետևյալ բանաձևը՝

$$P(\mu_n = m) \rightarrow \frac{\lambda^m}{m!} e^{-\lambda} : \quad \square$$

Սահմանում 4.3 : $\left\{ \frac{\lambda^k}{k!} e^{-\lambda}, k = 0, 1, \dots, \right\}$ թվերի հաջորդականութ-

յունը կոչվում է λ պարամետրով *Պուասոնի* բաշխում:

Օրինակ 1: Հաշվել հաջողության 0,003 հավանականությամբ Բեռնուլիի սխեմայի հազար փորձերում 7-ից ոչ պակաս հաջողություններ ստանալու հավանականությունը:

Լուծում: Եթե օգտվենք Բեռնուլիի բանաձևից, այս պատահույթի հավանականությունը կարելի է հաշվել հետևյալ երկու բանաձևերով՝

$$\sum_{k=7}^{1000} C_{1000}^k (0,003)^k (0,007)^{1000-k} = 1 - \sum_{k=0}^6 C_{1000}^k (0,003)^k (0,007)^{1000-k} :$$

Սակայն առնչություններից յուրաքանչյուրում հաշվարկները բավականին բարդ են: Օգտվելով Պուասոնի թեորեմից, կարող ենք հաշվել որոնելի հավանականության մոտավոր արժեքը: Քանի որ $n = 1000$, իսկ $p_n = 0,003$, այսպես, վերցնելով $\lambda = np_n = 3$, ստանում ենք հետևյալ մոտավոր բանաձևը՝

$$1 - \sum_{k=0}^6 C_{1000}^k (0,003)^k (0,007)^{1000-k} \approx 1 - \sum_{k=0}^6 \frac{3^k}{k!} e^{-3} \approx 0,034 : \quad (4.4)$$

Մնում է միայն պարզել, թե արդյոք $n = 1000$ -ը բավականաչափ մեծ, իսկ $p_n = 0,003$ -ը բավականաչափ փոքր է, որպեսզի ստույգ հավանականությունը փոխարինվի մոտավոր արժեքով: Դրա համար պետք է կարողանալ գնահատել այս երկու հավանականությունների տարբերությունը:

Թեորեմ 4.3 (Պուասոնի ճշգրտված թեորեմը): *Դիցուք A -ն n -ի բացասական ամբողջ թվերի կամայական հաջորդականություն է, μ_n -ը՝ p հավանականությամբ Բեռնուլիի n փորձերում հաջողությունների հանդես գալու թիվը, իսկ $\lambda = np$: Տեղի ունի հետևյալ անհավասարությունը՝*

$$\left| P(\mu_n \in A) - \sum_{m \in A} \frac{\lambda^m}{m!} e^{-\lambda} \right| = \left| \sum_{m \in A} C_n^m p^m (1-p)^{n-m} - \sum_{m \in A} \frac{\lambda^m}{m!} e^{-\lambda} \right| \leq \min(p, np^2) :$$

Օգտվելով այս թեորեմից, որոշենք (4.4) բանաձևում առկա սխալը՝

$$|P(\mu_n \geq 7) - 0,034| \leq \min(0,003; 0,009) = 0,003 :$$

§5.1. Պատահական մեծություններ

Պատահական ելքերով փորձերի արդյունքների նկարագրման համար հաճախ նպատակահարմար է որակական բնութագրիչներից՝ պատահականություններից, անցում կատարել քանակական բնութագրիչների: Այս մոտեցումը կատարվում է հավանականությունների տեսության հիմնական հասկացություններից մեկի՝ *պարահական մեծության* միջոցով: Իրականում փորձի արդյունքները միշտ կարելի է ներկայացնել մեկ կամ մի քանի թվային տվյալների միջոցով: Այլ կերպ ասած, փորձի յուրաքանչյուր տարրական ելք հնարավոր է համապատասխանեցնել որևէ իրական թվի և գործողությունները կատարել միայն թվերով:

Դիցուք (Ω, \mathcal{F}, P) -ն կամայական հավանականային տարածություն է:

Սահմանում 5.1 : $\xi : \Omega \rightarrow \mathbb{R}$ ֆունկցիան կոչվում է *պարահական մեծություն*, եթե ցանկացած $B \in \mathcal{B}(\mathbb{R})$ բորելյան բազմության համար $\xi^{-1}(B)$ բազմությունը պատահալիք է, այսինքն՝ պատկանում է \mathcal{F} σ -հանրահաշվին:

$\xi^{-1}(B) = \{\omega : \xi(\omega) \in B\}$ բազմությունը, որը կազմված է այն ω տարրական ելքերից, որոնց համար $\xi(\omega)$ պատկանում է B -ին, կոչվում է B բազմության *լրիվ նախապարկեր*:

Դիտողություն: Ընդհանրապես, եթե f -ը X բազմությունից Y արտապատկերող ֆունկցիա է, իսկ \mathcal{F} -ը և \mathcal{G} -ն համապատասխանաբար X -ի և Y -ի ենթաբազմությունների σ -հանրահաշիվներն են, ապա f ֆունկցիան կոչվում է *չափելի*, եթե ցանկացած $B \in \mathcal{G}$ բազմության համար $f^{-1}(B)$ նախապատկերը պատկանում է \mathcal{F} -ին:

Այսպիսով, պատահական մեծությունը (Ω, \mathcal{F}) չափելի բազմությունը արտապատկերում է $(\mathbb{R}, \mathcal{B}(\mathbb{R}))$ չափելի տարածության վրա: Չափելիության պայմանը պատահական մեծության սահմանման մեջ շատ կարևոր է հետևյալ պատճառով: Եթե (Ω, \mathcal{F}) -ի վրա որոշված է P հավանականություն, ապա իմաստ ունի խոսել $\{\omega : \xi(\omega) \in B\}$ պատահույթի հավանականության մասին: Այդ իսկ պատճառով $\forall B \in \mathcal{B}(\mathbb{R})$ -ի համար ξ պատահական մեծությունը որոշում է

$$P_\xi(B) = P\{\omega : \xi(\omega) \in B\}$$

հավանականությունը և հավանականային $(\Omega, \mathcal{B}(\mathbb{R}), P_\xi)$ տարածությունը:

Սահմանում 5.1-ում կարելի էր պահանջել, որ պատահույթ լինի ցանկացած միջակայք՝ $\{\omega : \xi(\omega) \in (a, b)\} \in \mathcal{F}$, կամ ցանկացած կիսամիջակայք՝ $\{\omega : \xi(\omega) < x\} \in \mathcal{F}$:

Սահմանում 5.2: $\xi : \Omega \rightarrow \mathbb{R}$ ֆունկցիան կոչվում է *պատահական մեծություն*, եթե ցանկացած $a < b$ իրական թվերի համար $\{\omega : \xi(\omega) \in (a, b)\}$ բազմությունը պատահույթ է, այսինքն՝ պատկանում է \mathcal{F} σ -հանրահաշվին:

Թեորեմ 5.1: Պատահական մեծության 5.1 և 5.2 սահմանումները համարժեք են:

Ապացույց: Եթե ξ -ն պատահական մեծություն է սահմանում 5.1-ի իմաստով, ապա այն պատահական մեծություն է նաև սահմանում 5.2-ի իմաստով, քանի որ ցանկացած (a, b) միջակայք բորելյան բազմություն է:

Այժմ ցույց տանք, որ ճիշտ է նաև հակառակ պնդումը: Դիցուք ցանկացած $B = (a, b)$ միջակայքի համար $\xi^{-1}(B) \in \mathcal{F}$: Պիտի ցույց տանք, որ նույնը ճիշտ է նաև կամայական բորելյան բազմության համար: Դիտարկենք իրական առանցքի այն B ենթաբազմությունների համակարգը, որոնց նախապատկերները պատահույթ են՝ $\mathcal{A} = \{B \subseteq \mathbb{R} : \xi^{-1}(B) \in \mathcal{F}\}$: Համաձայն սահմանման՝ $B \in \mathcal{A}$ այն և միայն այն դեպքում, երբ $\xi^{-1}(B) \in \mathcal{F}$: Պարզ է, որ \mathcal{A} -ն արդեն պարունակում է բոլոր (a, b) միջակայքերը: Ցույց տանք, որ \mathcal{A} -ն σ -հանրահաշիվ է:

1. Ցույց տանք, որ $\mathbb{R} \in \mathcal{A}$: Քանի, որ $\xi^{-1}(\mathbb{R}) = \Omega$, ապա $\mathbb{R} \in \mathcal{A}$:

2. Ցույց տանք, որ ցանկացած $B \in \mathcal{A}$ բազմության համար $\bar{B} \in \mathcal{A}$: Քանի որ $B \in \mathcal{A}$, ապա $\xi^{-1}(B) \in \mathcal{F}$, հետևաբար՝

$$\xi^{-1}(\bar{B}) = \{\omega : \xi(\omega) \notin B\} = \Omega \setminus \{\omega : \xi(\omega) \in B\} = \Omega \setminus \xi^{-1}(B) \in \mathcal{F}:$$

3. Այժմ համոզվենք, որ եթե $B_1, B_2, \dots \in \mathcal{A}$, ապա $B_1 \cup B_2 \cup \dots \in \mathcal{A}$: Քանի որ $B_i \in \mathcal{A}$, ապա $\xi^{-1}(B_i) \in \mathcal{F}$, $i \geq 1$: Մյուս կողմից, եթե հաշվի առնենք, որ \mathcal{F} -ը σ -հանրահաշիվ է, ապա կստանանք՝

$$\xi^{-1}\left(\bigcup_{i=1}^{\infty} B_i\right) = \{\omega : \xi(\omega) \in \bigcup_{i=1}^{\infty} B_i\} = \bigcup_{i=1}^{\infty} \{\omega : \xi(\omega) \in B_i\} = \bigcup_{i=1}^{\infty} \xi^{-1}(B_i) \in \mathcal{F}:$$

Այսպիսով ապացուցեցինք, որ \mathcal{A} -ն σ -հանրահաշիվ է և պարունակում է (a, b) տիպի բոլոր միջակայքերը: Մյուս կողմից՝ հայտնի է, որ $\mathcal{B}(\mathbb{R})$ -ը (a, b) տիպի բոլոր միջակայքերը պարունակող մինիմալ σ -հանրահաշիվն է, հետևաբար՝ $\mathcal{B}(\mathbb{R}) \subseteq \mathcal{A}$: \square

Օրինակ 1: Կետը պատահականորեն նետվում է $[a, b]$ հատվածի վրա: Ունենք $\Omega = [a, b]$, $\mathcal{F} = \{B \cap [a, b] : B \in \mathcal{B}\}$: Նետված կետի կոորդինատը՝ $\omega \in [a, b]$, նշանակենք $\xi(\omega)$ -ով: Այս դեպքում կունենանք՝

$$\{\omega : \xi(\omega) < x\} = \begin{cases} \emptyset, & x \leq a, \\ [a, x), & a < x \leq b, \\ \Omega, & x > b: \end{cases}$$

Հետևաբար՝ $\xi(\omega) = \omega$ -ն պատահական մեծություն է:

Օրինակ 2: Դիցուք (Ω, \mathcal{F}, P) -ն հավանականային տարածություն է, իսկ $J_A(\omega)$ -ն $A \in \mathcal{F}$ պատահույթի ինդիկատորն է: Քանի որ

$$\{\omega : J_A(\omega) < x\} = \begin{cases} \emptyset, & x \leq 0, \\ \bar{A}, & 0 < x \leq 1, \\ \Omega, & x > 1, \end{cases}$$

ապա $J_A(\omega)$ -ն պատահական մեծություն է:

Հաջորդ պարագրաֆում կձանոթանանք հիմնական հասկացություններից մեկին՝ պատահական մեծության «բաշխման» հետ և կնկարագրենք պատահական մեծությունների բաշխումների տարբեր տիպեր:

§5.2. Պատահական մեծությունների բաշխումը

Սահմանում 5.3: ξ պատահական մեծության բաշխում կամ բաշխման օրենք է կոչվում \mathbb{R} -ի բորելյան ենթաբազմությունների վրա տրված $P(\xi \in B)$ հավանականային չափը:

Պատահական մեծությունների բաշխումը կարելի է մեկնաբանել որպես համապատասխանություն $B \in \mathcal{B}(\mathbb{R})$ բազմությունների և $P(\xi \in B)$ հավանականությունների միջև: Կախված նրանից, թե ինչ տիպի բազմությունների վրա է կենտրոնացված ամբողջ հավանականային զանգվածը, առանձնացվում են պատահական մեծությունների բաշխումների ընդհանուր (դիսկրետ), անընդհանուր և սինգուլյար տիպեր:

Սահմանում 5.4: Կասենք, որ ξ պատահական մեծությունն ունի դիսկրետ բաշխում, եթե գոյություն ունի x_1, x_2, \dots թվերի այնպիսի վերջավոր կամ հաշվելի հավաք, որ

$$P(\xi = x_i) > 0 \quad \text{բոլոր } i\text{-երի համար և } \sum_{i=1}^{\infty} P(\xi = x_i) = 1:$$

Այսպիսով, $\xi = \xi(\omega)$ պատահական մեծությունը կոչվում է դիսկրետ, եթե այն ընդունում է վերջավոր կամ հաշվելի թվով արժեքներ: Եթե ξ պատահական մեծությունն ունի դիսկրետ բաշխում, ապա ցանկացած $B \in \mathcal{B}(\mathbb{R})$ բազմության համար

$$P(\xi \in B) = \sum_{i: x_i \in B} P(\xi = x_i):$$

Դիսկրետ պատահական մեծության բաշխումը հարմար է ներկայացնել նրա բոլոր հնարավոր արժեքների և համապատասխան հավանականություններից կազմված հետևյալ աղյուսակով.

ξ	x_1	x_2	\dots	x_n	\dots
P	p_1	p_2	\dots	p_n	\dots

Սահմանում 5.5: Կասենք, որ ξ պատահական մեծությունն ունի բացարձակ անընդհանուր բաշխում, եթե գոյություն ունի այնպիսի $f_\xi(x)$ ոչ բացասական ֆունկցիա, որ ցանկացած $B \in \mathcal{B}$ բորելյան բազմության համար տեղի ունի

$$P(\xi \in B) = \int_B f_\xi(x) dx:$$

հավասարությունը: $f_\xi(x)$ ֆունկցիան կոչվում է ξ պատահական մեծության բաշխման խտություն:

Դիտողություն: Վերոհիշյալ ինտեգրալը ոչ թե Ռիմանի, այլ Լեբեգի ինտեգրալ է: Եթե ընթերցողը ծանոթ չէ Լեբեգի ինտեգրալին, ապա լիովին բավական է այն պատկերացնել որպես B բազմության վրա ենթահինտեգրալային ֆունկցիայի գրաֆիկով սահմանափակված պատկերի մակերես: Ընդ որում, զրոյական Լեբեգի չափ ունեցող B բազմության համար այդ մակերեսը հավասար է զրոյի: Նկատենք, որ ցանկացած ֆունկցիա, որը տարբերվում է $f_{\xi}(x)$ -ից միայն վերջավոր կամ հաշվելի թվով կետերում (կամ զրոյական Լեբեգի չափ ունեցող բազմության վրա), կհանդիսանա խտություն նույն բաշխման համար, քանի որ ինտեգրալը չի փոխվի ենթահինտեգրալային ֆունկցիայի փոփոխումից զրոյական չափի բազմության վրա:

Այս սահմանումը համարժեք է հետևյալին:

Թեորեմ 5.2: *Բաշխման խտությունն օժտված է հետևյալ հատկություններով՝*

$$(f1) \quad f_{\xi}(x) \geq 0 \quad \text{ցանկացած } x\text{-ի համար}; \quad (f2) \quad \int_{-\infty}^{\infty} f_{\xi}(x) = 1 :$$

Ապացույց: Հատկություն (f1)-ն անմիջապես բխում է խտության սահմանումից: Հատկություն (f2)-ն ապացուցելու համար սահմանում 5.5-ում որպես B բազմություն վերցնենք ամբողջ թվային ուղիղը. կստանանք՝

$$P(\xi \in \mathbb{R}) = 1 = \int_{-\infty}^{\infty} f_{\xi}(x) : \quad \square$$

Այս երկու հատկությունները լիովին բնորոշում են խտության ֆունկցիաների դասը:


Թեորեմ 5.3: *Եթե f ֆունկցիան բավարարում է (f1) և (f2) հատկություններին, ապա գոյություն ունի հավանականային տարածություն և այդ տարածության վրա որոշված ξ պատահական մեծություն, որի համար f -ը բաշխման խտություն է:*

Ապացույց: Դիցուք Ω -ն արբցիսների առանցքով և f ֆունկցիայի գրաֆիկով սահմանափակված է տիրույթ է: Համաձայն (f2)-ի՝ Ω -ի մակերեսը հավասար է 1-ի: Որպես \mathcal{F} վերցնենք Ω -ի բոլոր այն ենթաբազմությունների բազմությունը, իսկ որպես P հավանականություն՝ Լեբեգի չափը (մակերես) \mathcal{F} -ի բազմությունների վրա: Ենթադրենք՝ ξ

պատահական մեծությունը Ω տիրույթ նետած պատահական կետի արագիսն է: Այդ դեպքում ցանկացած $B \in \mathcal{B}(\mathbb{R})$ բազմության համար՝

$$P(\xi \in B) = \frac{S(D_B)}{S(\Omega)} = \int_B f(x) dx : \quad (5.1)$$

Այստեղ D_B տիրույթը խտության գրաֆիկի տակ ընկած B հիմքով կորագիծ սեղանն է (նկ 5.1): Համաձայն սահմանում 5.5-ի՝ (5.1) հավասարությունը նշանակում է, որ f -ը ξ մեծության բաշխման խտությունն է:



Նկ. 5.1.

Նշենք բացարձակ անընդհատ բաշխումների մի կարևոր հատկություն: \square

Թեորեմ 5.4: Եթե ξ պատահական մեծությունն ունի բացարձակ անընդհատ բաշխում, ապա $P(\xi = x) = 0$ ցանկացած $x \in \mathbb{R}$ -ի համար:

Ապացույցն անմիջապես բխում է սահմանում 5.5-ից և դրան հաջորդող դիտողությունից:

Առանձնացնենք բաշխումների մեկ այլ՝ եզակի դաս:

Սահմանում 5.6: Կասենք, որ ξ պատահական մեծությունն ունի **սինգուլյար** բաշխում, եթե գոյություն ունի գրոյական Լեբեգի չափ ունեցող այնպիսի B բորելյան բազմություն, որ $P(\xi \in B) = 1$, բայց $P(\xi = x) = 0$ ցանկացած $x \in B$ կետի համար:

Նշենք, որ B բազմությունը, որտեղ կենտրոնացված է ամբողջ բաշխումը, չի կարող բաղկացած լինել վերջավոր կամ հաշվելի թվով կետերից: Իրոք, եթե B -ն վերջավոր է կամ հաշվելի, ապա $P(\xi \in B) = \sum_{x_i \in B} P(\xi = x_i)$: Վերջին գումարը, որպես հաշվելի թվով գրոյների գումար, հավասար է գրոյի, ինչը հակասում է $P(\xi \in B) = 1$ ենթադրությանը:

Այսպիսով, ցանկացած սինգուլյար բաշխում կենտրոնացած է զրոյական Լեբեգի չափ ունեցող ոչ հաշվելի բազմության վրա: Այսպիսի բազմության օրինակ կարող է ծառայել Կանտորի բազմությունը:

§5.3. Բաշխման ֆունկցիան. նրա հատկությունները

Ինչպես տեսանք, ξ պատահական մեծության հավանականային կառուցվածքը լիովին նկարագրվում է $P(\xi \in B)$ հավանականությունների միջոցով, սակայն պատահական մեծության բաշխման օրենքի նմանատիպ նկարագրությունը այդքան էլ հարմար չէ, քանի որ չափազանց շատ բոլորի բազմություններ գոյություն ունեն: Ուստի հարց է ծագում. արդյո՞ք հնարավոր չէ սահմանափակվել՝ իմանալով հավանականությունները թվային ուղղի բազմությունների ավելի փոքր հավաքի դեպքում: Ակնհայտ է, որ դիսկրետ բաշխումները կարելի է նկարագրել բաշխման աղյուսակի, իսկ բացարձակ անընդհատ բաշխումները՝ բաշխման խտության միջոցով: Փորձենք գտնել ցանկացած տիպի բաշխում նկարագրելու ունիվերսալ եղանակ:

Պարզվում է, որ կամայական բաշխման համար, օրինակ, բավական է իմանալ հավանականությունները միայն $(-\infty, x)$ տեսքի անվերջ միջակայքերի համար:

Ստորև ներմուծվող *բաշխման ֆունկցիայի* գաղափարը տալիս է համարժեք նկարագրություն պատահական մեծության հավանականային կառուցվածքի մասին:

Սահմանում 5.7 : ξ պատահական մեծության հավանականությունների *բաշխման ֆունկցիա* է կոչվում $F_\xi(x) : \mathbb{R} \rightarrow [0, 1]$ ֆունկցիան, որը $\forall x \in \mathbb{R}$ թվի համար հավասար է ξ պատահական մեծության x -ից փոքր արժեք ընդունելու հավանականությանը՝

$$F_\xi(x) = P(\xi < x) = P\{\omega : \xi(\omega) < x\}, \quad \forall x \in \mathbb{R}: \quad (5.2)$$

Դժվար չէ նկատել, որ այսպես սահմանված բաշխման ֆունկցիան որոշված է կամայական պատահական մեծության համար և տալիս է սպառիչ տեղեկություններ վերջինիս մասին:

Թեորեմ 5.5: Յանկացած բաշխման ֆունկցիա օժտված է հետևյալ հիմնական հատկություններով.

(F1) մոնոտոնություն. եթե $x_1 \leq x_2$, ապա $F_\xi(x_1) \leq F_\xi(x_2)$;

(F2) գոյություն ունեն $\lim_{x \rightarrow -\infty} F_\xi(x) = 0$ և $\lim_{x \rightarrow +\infty} F_\xi(x) = 1$ սահմաններ;

(F3) ձախից անընդհատություն. $F_\xi(x_0 - 0) = \lim_{x \rightarrow x_0 - 0} F_\xi(x) = F_\xi(x_0)$:

Ապացույց (F1): Իսկապես, $x_1 \leq x_2$ պայմանից բխում է, որ $\{\omega : \xi(\omega) < x_1\} \subseteq \{\omega : \xi(\omega) < x_2\}$, հետևաբար՝

$$F_\xi(x_1) = P\{\omega : \xi(\omega) < x_1\} \leq P\{\omega : \xi(\omega) < x_2\} = F_\xi(x_2):$$

Ապացույց (F2): Սահմանափակվենք հավասարություններից մեկի ապացուցմամբ, քանի որ դրանց ապացույցները համանման են: Նշանակենք $B_n = \{\omega : \xi(\omega) \leq x_n\}$, $n = 1, 2, \dots$, որտեղ $x_n \downarrow -\infty$: Պարզ է, որ $B_1 \supseteq B_2 \supseteq B_3 \supseteq \dots$ և $\bigcap_{n=1}^{\infty} B_n = \emptyset$: Համաձայն անընդհատության արքիմի՝

$$\lim_{n \rightarrow \infty} F_\xi(x_n) = \lim_{n \rightarrow \infty} P(B_n) = P(\emptyset) = 0 :$$

Ապացույց (F3): Դիցուք x_n հաջորդականությունն աճում է, և $\lim_{n \rightarrow \infty} x_n = x_0$: Այդ դեպքում.

$$B_n = \{\omega : \xi(\omega) < x_n\} \subset B_{n+1} = \{\omega : \xi(\omega) < x_{n+1}\} \quad \text{և} \\ \bigcup_{n=1}^{\infty} B_n = B = \{\omega : \xi(\omega) < x_0\}:$$

Համաձայն անընդհատության արքիմի հետևանքի՝

$$\lim_{n \rightarrow \infty} P(B_n) = P(B)$$

կամ

$$\lim_{n \rightarrow \infty} F_\xi(x_n) = F_\xi(x_0) \Rightarrow F_\xi(x_0 - 0) = F_\xi(x_0): \quad \square$$

Եթե $F(x)$ ֆունկցիան բավարարում է 1-3 հատկությունները, ապա «կարելի է համարել», որ այն բաշխման ֆունկցիա է: Այս թերեմի պնդումը կրնադրվենք առանց ապացույցի:

Թեորեմ 5.6: Եթե $F(x)$ ֆունկցիան բավարարում է (F1)-(F3) հատկություններին, ապա գոյություն ունի (Ω, \mathcal{F}, P) հավանականության տարածություն, և նրա վրա որոշված $\xi = \xi(\omega)$ պատահական մեծություն այնպիսին, որ $F(x) = F_\xi(x)$:

Բացի թեորեմ 5.5-ում նշված հատկություններից՝ բաշխման ֆունկցիան օժտված է հետևյալ հատկություններով:

Թեորեմ 5.7: Ցանկացած ξ պատահական մեծության համար.

$$(1) \quad P(x_1 \leq \xi < x_2) = F_\xi(x_2) - F_\xi(x_1);$$

$$(2) \quad P(\xi = x) = F_\xi(x + 0) - F_\xi(x):$$

Ապացույց (1): Քանի որ

$$(\xi < x_2) = (x_1 \leq \xi < x_2) + (\xi < x_1),$$

ապա, համաձայն հավանականության ադիտիվության արքիմի՝

$$P(\xi < x_2) = P(x_1 \leq \xi < x_2) + P(\xi < x_1):$$

Այստեղից, հաշվի առնելով (5.2)-ը, կունենանք՝

$$P(x_1 \leq \xi < x_2) = F_\xi(x_2) - F_\xi(x_1):$$

Ապացույց (2): Համաձայն $\{x\} = \bigcap_{n=1}^{\infty} [x, x + 1/n)$ առնչության և անընդհատության արքիմի, կունենանք՝

$$P(\xi = x) = \lim_{n \rightarrow \infty} P(x \leq \xi < x + 1/n) =$$

$$= \lim_{n \rightarrow \infty} (F_\xi(x + 1/n) - F_\xi(x)) = F_\xi(x + 0) - F_\xi(x): \quad \square$$

Դիսկրետ պատահական մեծության բաշխման ֆունկցիան: Դիսկրետ բաշխման սահմանման համաձայն՝ բաշխման ֆունկցիան կարելի է գտնել բաշխման աղյուսակից հետևյալ կերպ՝

$$F_\xi(x) = P(\xi < x) = \sum_{k: x_k \leq x} P(\xi = x_k):$$

Պարզ է, որ այս դեպքում այն աստիճանաձև է և դրա խզման կետերն են x_1, x_2, \dots կետերը: Այս կետերում $F_\xi(x)$ ֆունկցիայի թռիչքի մեծությունը հավասար է պատահական մեծության համապատասխան արժեքն ընդունելու հավանականությանը՝

$$F_\xi(x_k + 0) - F_\xi(x_k) = P(\xi = x_k):$$

Բացարձակ անըդհատ պատահական մեծության բաշխման ֆունկցիան: Դիցուք ξ պատահական մեծությունն ունի բացարձակ անընդհատ բաշխում $f_\xi(x)$ խտությամբ: Այս դեպքում բաշխման ֆունկցիան խտության ֆունկցիայի միջոցով կարելի է գտնել հետևյալ կերպ՝

$$F_\xi(x) = P(\xi < x) = P(\xi \in (-\infty, x)) = \int_{-\infty}^x f_\xi(t) dt: \quad (5.3)$$

Հաճախ հենց այս ներկայացումն ընդունում են որպես բացարձակ անընդհատ բաշխման սահմանում, այսինքն, ասում են, որ ξ պատահական մեծությունն ունի բացարձակ անընդհատ բաշխում, եթե գոյություն ունի այնպիսի ոչ բացասական $f_{\xi}(x)$ ֆունկցիա, որ տեղի ունի (5.3) ներկայացումը:

Թեորեմ 5.8: *Եթե ξ պատահական մեծությունն ունի բացարձակ անընդհատ բաշխում, ապա.*

- (1) $F_{\xi}(x)$ -ն ամենուրեք անընդհատ է;
- (2) $f_{\xi}(x) = F'_{\xi}(x) = \frac{\partial}{\partial x} F_{\xi}(x)$;
- (3) $P(x_1 < \xi < x_2) = P(x_1 \leq \xi < x_2) = P(x_1 < \xi \leq x_2) = P(x_1 \leq \xi \leq x_2) = \int_{x_1}^{x_2} f_{\xi}(x) dx$:

Ապացույց: Առաջին և երկրորդ հատկությունները հետևանք են վերին փոփոխական սահմանով ինտեգրալի ընդհանուր հատկությունների, իսկ երրորդ հատկությունն անմիջապես բխում է բացարձակ անընդհատ բաշխման սահմանումից և առաջին հատկությունից: \square

§5.4. Դիսկրետ բաշխումների օրինակներ

Բեռնուլիի բաշխում: Ասում են, որ ξ պատահական մեծությունն ունի p պարամետրով Բեռնուլիի բաշխում և գրում են $\xi \sim B_p$, եթե ξ -ն ընդունում է 0 և 1 արժեքներ՝ համապատասխանաբար p և $1-p$ հավանականություններով: Այսպիսի բաշխում ունեցող ξ պատահական մեծությունը հավասար է «հաջողության» p հավանականությամբ Բեռնուլիի սխեմայի մեկ փորձում «հաջողությունների» հանդես գալու թվին: Պարզ է, որ ξ պատահական մեծության $F_{\xi}(x)$ բաշխման ֆունկցիան ունի հետևյալ տեսքը՝

$$F_{\xi}(x) = P(\xi < x) = \begin{cases} 0, & x \leq 0, \\ 1-p, & 0 < x \leq 1, \\ 1, & x > 1: \end{cases}$$

Բինոմական բաշխում: Ասում են, որ ξ պատահական մեծությունը ենթարկվում է հավանականությունների *քիմոմական բաշխմանը*

$n \in \mathbb{N}$ և $p \in (0,1)$ պարամետրերով և գրում են $\xi \sim B_{n,p}$, եթե ξ -ն ընդունում է $k = 0, 1, 2, \dots, n$ արժեքներ

$$P(\xi = k) = C_n^k \cdot p^k (1-p)^{n-k}$$

հավանականություններով: Այս պատահական մեծությունը կարելի է դիտարկել որպես «հաջողությունների» հանդես գալու թիվ Բեռնուլիի սխեմայի n փորձերում: ξ -ի բաշխման աղյուսակն ունի հետևյալ տեսքը՝

ξ	0	1	...	k	...	n
P	$(1-p)^n$	$np(1-p)^{n-1}$...	$C_n^k \cdot p^k (1-p)^{n-k}$...	p^n

Օրինակ խաղոսկրի 20 նետումների դեպքում 6 թվանշանի հանդես գալու թիվն ունի $B_{20, \frac{1}{6}}$ բինոմական բաշխում: Ակնհայտ է, որ Բեռնուլիի բաշխումը համընկնում է $B_{1,p}$ բաշխման հետ:

Երկրաչափական բաշխում: Ասում են, որ ξ պատահական մեծությունն ունի $p \in (0,1)$ պարամետրով երկրաչափականի բաշխում և գրում են $\xi \sim G_p$, եթե ξ -ն ընդունում է $k = 1, 2, \dots$ արժեքներ $P(\xi = k) = (1-p)^{k-1} \cdot p$ հավանականություններով: Այսպիսի բաշխում ունեցող ξ պատահական մեծությունը մեկնաբանվում է, որպես «հաջողության» p հավանականությամբ Բեռնուլիի սխեմայում առաջին «հաջողության» հանդես գալու համար: ξ -ի բաշխման աղյուսակն ունի հետևյալ տեսքը՝

ξ	1	2	...	k	...
P	p	$p(1-p)$...	$p(1-p)^{k-1}$...

Պուասոնի բաշխում: Եթե ξ պատահական մեծությունն ընդունում է $k = 0, 1, 2, \dots$ արժեքներ $P(\xi = k) = \frac{\lambda^k e^{-\lambda}}{k!}$ ($\lambda > 0$) հավանականություններով, ապա ասում են, որ այն ունի λ պարամետրով Պուասոնի բաշխում և գրում են $\xi \sim \Pi_\lambda$:

Պուասոնի բաշխումն առաջացել է Պուասոնի թեորեմում որպես սահմանային բաշխում Բեռնուլիի սխեմայում «հաջողությունների» հանդես գալու թվի համար (տե՛ս §4.3):

§5.5. Բացարձակ անընդհատ բաշխումների օրինակներ


Հավասարաչափ բաշխում: Կասենք, որ ξ պատահական մեծությունն ունի հավասարաչափ բաշխում $[a, b]$ հատվածի վրա և կգրենք $\xi \sim U_{a,b}$, եթե ξ -ի բաշխման խտությունը հաստատուն է $[a, b]$ հատվածի ներսում և հավասար է զրոյի դրանից դուրս.

$$f_{\xi}(x) = \begin{cases} \frac{1}{b-a}, & x \in [a, b], \\ 0, & x \notin [a, b]: \end{cases}$$

$\xi \sim U_{a,b}$ պատահական մեծությունն ունի $[a, b]$ հատվածից պատահականորեն ընտրված կետի կոորդինատի իմաստը: Օգտվելով (5.3) բանաձևից՝ կգտնենք ξ -ի բաշխման ֆունկցիան՝

$$F_{\xi}(x) = \int_{-\infty}^x f_{\xi}(t) dt = \begin{cases} 0, & x \leq a, \\ \frac{x-a}{b-a}, & a < x \leq b, \\ 1, & x > b: \end{cases}$$

Ստորև բերված են հավասարաչափ բաշխման խտության և ֆունկցիայի գրաֆիկները (նկ. 5.2.):



Նկ. 5.2. $U_{a,b}$ բաշխման խտության և ֆունկցիայի գրաֆիկները.


Ցուցչային բաշխում: Ասում են, որ ξ պատահական մեծությունն ունի $\alpha > 0$ պարամետրով ցուցչային (էքսպոնենցիալ) բաշխում և գրում են $\xi \sim E_{\alpha}$, եթե ξ -ն ունի բաշխման հետևյալ խտությունը՝

$$f_{\xi}(x) = \begin{cases} 0, & x \leq 0, \\ \alpha e^{-\alpha x}, & x > 0: \end{cases}$$

ξ -ի բաշխման ֆունկցիան ունի հետևյալ տեսքը՝

$$F_{\xi}(x) = \begin{cases} 0, & x \leq 0, \\ 1 - e^{-\alpha x}, & x > 0: \end{cases}$$

Նկար 5.3-ում բերված են ցուցային բաշխման խտության և ֆունկցիայի գրաֆիկները:




Նկ. 5.3. E_{α} բաշխման խտության և ֆունկցիայի գրաֆիկները.

Նորմալ բաշխում: Ասում են, որ ξ պատահական մեծությունն ունի նորմալ բաշխում a ($a \in \mathbb{R}$) և σ^2 ($\sigma > 0$) պարամետրերով և գրում են $\xi \sim N(a, \sigma^2)$, եթե ξ -ն ունի բաշխման հետևյալ խտությունը՝

$$f_{\xi}(x) = \frac{1}{\sigma\sqrt{2\pi}} e^{-\frac{(x-a)^2}{2\sigma^2}}, \quad -\infty < x < \infty$$

Նկ. 5.4-ում բերված են նորմալ բաշխման խտության գրաֆիկները a պարամետրի միևնույն և σ -ի տարբեր արժեքների դեպքում:



Նկ. 5.4. Նորմալ բաշխման խտության գրաֆիկները.

Համոզվենք, որ $f_{\xi}(x)$ ֆունկցիան իրոք բաշխման խտություն է: Քանի որ $\forall x \in \mathbb{R}$ թվի համար $f_{\xi}(x) > 0$, ապա (f1)-ը բավարարված է: Ստուգենք հատկություն (f2)-ը.

$$\begin{aligned}\int_{-\infty}^{\infty} f_{\xi}(x) dx &= \int_{-\infty}^{\infty} \frac{1}{\sigma\sqrt{2\pi}} e^{-\frac{(x-a)^2}{2\sigma^2}} dx = \left[t = \frac{x-a}{\sigma}; dx = \sigma dt \right] = \\ &= \int_{-\infty}^{\infty} \frac{1}{\sigma\sqrt{2\pi}} e^{-\frac{t^2}{2}} \sigma dt = \frac{1}{\sqrt{2\pi}} \int_{-\infty}^{\infty} e^{-\frac{t^2}{2}} dt = \frac{J}{\sqrt{2\pi}} = 1:\end{aligned}$$


Այստեղ J -ով նշանակված է Պուասոնի աղյուսակային ինտեգրալը*: Հայտնի է, որ

$$J = \int_{-\infty}^{\infty} e^{-x^2/2} dx = \sqrt{2\pi}:$$

$a = 0$ և $\sigma^2 = 1$ պարամետրերով $N(0,1)$ նորմալ բաշխումը կոչվում է *ստանդարտ նորմալ բաշխում*, որի բաշխման խտությունն է՝

$$f(x) = \frac{1}{\sqrt{2\pi}} e^{-\frac{x^2}{2}}:$$

$N(a, \sigma^2)$ նորմալ բաշխման ֆունկցիայի համար կօգտագործենք $\Phi_{a, \sigma^2}(x)$ նշանակումը (նկ. 5.3):



Նկ. 5.4: Նորմալ բաշխման ֆունկցիայի գրաֆիկները:

Քանի որ $e^{-x^2/2}$ ֆունկցիայի նախնականը հնարավոր չէ արտահայտել տարրական ֆունկցիաների միջոցով, ուստի $\Phi_{a, \sigma^2}(x)$ ֆունկցիան

* Այս ինտեգրալը կարելի է հաշվել հետևյալ կերպ.

$$J = \int_{-\infty}^{\infty} e^{-x^2/2} dx \int_{-\infty}^{\infty} e^{-y^2/2} dy = \int_{-\infty}^{\infty} \int_{-\infty}^{\infty} e^{-(x^2+y^2)/2} dx dy:$$

Այժմ անցնելով $x = r \cos \varphi$ և $y = r \sin \varphi$ բևեռային կոորդինատներին՝ կստանանք.

$$J = \int_0^{2\pi} \int_0^{\infty} e^{-r^2/2} r dr d\varphi = \int_0^{2\pi} \int_0^{\infty} e^{-r^2/2} d(r^2/2) d\varphi = 2\pi \Rightarrow J = \sqrt{2\pi}:$$

կարելի է գրել միայն ինտեգրալ տեսքով.

$$\Phi_{a,\sigma^2}(x) = \frac{1}{\sigma\sqrt{2\pi}} \int_{-\infty}^x e^{-\frac{(t-a)^2}{2\sigma^2}} dt, \quad \Phi_{0,1}(x) = \frac{1}{\sqrt{2\pi}} \int_{-\infty}^x e^{-\frac{t^2}{2}} dt :$$

Կոշիի բաշխում: Ասում են, որ ξ պատահական մեծությունը բաշխված է Կոշիի օրենքով a ($a \in \mathbb{R}$) և σ ($\sigma > 0$) պարամետրերով և գրում են $\xi \sim C_{a,\sigma}$, եթե ξ -ն ունի բաշխման հետևյալ խտությունը՝

$$f_{\xi}(x) = \frac{1}{\pi} \cdot \frac{1}{\sigma^2 + (x-a)^2}, \quad -\infty < x < \infty :$$

Կոշիի բաշխման խտությունը սիմետրիկ է $x = a$ ուղղի նկատմամբ և նման է նորմալ բաշխման խտությանը, սակայն $\pm\infty$ -ում ունի ավելի ծանր «պոչեր»: Կոշիի օրենքով բաշխված պատահական մեծության բաշխման ֆունկցիան հավասար է

$$F_{\xi}(x) = \frac{1}{2} + \frac{1}{\pi} \arctg\left(\frac{x-a}{\sigma}\right), \quad -\infty < x < \infty :$$

§5.6. Նորմալ բաշխման հատկությունները

Առանձին դիտարկենք ամենակարևոր բաշխման որոշ հատկություններ: Նախ՝ կապ հաստատենք $\Phi_{a,\sigma^2}(x)$ և $\Phi_{0,1}(x)$ բաշխման ֆունկցիաների միջև:

Հատկություն 1: $\forall x \in \mathbb{R}$ թվի համար ճիշտ է հետևյալ առնչությունը՝

$$\Phi_{a,\sigma^2}(x) = \Phi_{0,1}\left(\frac{x-a}{\sigma}\right):$$

Ապացույց: Իսկապես, ունենք՝

$$\Phi_{a,\sigma^2}(x) = \frac{1}{\sigma\sqrt{2\pi}} \int_{-\infty}^x e^{-\frac{(t-a)^2}{2\sigma^2}} dt :$$

Այս ինտեգրալում կատարելով $y = \frac{t-a}{\sigma}$ փոփոխականի փոխարինում՝ կատանանք $dt = \sigma dy$, իսկ ինտեգրման $t = x$ վերին սահմանը կփոխարինվի $y = \frac{x-a}{\sigma}$ -ով, ուստի՝

$$\Phi_{a,\sigma^2}(x) = \frac{1}{\sqrt{2\pi}} \int_{-\infty}^{\frac{x-a}{\sigma}} e^{-\frac{y^2}{2}} dt = \Phi_{0,1}\left(\frac{x-a}{\sigma}\right): \quad \square$$

Հատկություն 2: Եթե $\xi \sim N(a, \sigma^2)$, ապա $\eta = \frac{\xi - a}{\sigma} \sim N(0, 1)$:

Ապացույց: Համոզվենք, որ η պատահական մեծության բաշխման ֆունկցիան $\Phi_{0,1}(x)$ -ն է.

$$\begin{aligned} F_{\eta}(x) &= P(\eta < x) = P\left(\frac{\xi - a}{\sigma} < x\right) = P(\xi < \sigma x + a) = \\ &= \Phi_{a, \sigma^2}(\sigma x + a) = \Phi_{0,1}\left(\frac{\sigma x + a - a}{\sigma}\right) = \Phi_{0,1}(x) : \end{aligned} \quad \square$$

Հատկություն 3 (երեք սիգմաների կանոն): Եթե $\xi \sim N(a, \sigma^2)$, ապա՝

$$P(|\xi - a| \geq 3\sigma) = 0,0027 \quad (\text{բավականաչափ փոքր է}):$$

Ապացույցը կատարենք՝ անցնելով հակադիր պատահույթի՝

$$P(|\xi - a| \geq 3\sigma) = 1 - P(|\xi - a| < 3\sigma) = 1 - P\left(\left|\frac{\xi - a}{\sigma}\right| < 3\right):$$

Քանի որ $\eta = \frac{\xi - a}{\sigma}$ պատահական մեծությունն ունի ստանդարտ նորմալ բաշխում, ուստի

$$\begin{aligned} 1 - P(|\eta| < 3) &= 1 - P(-3 < \eta < 3) = 1 - \Phi_{0,1}(3) + \Phi_{0,1}(-3) = \\ &= 2 \cdot \Phi_{0,1}(-3) = 2 \cdot 0,00135 = 0,0027 : \end{aligned} \quad \square$$

Գ Լ ՈՒ Խ 6

ԲԱԶՄԱԶՍՓ ԲԱՇԽՈՒՄՆԵՐ

§6.1. Համատեղ բաշխում

Դիցուք $\xi_1, \xi_2, \dots, \xi_n$ պատահական մեծությունները տրված են միևնույն՝ (Ω, \mathcal{F}, P) հավանականային տարածության վրա:

Սահմանում 6.1 :

$$F_{\xi_1, \xi_2, \dots, \xi_n}(x_1, x_2, \dots, x_n) = P(\xi_1 < x_1, \xi_2 < x_2, \dots, \xi_n < x_n)$$

Ֆունկցիան կոչվում է $(\xi_1, \xi_2, \dots, \xi_n)$ պատահական վեկտորի *բաշխման ֆունկցիա* կամ $\xi_1, \xi_2, \dots, \xi_n$ պատահական մեծությունների *համատեղ բաշխում*:

Թվարկենք համատեղ բաշխման ֆունկցիայի հատկությունները: Գրառման պարզության համար, առանց ընդհանրությունը խախտելու, սահմանափակվենք (ξ_1, ξ_2) երկչափ վեկտորների դիտարկումով:

(F1) Ցանկացած x_1, x_2 թվերի համար ճիշտ են $0 \leq F_{\xi_1, \xi_2}(x_1, x_2) \leq 1$ անհավասարությունները:

(F2) $F_{\xi_1, \xi_2}(x_1, x_2)$ ֆունկցիան չնվազող է ըստ (x_1, x_2) վեկտորի յուրաքանչյուր կոորդինատի:

(F3) $F_{\xi_1, \xi_2}(x_1, x_2)$ ֆունկցիան ըստ (x_1, x_2) վեկտորի յուրաքանչյուր կոորդինատի ձախից անընդհատ է:

(F4) Ցանկացած $i = 1, 2$ ինդեքսի համար գոյություն ունեն $\lim_{x_i \rightarrow -\infty} F_{\xi_1, \xi_2}(x_1, x_2) = 0$ և $\lim_{x_1 \rightarrow +\infty} \lim_{x_2 \rightarrow +\infty} F_{\xi_1, \xi_2}(x_1, x_2) = 1$ սահմանները:

(F5) Համատեղ բաշխման ֆունկցիայի միջոցով ξ_1 և ξ_2 պատահական մեծությունների միաչափ բաշխման ֆունկցիաները վերականգնելու համար, պետք է ձգտեցնել խանգարող փոփոխականը անվերջության.

$$\lim_{x_2 \rightarrow +\infty} F_{\xi_1, \xi_2}(x_1, x_2) = F_{\xi_1}(x_1), \quad \lim_{x_1 \rightarrow +\infty} F_{\xi_1, \xi_2}(x_1, x_2) = F_{\xi_2}(x_2): \quad (6.1)$$

Այս բոլոր հատկություններն ապացուցվում են միաչափ դեպքին համանման: Սակայն այս դեպքում (F1)-(F3) հատկությունները դեռ

բավարար չեն՝ նկարագրելու համատեղ բաշխման ֆունկցիաների դասը: Այլ կերպ ասած, եթե այս հատկությունները որևէ $F: \mathbb{R}^2 \rightarrow \mathbb{R}$ ֆունկցիայի համար տեղի ունեն, ապա դրանք դեռ չեն երաշխավորում, որ այս ֆունկցիան հանդիսանում է որևէ պատահական վեկտորի բաշխման ֆունկցիա: Դրա համար F -ը պետք է բավարարի լրացուցիչ այլ հատկությունների:

§6.2. Բազմաչափ բաշխման տեսակները

Մահմանափակվենք միայն երկու տիպային օրինակների դիտարկումով, երբ (ξ_1, ξ_2) պատահական վեկտորի կոորդինատների համատեղ բաշխումը կամ դիսկրետ է, կամ բացարձակ անընդհատ:

Մահմանում 6.2: ξ_1, ξ_2 պատահական մեծություններն ունեն *համասրեղ դիսկրետ բաշխում*, եթե գոյություն ունի $\{a_i, b_j\}$ թվագույգերի այնպիսի հավաք, որ

$$\sum_{i=1}^{\infty} \sum_{j=1}^{\infty} P(\xi = a_i, \xi = b_j) = 1 :$$

Երկու պատահական մեծությունների համատեղ բաշխման օրենքը հարմար է նկարագրել բաշխման աղյուսակի միջոցով, որի i -րդ տողի և j -րդ սյան հատման տեղում գտնվում է $P_{ij} = P(\xi_1 = a_i, \xi_2 = b_j)$ հավանականությունը.

	a_1	a_2	\dots	a_i	\dots
b_1	P_{11}	P_{21}	\dots	P_{i1}	\dots
b_2	P_{12}	P_{22}	\dots	P_{i2}	\dots
\vdots	\vdots	\vdots		\vdots	
b_j	P_{1j}	P_{2j}	\dots	P_{ij}	\dots
\vdots	\vdots	\vdots		\vdots	

(6.2)

ξ_1 և ξ_2 պատահական մեծությունների առանձին (միաչափ) բաշխման աղյուսակները հեշտությամբ կարելի է վերականգնել (6.2) աղյուսակից, հետևյալ բանաձևերի միջոցով՝

$$P(\xi_1 = a_i) = \sum_{j=1}^{\infty} P(\xi_1 = a_i, \xi_2 = b_j) = \sum_{j=1}^{\infty} P_{ij}, \quad i = 1, 2, \dots,$$


$$P(\xi_2 = b_j) = \sum_{i=1}^{\infty} P(\xi_1 = a_i, \xi_2 = b_j) = \sum_{i=1}^{\infty} P_{ij}, \quad j = 1, 2, \dots :$$

Սահմանում 6.3: ξ_1, ξ_2 պատահական մեծություններն ունեն *համատեղ բացարձակ անընդհատ բաշխում*, եթե գոյություն ունի այնպիսի ոչ բացասական $f_{\xi_1, \xi_2}(x, y)$ ֆունկցիա, որ ցանկացած $B \in \mathcal{B}(\mathbb{R}^2)$ բորելյան բազմության համար տեղի ունի հետևյալ հավասարությունը՝

$$P((\xi_1, \xi_2) \in B) = \iint_B f_{\xi_1, \xi_2}(x, y) dx dy :$$

$f_{\xi_1, \xi_2}(x, y)$ ֆունկցիան, եթե այն գոյություն ունի, կոչվում է ξ_1, ξ_2 պատահական մեծությունների *համատեղ բաշխման խտություն*:

Սահմանում 6.3-ում կրկնակի ինտեգրալն ըստ B բազմության բավական է հասկանալ որպես $f_{\xi_1, \xi_2}(x, y)$ ֆունկցիայի գրաֆիկով սահմանափակված տիրույթի ծավալ, ինչպես ցույց է տրված նկ. 6.1-ում:



Նկ. 6.1. Համատեղ բաշխման խտությունն \mathbb{R}^2 -ում.

Համատեղ բաշխման խտությունն օժտված է նույնպիսի հատկություններով, ինչ մեկ պատահական մեծության բաշխման մեծությունը.

(f1) $f_{\xi_1, \xi_2}(x, y) \geq 0$ ցանկացած $x, y \in \mathbb{R}$ թվերի համար;

(f2) $\iint_{\mathbb{R}^2} f_{\xi_1, \xi_2}(x, y) dx dy = 1:$

Ճիշտ է նաև հակառակ պնդումը. ցանկացած ֆունկցիա, որն օժտված է այս երկու հատկություններով, որևէ համատեղ բաշխման խտություն է: Այս փաստի ապացույցը ոչնչով չի տարբերվում միաչափ դեպքից:

Եթե ξ_1, ξ_2 պատահական մեծություններն ունեն համատեղ բացարձակ անընդհատ բաշխում, ապա ցանկացած x_1, x_2 թվերի համար տեղի ունի հետևյալ առնչությունը՝

$$F_{\xi_1, \xi_2}(x_1, x_2) = P(\xi_1 < x_1, \xi_2 < x_2) = \int_{-\infty}^{x_1} \int_{-\infty}^{x_2} f_{\xi_1, \xi_2}(x, y) dx dy :$$

Համատեղ բաշխման ֆունկցիայի միջոցով խտությունը կարելի է գտնել որպես խառը մասնակի ածանցյալ. $f_{\xi_1, \xi_2}(x, y) = \frac{\partial^2}{\partial x \partial y} F_{\xi_1, \xi_2}(x, y)$ համարյա բոլոր (x, y) զույգերի համար:

ξ_1 և ξ_2 պատահական մեծությունների խտությունների գոյությունից դեռ չի հետևում այդ մեծությունների համատեղ բաշխման բացարձակ անընդհատությունը: Սակայն, ինչպես ցույց է տալիս հետևյալ թեորեմը, հակառակ պնդումը միշտ ճիշտ է:

Թեորեմ 6.1: *Եթե ξ_1 և ξ_2 պատահական մեծություններն ունեն բացարձակ անընդհատ համարեղ բաշխում $f_{\xi_1, \xi_2}(x, y)$ խտությամբ, ապա ξ_1 և ξ_2 պատահական մեծություններն առանձին նույնպես ունեն բացարձակ անընդհատ բաշխումներ համապատասխանաբար*

$$f_{\xi_1}(x) = \int_{-\infty}^{\infty} f_{\xi_1, \xi_2}(x, y) dy, \quad f_{\xi_2}(y) = \int_{-\infty}^{\infty} f_{\xi_1, \xi_2}(x, y) dx$$

խտություններով:

Ապացույց: Հավասարություն (6.1)-ի համաձայն՝

$$F_{\xi_1}(x_1) = \lim_{x_2 \rightarrow +\infty} F_{\xi_1, \xi_2}(x_1, x_2) = \int_{-\infty}^{x_1} \left(\int_{-\infty}^{\infty} f_{\xi_1, \xi_2}(x, y) dy \right) dx = \int_{-\infty}^{x_1} f_{\xi_1}(x) dx :$$

Հանգումորեն ապացուցվում է երկրորդ հավասարության ճշմարտացիությունը: \square

§6.3. Բազմաչափ բաշխման օրինակներ

Դիտարկենք բացարձակ անընդհատ բազմաչափ բաշխումների երկու՝ առավել օգտագործվող օրինակներ.

1. Հավասարաչափ բաշխում: Դիցուք $\Omega \subset \mathbb{R}^n$ բազմությունը $\text{mes } \Omega$ վերջավոր Լեբեգի չափ ունեցող բորելյան բազմություն է: Կասենք, որ $(\xi_1, \xi_2, \dots, \xi_n)$ պատահական վեկտորը հավասարաչափ է բաշխված Ω տիրույթում, եթե ξ_1, \dots, ξ_n պատահական մեծությունների համատեղ բաշխման խտության $f_{\xi_1, \xi_2, \dots, \xi_n}(x_1, x_2, \dots, x_n)$ ֆունկցիան հաստատուն է Ω տիրույթում և հավասար է զրոյի այդ տիրույթից դուրս:

$$f_{\xi_1, \xi_2, \dots, \xi_n}(x_1, x_2, \dots, x_n) = \begin{cases} 0, & \text{եթե } (x_1, x_2, \dots, x_n) \notin \Omega, \\ \frac{1}{\text{mes } \Omega}, & \text{եթե } (x_1, x_2, \dots, x_n) \in \Omega: \end{cases}$$

Համոզվենք, որ այս ֆունկցիան իսկապես հանդիսանում է բաշխման խտություն.

$$\int_{\mathbb{R}^n} f_{\xi_1, \dots, \xi_n}(x_1, \dots, x_n) dx_1 \dots dx_n = \frac{1}{\text{mes } \Omega} \int_{\mathbb{R}^n} dx_1 \dots dx_n = \frac{1}{\text{mes } \Omega} \cdot \text{mes } \Omega = 1:$$

2. Բազմաչափ նորմալ բաշխում: Դիցուք Σ -ն $n \times n$ չափի դրական որոշված սիմետրիկ մատրից է, որի հակադարձը Σ^{-1} մատրիցն է, իսկ $\vec{a} \in \mathbb{R}^n$ -ը n - չափանի սյուն վեկտոր է, որի տրանսպոնացվածը կնշանակենք՝ $\vec{a}^T = (a_1, \dots, a_n)$:

Կասենք, որ $\vec{\xi} = (\xi_1, \xi_2, \dots, \xi_n)$ վեկտորն ունի $N(\vec{a}, \Sigma)$ բազմաչափ նորմալ բաշխում միջինների \vec{a} վեկտորով և Σ կովարիացիոն մատրիցով, եթե $f_{\xi_1, \xi_2, \dots, \xi_n}(x_1, x_2, \dots, x_n)$ համատեղ բաշխման խտությունը ներկայացվում է հետևյալ տեսքով՝

$$f_{\xi_1, \xi_2, \dots, \xi_n}(x_1, x_2, \dots, x_n) = \frac{1}{\sqrt{\det \Sigma} \cdot (2\pi)^n} \exp\left(-\frac{1}{2}(\vec{x} - \vec{a})^T \cdot \Sigma^{-1} \cdot (\vec{x} - \vec{a})\right):$$

Նկատենք, որ $\left(-\frac{1}{2}(\vec{x} - \vec{a})^T \cdot \Sigma^{-1} \cdot (\vec{x} - \vec{a})\right)$ արտահայտությունը իրենից ներկայացնում է քառակուսային ձև $(x_i - a_i)$ փոփոխականներից: Իրոք, (b_{ij}) տարրեր ունեցող $B = \Sigma^{-1}$ մատրիցի համար

$$\frac{1}{2}(\vec{x} - \vec{a})^T \cdot B \cdot (\vec{x} - \vec{a}) = \sum_{i=1}^n \sum_{j=1}^n b_{ij}(x_i - a_i)(x_j - a_j):$$

§6.4. Պատահական մեծությունների անկախությունը

Սահմանում 6.4: Միևնույն (Ω, \mathcal{F}, P) հավանականային տարածության վրա որոշված $\xi_1, \xi_2, \dots, \xi_n$ պատահական մեծությունները կոչվում են *անկախ* (համախմբության մեջ), եթե $B_1, B_2, \dots, B_n \in \mathcal{B}$ բոլորելյան բազմությունների ցանկացած հավաքի համար

$$P\{\xi_1 \in B_1, \dots, \xi_n \in B_n\} = \prod_{k=1}^n P\{\xi_k \in B_k\}: \quad (6.3)$$

Մասնավորապես, (6.3)-ից ստանում ենք, որ անկախ պատահական

մեծությունների համար տեղի ունի

$$F_{\xi_1, \xi_2, \dots, \xi_n}(x_1, x_2, \dots, x_n) = F_{\xi_1}(x_1) \cdot F_{\xi_2}(x_2) \cdot \dots \cdot F_{\xi_n}(x_n) \quad (6.4)$$

Հավասարությունը՝ $\forall x_1, x_2, \dots, x_n \in \mathbb{R}^1$:

(6.4) բանաձևը կարող է ծառայել որպես ξ_1, \dots, ξ_n պատահական մեծությունների անկախության սահմանում:

Դիսկրետ բաշխված պատահական մեծությունների անկախությունը կարելի է նկարագրել դրանց համատեղ բաշխման աղյուսակի միջոցով:

Սահմանում 6.5: Դիսկրետ բաշխված ξ_1, \dots, ξ_n պատահական մեծությունները կոչվում են *անկախ* (համախմբության մեջ), եթե ցանկացած a_1, a_2, \dots, a_n թվերի համար

$$P\{\xi_1 = a_1, \dots, \xi_n = a_n\} = \prod_{k=1}^n P\{\xi_k = a_k\}:$$

Բացարձակ անընդհատ ξ_1, \dots, ξ_n պատահական մեծությունների համար տեղի ունի հետևյալ պնդումը:

Թեորեմ 6.1: *Բացարձակ անընդհատ $\xi_1, \xi_2, \dots, \xi_n$ պատահական մեծություններն անկախ են այն և միայն այն դեպքում, երբ ցանկացած x_1, x_2, \dots, x_n թվերի համար տեղի ունի հետևյալ առնչությունը՝*

$$f_{\xi_1, \xi_2, \dots, \xi_n}(x_1, \dots, x_n) = f_{\xi_1}(x_1) \cdot \dots \cdot f_{\xi_n}(x_n): \quad (6.5)$$

Դիտողություն: Քանի որ բաշխման խտության փոփոխությունը զրոյական չափի բազմության վրա չի հանգեցնում բաշխման փոփոխության, ապա (6.5) հավասարությունը կարելի է հասկանալ որպես հավասարություն համարյա ամենուրեք:

Ապացույց: Դիցուք $\xi_1, \xi_2, \dots, \xi_n$ պատահական մեծություններն անկախ են, այսինքն՝

$$F_{\xi_1, \xi_2, \dots, \xi_n}(x_1, \dots, x_n) = F_{\xi_1}(x_1) \cdot \dots \cdot F_{\xi_n}(x_n):$$

Բաշխման ֆունկցիաների վերը նշված առնչության աջ և ձախ մասերը գրենք հետևյալ տեսքերով՝

$$F_{\xi_1}(x_1) \cdot \dots \cdot F_{\xi_n}(x_n) =$$

$$= \int_{-\infty}^{x_1} f_{\xi_1}(t_1) dt_1 \cdot \dots \cdot \int_{-\infty}^{x_n} f_{\xi_n}(t_n) dt_n = \int_{-\infty}^{x_1} \dots \int_{-\infty}^{x_n} f_{\xi_1}(t_1) \dots f_{\xi_n}(t_n) dt_1 \dots dt_n:$$

$$F_{\xi_1, \xi_2, \dots, \xi_n}(x_1, \dots, x_n) = \int_{-\infty}^{x_1} \dots \int_{-\infty}^{x_n} f_{\xi_1, \dots, \xi_n}(x_1, \dots, x_n) dt_1 \dots dt_n:$$

Հետևաբար՝

$$\int_{-\infty}^{x_1} \dots \int_{-\infty}^{x_n} f_{\xi_1}(t_1) \dots f_{\xi_n}(t_n) dt_1 \dots dt_n = \int_{-\infty}^{x_1} \dots \int_{-\infty}^{x_n} f_{\xi_1, \xi_2, \dots, \xi_n}(x_1, x_2, \dots, x_n) dt_1 \dots dt_n :$$

Այսպիսով, (6.5) հավասարությունը համարյա ամենուրեք ճիշտ է:

Այժմ ենթադրենք, որ (6.5) հավասարությունից բխում է $\xi_1, \xi_2, \dots, \xi_n$ պատահական մեծությունների անկախությունը: Իրոք, այս դեպքում ունենք՝

$$\begin{aligned} F_{\xi_1, \xi_2, \dots, \xi_n}(x_1, x_2, \dots, x_n) &= \int_{-\infty}^{x_1} \dots \int_{-\infty}^{x_n} f_{\xi_1, \xi_2, \dots, \xi_n}(x_1, x_2, \dots, x_n) dt_1 \dots dt_n = \\ &= \int_{-\infty}^{x_1} \dots \int_{-\infty}^{x_n} f_{\xi_1}(t_1) \dots f_{\xi_n}(t_n) dt_1 \dots dt_n = \int_{-\infty}^{x_1} f_{\xi_1}(t_1) dt_1 \dots \int_{-\infty}^{x_n} f_{\xi_n}(t_n) dt_n = \\ &= F_{\xi_1}(x_1) \dots F_{\xi_n}(x_n) : \end{aligned} \quad \square$$

§6.4. Ֆունկցիաներ պատահական մեծություններից

Որոշ դեպքերում պատահական մեծությունները միմյանց հետ կապվում են ֆունկցիոնալ կապով: Իմանալով դրանցից մեկի բաշխման օրենքը՝ հաճախ պահանջվում է գտնել մյուսինը: Նախ՝ դիտարկենք դիսկրետ պատահական մեծությունների դեպքը: Դիցուք ξ -ն դիսկրետ պատահական մեծություն է, իսկ $y = \varphi(x)$ -ը որևէ ֆունկցիա է: Ենթադրենք ξ -ն ունի հետևյալ բաշխումը աղյուսակը՝

ξ	x_1	x_2	\dots	x_n
P	p_1	p_2	\dots	p_n

Գտնենք $\eta = \varphi(\xi)$ պատահական մեծության բաշխման աղյուսակը: Պարզ է, որ η -ն նույնպես դիսկրետ է և նրա հնարավոր արժեքներն են՝

$$y_1 = \varphi(x_1), y_2 = \varphi(x_2), \dots, y = \varphi(x_n) :$$

Այն դեպքում դեպքում, երբ բոլոր y_1, y_2, \dots, y_n արժեքները տարբեր են, ապա $\{\xi = x_i\}$ և $\{\eta = y_i\}$, $i = 1, 2, \dots, n$ պատահույթները համարժեք են, հետևաբար, համաձայն հավանականության հատկությունների՝

$$P\{\xi = x_i\} = P\{\eta = y_i\} = p_i, \quad i = 1, 2, \dots, n :$$

Այսպիսով, $\eta = \varphi(\xi)$ պատահական մեծության աղյուսակը կունենա հետևյալ տեսքը՝

η	y_1	y_2	\dots	y_n
P	p_1	p_2	\dots	p_n

Եթե y_1, y_2, \dots, y_n արժեքների մեջ կան հավասարներ, օրինակ՝ $y_i = y_j = y$, ապա աղյուսակում y արժեքին հատկացնում ենք մեկ տեղ և դրան համապատասխան հավանականությունը որոշում ենք $p = p_i + p_j$ առնչությամբ:

Խնդիր 1: Դիցուք ξ_1 և ξ_2 պատահական մեծությունների համար (ξ_1, ξ_2) վեկտորի բաշխման օրենքը տրվում է (6.2) աղյուսակով: Պահանջվում է գտնել $\eta = g(\xi_1, \xi_2)$ պատահական մեծության բաշխման օրենքը, որտեղ $g(x, y)$ -ը որևէ ֆունկցիա է:

Լուծում: η պատահական մեծության հնարավոր արժեքները նշանակենք z_1, z_2, \dots : Այդ դեպքում՝

$$\begin{aligned} P\{\eta = z_k\} &= P\{g(\xi_1, \xi_2) = z_k\} = \sum_{(i, j: g(a_i, b_j) = z^k)} P\{\xi_1 = a_i, \xi_2 = b_j\} = \\ &= \sum_{(i, j: g(a_i, b_j) = z^k)} P_{ij} : \end{aligned}$$

Խնդիր 2: Օգտվելով այս առնչությունից, ցույց տանք, որ եթե ξ և η պատահական մեծությունները անկախ են և բաշխված են Պուասոնի օրենքով համապատասխանաբար՝ λ_1 և λ_2 պարամետրերով, ապա $\zeta = \xi + \eta$ պատահական մեծությունը նույնպես բաշխված է Պուասոնի օրենքով՝ $\lambda_1 + \lambda_2$ պարամետրով:

Լուծում: Դիցուք

$$P\{\xi = n\} = e^{-\lambda_1} \cdot \frac{\lambda_1^n}{n!}, \quad n = 0, 1, 2, \dots,$$

$$P\{\eta = m\} = e^{-\lambda_2} \cdot \frac{\lambda_2^m}{m!}, \quad m = 0, 1, 2, \dots:$$

Այդ դեպքում $\zeta = \xi + \eta$ պատահական մեծությունը նույնպես կընդունի $k = 0, 1, 2, \dots$ արժեք, ընդ որում՝

$$\begin{aligned} P\{\zeta = k\} &= \sum_{(i, j: i+j=k)} P\{\xi = i, \eta = j\} = \sum_{(i, j: i+j=k)} P\{\xi = i\} \cdot P\{\eta = j\} = \\ &= \sum_{i=0}^k P\{\xi = i\} \cdot P\{\eta = k-i\} = \sum_{i=0}^k (e^{-\lambda_1} \frac{\lambda_1^i}{i!} \cdot e^{-\lambda_2} \frac{\lambda_2^{k-i}}{(k-i)!}) = \\ &= e^{\lambda_1 + \lambda_2} \cdot \sum_{i=0}^k (\frac{\lambda_1^i \cdot \lambda_2^{k-i}}{i!(k-i)!} \cdot \frac{k!}{k!}) = \frac{e^{\lambda_1 + \lambda_2}}{k!} \cdot \sum_{i=0}^k C_k^i \lambda_1^i \cdot \lambda_2^{k-i} = e^{\lambda_1 + \lambda_2} \frac{(\lambda_1 + \lambda_2)^k}{k!} : \end{aligned}$$

Խնդիր 3: Դիցուք $F_\xi(x) = P(\xi < x)$ -ը ξ պատահական մեծության բաշխման ֆունկցիան է, իսկ $\varphi(x)$ -ը բորելյան ֆունկցիա է, այսինքն՝ $\varphi^{-1}(B) = \{x : \varphi(x) \in B\}$ բազմությունը ցանկացած բորելյան B բազմության համար բորելյան բազմություն է: Գտնենք $\eta = \varphi(\xi)$ պատահական մեծության բաշխման ֆունկցիան:

Լուծում: Ունենք

$$F_\eta(x) = P\{\eta < x\} = P\{\varphi(\xi) < x\} = P\{\xi \in \varphi^{-1}(-\infty, x)\}: \quad (6.6)$$

Պարզ է, որ (6.6)-ի աջ կողմում գրված հավանականությունը կարելի է հաշվել $F_\xi(x)$ -ի միջոցով: Մասնավորապես, եթե $y = \varphi(x)$ ֆունկցիան մոնոտոն աճող է, ապա գոյություն ունի $x = \varphi^{-1}(y)$ հակադարձ ֆունկցիան, որը նույնպես կլինի մոնոտոն աճող: Հետևաբար՝

$$F_\eta(y) = P\{\varphi(\xi) < y\} = P\{\xi < \varphi^{-1}(y)\} = F_\xi\{\varphi^{-1}(y)\}: \quad (6.7)$$

Եթե ենթադրենք, որ ξ -ն անընդհատ պատահական մեծություն է, իսկ $\varphi(x)$ -ը մոնոտոն նվազող է, ապա՝

$$F_\eta(y) = P\{\varphi(\xi) < y\} = P\{\xi > \varphi^{-1}(y)\} = 1 - F_\xi(\varphi^{-1}(y)), \quad (6.8)$$

քանի որ անընդհատ պատահական մեծության համար $P\{\xi = x\} = 0$:

Այժմ գտնենք $\eta = \varphi(\xi)$ պատահական մեծության բաշխման խտությունը ξ պատահական մեծության $f_\xi(x)$ բաշխման խտության միջոցով՝ հավելյալ ենթադրելով, որ $\varphi(x)$ ֆունկցիան դիֆերենցելի է:

Համաձայն և (6.8) բանաձևերի, կունենանք՝

$$f_\eta(y) = F'_\eta(y) = \frac{dF_\xi\{\varphi^{-1}(y)\}}{d\varphi^{-1}(y)} \cdot \frac{d\varphi^{-1}(y)}{dy} = f_\xi(\varphi^{-1}(y)) \cdot \frac{d\varphi^{-1}(y)}{dy},$$

երբ $\varphi(x)$ ֆունկցիան մոնոտոն աճող է և

$$f_\eta(y) = F'_\eta(y) = -\frac{dF_\xi\{\varphi^{-1}(y)\}}{d\varphi^{-1}(y)} \cdot \frac{d\varphi^{-1}(y)}{dy} = -f_\xi(\varphi^{-1}(y)) \cdot \frac{d\varphi^{-1}(y)}{dy},$$

երբ $\varphi(x)$ ֆունկցիան մոնոտոն նվազող է: Նկատենք, որ այս դեպքում $\frac{d\varphi^{-1}(y)}{dy} < 0$: Այսպիսով, միավորելով վերջին երկու հավասարությունները, ստանում ենք, որ եթե $f_\xi(x)$ -ը ξ -ն անընդհատ պատահական մեծության բաշխման խտությունն է, իսկ $\varphi(x)$ -ը՝ մոնոտոն և դիֆերենցելի

ֆունկցիա, ապա $\eta = \varphi(\xi)$ պատահական մեծության բաշխման խտությունն է՝

$$f_{\eta}(y) = f_{\xi}(\varphi^{-1}(y)) \cdot \left| \frac{d\varphi^{-1}(y)}{dy} \right|: \quad (6.9)$$

Խնդիր 4. Դիցուք $F_{\xi}(x)$ -ը ξ պատահական մեծության բաշխման ֆունկցիան է: Գտնել $F_{\eta}(x)$ -ն, եթե $\eta = \xi^n$:

Լուծում:

ա) Ենթադրենք՝ n -ը կենտ թիվ է: Այդ դեպքում, օգտվելով (6.7) բանաձևից, կարող ենք գրել.

$$F_{\eta}(x) = F_{\xi}(\varphi^{-1}(x)) = F_{\xi}(\sqrt[n]{x}):$$

Ընդ որում, եթե ξ բացարձակ անընդհատ պատահական մեծություն է, ապա՝

$$f_{\eta}(x) = (F_{\xi}(\sqrt[n]{x}))'_x = \frac{1}{n \cdot \sqrt[n]{x^{n-1}}} \cdot f_{\xi}(\sqrt[n]{x}):$$

բ) Ենթադրենք՝ n -ը գույգ թիվ է: Այս դեպքում արդեն $\varphi(x) = x^n$ ֆունկցիան մոնոտոն չէ, հետևապես՝ չենք կարող կիրառել (6.7) բանաձևը: Ընտրենք այլ եղանակ: Եթե $x \leq 0$, ապա $F_{\eta}(x) = P\{\xi^n < x\} = 0$: Եթե $x > 0$, ապա

$$F_{\eta}(x) = P\{\xi^n < x\} = P\{-\sqrt[n]{x} < \xi < \sqrt[n]{x}\} = F_{\xi}(\sqrt[n]{x}) - F_{\xi}(-\sqrt[n]{x} + 0):$$

Այսպիսով՝

$$F_{\eta}(x) = P(\xi^n < x) = \begin{cases} 0, & x \leq 0, \\ F_{\xi}(\sqrt[n]{x}) - F_{\xi}(-\sqrt[n]{x} + 0), & x > 0: \end{cases}$$

Եթե ξ բացարձակ անընդհատ է, ապա $F_{\xi}(-\sqrt[n]{x} + 0) = F_{\xi}(-\sqrt[n]{x})$ և

$$f_{\eta}(x) = \begin{cases} 0, & x \leq 0, \\ \frac{1}{n} x^{\frac{n-1}{n}} [f_{\xi}(\sqrt[n]{x}) + f_{\xi}(-\sqrt[n]{x})], & x > 0: \end{cases}$$

Խնդիր 5. Դիցուք $F_{\xi}(x) = P(\xi < x)$ -ը անընդհատ է: Պահանջվում է գտնել $\eta = F_{\xi}(\xi)$ պատահական մեծության բաշխման ֆունկցիան:

Լուծում: Քանի որ $0 \leq F_{\xi}(x) \leq 1$, $\forall x \in (-\infty, \infty)$, ապա $F_{\eta}(x) = 0$, $x \leq 0$ և $F_{\eta}(x) = 1$, եթե $x > 1$: Այժմ ենթադրենք, որ $0 < x \leq 1$: Քանի որ $(0, 1]$ միջակայքում $F_{\xi}(x)$ ֆունկցիան մոնոտոն աճում է, ուստի, համաձայն (6.7)-ի, $F_{\eta}(x) = F_{F_{\xi}(\xi)}(x) = F_{\xi}(F_{\xi}^{-1}(x)) = x$: Հետևաբար՝

$$F_{\eta}(x) = \begin{cases} 0, & x \leq 0, \\ x, & 0 < x \leq 1, \\ 1, & x > 1: \end{cases}$$

Այսպիսով, η -ն $[0,1]$ -ում բաշխված է հավասարաչափ:

Խնդիր 6: Դիցուք ξ պատահական մեծությունը հավասարաչափ է բաշխված $(-\frac{\pi}{2}, \frac{\pi}{2})$ միջակայքում: Գտնենք $\eta = \sin \xi$ պատահական մեծության բաշխման խտությունը:

Լուծում: $(-\frac{\pi}{2}, \frac{\pi}{2})$ միջակայքում հավասարաչափ բաշխված ξ պատահական մեծության բաշխման ֆունկցիան է՝

$$f_{\xi}(x) = \frac{1}{\pi/2 - (-\pi/2)} = \frac{1}{\pi},$$

երբ $x \in (-\frac{\pi}{2}, \frac{\pi}{2})$ և $f_{\xi}(x) = 0$, երբ $x \notin (-\frac{\pi}{2}, \frac{\pi}{2})$:

Քանի որ $\varphi(x) = \sin x$ ֆունկցիան $(-\frac{\pi}{2}, \frac{\pi}{2})$ միջակայքում մոնոտոն է, հետևաբար՝ այդ միջակայքում այն ունի հակադարձ ֆունկցիա՝ $x = \varphi^{-1}(y) = \arcsin y$: Համաձայն (6.9) բանաձևի, կունենանք՝

$$f_{\eta}(y) = f_{\xi}(\arcsin y) \cdot (\arcsin y)' = \frac{1}{\pi\sqrt{1-y^2}}:$$

Քանի որ $y = \sin x$, իսկ $x \in (-\frac{\pi}{2}, \frac{\pi}{2})$, ապա $-1 < y < 1$: Այսպիսով՝

$$f_{\eta}(y) = \begin{cases} \frac{1}{\pi\sqrt{1-y^2}}, & x \in (-1,1), \\ 0, & x \notin (-1,1): \end{cases}$$

Խնդիր 7: Դիցուք $f(x,y)$ -ը (ξ, η) պատահական վեկտորի բաշխման խտությունն է: Պահանջվում է գտնել $F_{\xi+\eta}(z)$ -ն:

Լուծում: Ունենք $F_{\zeta=\xi+\eta}(z) = P(\zeta < z) = P(\xi + \eta < z)$: Քանի որ $P(\xi + \eta < z)$ -ը (ξ, η) կետի $\xi + \eta < z$ կիսահարթություն ընկնելու հավանականությունն է, ապա

$$\begin{aligned} F_{\zeta}(z) &= \iint_{x+y < z} f(x,y) dy dx = \int_{-\infty}^{\infty} \int_{-\infty}^{z-x} f(x,y) dy dx = \\ &= \int_{-\infty}^{\infty} \int_{-\infty}^z f(x,u-x) du dx = \int_{-\infty}^z \left(\int_{-\infty}^{\infty} f(x,u-x) dx \right) du, \end{aligned}$$

որից հետևում է, որ ζ պատահական մեծությունը բացարձակ անընդհատ է, և նրա բաշխման խտությունն ունի

$$f_{\zeta}(u) = \int_{-\infty}^{\infty} f(x, u-x) dx \quad (6.10)$$

սեպր:

Եթե ξ և η պատահական մեծությունները անկախ են, ապա $f(x, y) = f_{\xi}(x) \cdot f_{\eta}(y)$ և (6.10) -ից ստանում ենք՝

$$f_{\zeta}(u) = \int_{-\infty}^{\infty} f_{\xi}(x) f_{\eta}(u-x) dx: \quad (6.11)$$

(6.11) բանաձևը կոչվում է *կոմպոզիցիայի բանաձև*: Օգտվելով այս բանաձևից՝ կարելի է ցույց տալ, որ եթե պատահական մեծություններն անկախ են և ենթարկվում են նորմալ բաշխմանը (a_1, σ_1) և (a_2, σ_2) պարամետրերով, ապա դրանց գումարը նույնպես կենթարկվի նորմալ բաշխմանը $(a_1 + a_2, \sqrt{\sigma_1^2 + \sigma_2^2})$ պարամետրերով, որը թողնվում է ընթերցողին:

Խնդիր 8: Դիցուք $f(x, y)$ ֆունկցիան (ξ, η) պատահական վեկտորի բաշխման խտությունն է: Պահանջվում է գտնել $F'_{\zeta=\xi\eta}(z)$ -ը:

Լուծում: Ունենք՝

$$\begin{aligned} F_{\zeta}(z) &= P(\zeta < z) = P(\xi \cdot \eta < z) = P\left(\eta < \frac{z}{\xi} \mid \xi > 0\right) + P\left(\eta > \frac{z}{\xi} \mid \xi < 0\right) = \\ &= \iint_{xy < z} f(x, y) dx dy = \int_0^{\infty} \int_{-\infty}^{z/x} f(x, y) dx dy + \int_{-\infty}^0 \int_{z/x}^{\infty} f(x, y) dx dy = \\ &= \int_0^{\infty} \left(\int_{-\infty}^z f\left(x, \frac{u}{x}\right) \frac{du}{x} \right) dx - \int_{-\infty}^0 \left(\int_{-\infty}^z f\left(x, \frac{u}{x}\right) \frac{du}{x} \right) dx = \int_{-\infty}^z \left(\int_{-\infty}^{\infty} \frac{1}{|x|} f\left(x, \frac{u}{x}\right) dx \right) du: \end{aligned}$$

Այստեղից հետևում է, որ $\zeta = \xi \cdot \eta$ պատահական մեծությունը բացարձակ անընդհատ է և նրա խտությունն է՝

$$f_{\zeta}(u) = \int_{-\infty}^{\infty} \frac{1}{|x|} f\left(x, \frac{u}{x}\right) dx:$$

Եթե ξ և η պատահական մեծություններն անկախ են, ապա՝

$$f_{\zeta}(u) = \int_{-\infty}^{\infty} \frac{1}{|x|} f_{\xi}(x) f_{\eta}\left(\frac{u}{x}\right) dx:$$

Գ Լ ՈՒ Խ 7

ՊԱՏԱՀԱԿԱՆ ՄԵԾՈՒԹՅՈՒՆՆԵՐԻ ԹՎԱՅԻՆ ԲՆՈՒԹԱԳՐԻՉՆԵՐԸ

§7.1. Մաթեմատիկական սպասելի

Պատահական մեծությունները ամբողջությամբ բնութագրվում են իրենց բաշխման ֆունկցիաների միջոցով: Սակայն հաճախ ավելի հարմար է օգտվել պատահական մեծությունների, այսպես կոչված, թվային բնութագրիչներից, որոնք ավելի ամփոփ տեղեկություն են տալիս պատահական մեծության այս կամ այն հատկության մասին: Ամեն բաշխում ունի իր թվային բնութագրիչները՝ մոմենտները: Դրանցից ամենակարևորներն են $M\xi$ մաթեմատիկական սպասելին (բաշխման միջինը) և $D\xi$ դիսպերսիան (ցրվածության աստիճանը միջինի նկատմամբ):

Հավանականային տարածության ընդհանուր դեպքի համար մաթեմատիկական սպասումը հարմար է սահմանել՝ օգտվելով Լեբեգի ինտեգրալից.

(Ω, \mathcal{F}, P) հավանականային տարածության վրա որոշված $\xi(\omega)$ պատահական մեծության *մաթեմատիկական սպասելի* է կոչվում

$$M\xi = \int_{\Omega} \xi(\omega) dP(\omega)$$

թիվը, եթե հավասարության աջ մասում գրված Լեբեգի ինտեգրալը գոյություն ունի:

Առանց օգտվելու Լեբեգի ինտեգրալի տեսությունից՝ կսահմանենք մաթեմատիկական սպասելին միայն դիսկրետ և բացարձակ անընդ-հատ պատահական մեծությունների համար:

Սահմանում 7.1: $\xi = \xi(\omega)$ դիսկրետ պատահական մեծության *մաթեմատիկական սպասելի*՝ $M\xi$, կոչվում է հետևյալ շարքի գումարը՝

$$M\xi = \sum_{n=1}^{\infty} x_n p_n = \sum_{n=1}^{\infty} x_n P\{\xi = x_n\}, \quad (7.1)$$

Եթե միայն այդ շարքը բացարձակ գումարաբան է՝ $\sum_{i=1}^{\infty} |x_n| p_n < \infty$: Հակառակ դեպքում ասում են, որ մաթեմատիկական սպասելի գոյություն չունի:

Մահմանում 7.2: $f_{\xi}(x)$ խտությամբ բացարձակ անընդհար բաշխում ունեցող ξ պատահական մեծության $M\xi$ մաթեմատիկական սպասելի է կոչվում

$$M\xi = \int_{-\infty}^{\infty} x f_{\xi}(x) dx$$

ինտեգրալը, եթե այն բացարձակ գումարաբան է՝ $\int_{-\infty}^{\infty} |x| f(x) dx < +\infty$:

Օրինակ 1: Դիցուք ξ պատահական մեծությունը հավասար է խաղոսկրի մեկ նետման ժամանակ հայտնված միավորների թվին: Այդ դեպքում

$$M\xi = \sum_{n=1}^6 n \cdot \frac{1}{6} = \frac{1}{6} \cdot (1 + 2 + 3 + 4 + 5 + 6) = 3,5 :$$

Այսպիսով, մեկ նետման ժամանակ միջինում հայտնվում է 3,5 միավոր:

Օրինակ 2: Դիցուք ξ պատահական մեծությունը $[a, b]$ հատվածի վրա պատահականորեն նետված կետի կոորդինատն է: Այդ դեպքում

$$M\xi = \int_a^b x \cdot \frac{1}{b-a} dx = \frac{1}{b-a} \cdot \frac{x^2}{2} \Big|_a^b = \frac{b^2 - a^2}{2 \cdot (b-a)} = \frac{a+b}{2} :$$

Հավասարաչափ բաշխման ծանրության կենտրոնը հատվածի միջնակետն է:

§7.2. Մաթեմատիկական սպասելիի հատկությունները

Ստորև նշված բոլոր հատկությունների համար ենթադրվում է, որ մաթեմատիկական սպասելիի գոյություն ունի:

(M1) Կամայական $g : \mathbb{R} \rightarrow \mathbb{R}$ բորելյան ֆունկցիայի համար՝

$Mg(\xi) = \sum_{n=1}^{\infty} g(x_n) P(\xi = x_n)$, եթե ξ -ի բաշխումը դիսկրետ է և շարքը՝
բացարձակ զուգամետ, և

$Mg(\xi) = \int_{-\infty}^{\infty} g(x) f_{\xi}(x) dx$, եթե ξ -ի բաշխումը բացարձակ անընդհատ
է և ինտեգրալը՝ բացարձակ զուգամետ :

Ապացույց: Մաթեմատիկական սպասելիի այս և հետագա գրեթե բոլոր հատկությունների ապացուցումները կկատարենք միայն դիսկրետ պատահական մեծությունների համար: Ենթադրենք z_1, z_2, \dots թվերը $g(\xi)$ պատահական մեծության արժեքներն են: Համաձայն մաթեմատիկական սպասման սահմանման՝

$$Mg(\xi) = \sum_{k=1}^{\infty} z_k P(g(\xi) = z_k)$$

ξ պատահական մեծության բոլոր հնարավոր արժեքների՝ x_1, x_2, \dots , բազմությունը տրոհենք միմյանց հետ չհատվող E_1, E_2, \dots խմբերի, որտեղ $E_k = \{x_n : g(x_n) = z_k\}$, $k \geq 1$: Այդ դեպքում

$$P(g(\xi) = z_k) = \sum_{n: x_n \in E_k} P(\xi = x_n):$$

$\sum_{n=1}^{\infty} g(x_n) P(\xi = x_n)$ շարքում (բացարձակ զուգամետ) կատարելով անհրաժեշտ տեղափոխություններ՝ կստանանք՝

$$\begin{aligned} \sum_{n=1}^{\infty} g(x_n) P(\xi = x_n) &= \sum_{k=1}^{\infty} z_k \sum_{n: x_n \in E_k} P(\xi = x_n) = \\ &= \sum_{k=1}^{\infty} z_k P(g(\xi) = z_k) = Mg(\xi): \end{aligned}$$

□

(M2) Ցանկացած C հաստատունի համար $MC = C$ և $M(C\xi) = C \cdot M\xi$:

Ապացույց: Քանի որ հաստատուն պատահական մեծությունը 1 հավանականությամբ ընդունում է C արժեք, ուստի

$$MC = C \cdot 1 = C:$$

Ապացուցենք, երկրորդ առնչությունը նախ՝ դիսկրետ, ապա՝ բացարձակ անընդհատ պատահական մեծության համար: Դիցուք ξ պատահական մեծությունն ընդունում է x_1, x_2, \dots արժեքներ համապատասխանաբար p_1, p_2, \dots հավանականություններով: Այդ դեպքում $C\xi$ պատահական մեծությունը կընդունի Cx_1, Cx_2, \dots արժեքներ՝ p_1, p_2, \dots հավանականություններով, ուստի՝

$$M(C\xi) = \sum_{n=1}^{\infty} Cx_n p_n = C \sum_{n=1}^{\infty} x_n p_n = C \cdot M\xi:$$

Այժմ ապացուցենք այս հատկությունը բացարձակ անընդհատ բաշխում ունեցող պատահական մեծության համար: $C = 0$ դեպքում այն ակնհայտ է: Դժվար չէ նկատել, որ $C > 0$ դեպքում՝

$$F_{C\xi}(x) = P(C\xi < x) = P\left(\xi < \frac{x}{C}\right) = F_{\xi}\left(\frac{x}{C}\right), \quad \text{և} \quad f_{C\xi}(x) = \frac{1}{C} f_{\xi}\left(\frac{x}{C}\right),$$

որտեղից

$$M(C\xi) = \int_{-\infty}^{\infty} x f_{C\xi}(x) dx = \frac{1}{C} \int_{-\infty}^{\infty} x f_{\xi}\left(\frac{x}{C}\right) dx = C \int_{-\infty}^{\infty} y f_{\xi}(y) dy = C \cdot M\xi:$$

Իսկ եթե $C < 0$, ապա

$$F_{C\xi}(x) = 1 - F_{\xi}\left(\frac{x}{C}\right) \quad \text{և} \quad f_{C\xi}(x) = -\frac{1}{C} f_{\xi}\left(\frac{x}{C}\right),$$

որտեղից էլ՝

$$\begin{aligned} M(C\xi) &= -\frac{1}{C} \int_{-\infty}^{\infty} x f_{\xi}\left(\frac{x}{C}\right) dx = \\ &= -\frac{C^2}{C} \int_{+\infty}^{-\infty} y f_{\xi}(y) dy = C \int_{-\infty}^{\infty} y f_{\xi}(y) dy = C \cdot M\xi: \end{aligned}$$

□

(M3) Եթե $\xi_1, \xi_2, \dots, \xi_n$ պատահական մեծությունները որոշված են միևնույն (Ω, \mathcal{F}, P) հավանականային տարածության վրա, ապա

$$M(\xi_1 + \xi_2 + \dots + \xi_n) = M\xi_1 + M\xi_2 + \dots + M\xi_n:$$

Ապացույցը կատարվում է ինդուկցիայի մեթոդով (ըստ n -ի), որի համար հիմք է հետևյալ հավասարությունը՝

$$M(\xi_1 + \xi_2) = M\xi_1 + M\xi_2: \quad (7.2)$$

Ապացուցենք (7.2) հավասարությունը:

Դիսկրետ դեպքի համար ենթադրենք՝ z_1, z_2, \dots թվերը $\xi_1 + \xi_2$ պատահական մեծության բոլոր հնարավոր արժեքներն են: Ցանկացած z_k , $k \geq 1$ արժեք ստացվում է ξ_1 պատահական մեծության (հնարավոր արժեքներն են՝ x_1, x_2, \dots) և ξ_2 մեծության (հնարավոր արժեքներն են՝ y_1, y_2, \dots) այնպիսի արժեքներից, որ $x_i + y_j = z_k$: Հետևաբար՝

$$P(\xi_1 + \xi_2 = z_k) = \sum_{x_i + y_j = z_k} P_{ij}, \quad k = 1, 2, \dots,$$

որտեղ $P_{ij} = P(\xi_1 = x_i, \xi_2 = y_j)$: Այսպիսով,

$$\begin{aligned} M(\xi_1 + \xi_2) &= \sum_{k=1}^{\infty} z_k P(\xi_1 + \xi_2 = z_k) = \sum_{k=1}^{\infty} z_k \sum_{x_i + y_j = z_k} P_{ij} = \\ &= \sum_{i=1}^{\infty} \sum_{j=1}^{\infty} (x_i + y_j) \cdot P(\xi_1 = x_i, \xi_2 = y_j): \end{aligned}$$

Քանի որ՝

$$P(\xi_1 = x_i) = \sum_{j=1}^{\infty} P(\xi_1 = x_i, \xi_2 = y_j), \quad P(\xi_2 = y_j) = \sum_{i=1}^{\infty} P(\xi_1 = x_i, \xi_2 = y_j),$$

ապա՝

$$M(\xi_1 + \xi_2) = \sum_{i=1}^{\infty} x_i P(\xi_1 = x_i) + \sum_{j=1}^{\infty} y_j P(\xi_2 = y_j) = M\xi_1 + M\xi_2:$$

Այժմ ենթադրենք, որ ξ_1 և ξ_2 պատահական մեծություններն ունեն բացարձակ անընդհատ բաշխումներ: Հայտնի է, որ $\xi_1 + \xi_2$ պատահական մեծության $f_{\xi_1 + \xi_2}(x)$ բաշխման խտությունը որոշվում է հետևյալ առնչությամբ՝

$$f_{\xi_1 + \xi_2}(u) = \int_{-\infty}^{\infty} f(x, u - x) dx, \quad (7.3)$$

որտեղ $f(x, y)$ -ը (ξ_1, ξ_2) պատահական վեկտորի բաշխման խտությունն է: Ելնելով մաթեմատիկական սպասման սահմանումից և (7.3)-ից, ստանում ենք՝

$$M(\xi_1 + \xi_2) = \int_{-\infty}^{\infty} u \left[\int_{-\infty}^{\infty} f(x, u - x) dx \right] du = \int_{-\infty}^{\infty} \int_{-\infty}^{\infty} u f(x, u - x) du dx =$$

$$= \int_{-\infty}^{\infty} \int_{-\infty}^{\infty} (x+z) f(x, z) dz dx :$$

Մյուս կողմից, քանի որ ξ_1 և ξ_2 պատահական մեծությունների բաշխման խտությունները որոշվում են

$$f_1(x) = \int_{-\infty}^{\infty} f(x, z) dz \quad \text{և} \quad f_2(z) = \int_{-\infty}^{\infty} f(x, z) dx :$$

հավասարություններով, ուստի՝

$$M(\xi_1 + \xi_2) = \int_{-\infty}^{\infty} x f_1(x) dx + \int_{-\infty}^{\infty} z f_2(z) dz = M\xi_1 + M\xi_2 : \quad \square$$

(M4) Եթե $\xi \geq 0$, ապա $M\xi \geq 0$: Մասնավորապես, եթե $\xi \geq 0$ և $M\xi = 0$, ապա $P\{\xi = 0\} = 1$:

Ապացույց: Այս հատկությունը կապացուցենք, նախապես ենթադրելով, որ ξ պատահական մեծությունն ունի դիսկրետ բաշխում և ընդունում է $x_n \geq 0$ արժեքներ: Քանի որ $x_n \geq 0$, ապա $\sum_{n=1}^{\infty} x_n p_n$ շարքի բոլոր անդամները ոչ բացասական են, հետևաբար՝ $M\xi = \sum_{n=1}^{\infty} x_n p_n \geq 0$:

Այժմ, եթե $M\xi = \sum_{n=1}^{\infty} x_n p_n = 0$, ապա շարքի բոլոր գումարելիները հավասար կլինեն զրոյի, այսինքն՝ բոլոր p_n հավանականությունները զրոյական են, բացի $x_n = 0$ արժեքին համապատասխան հավանականությունից: Հետևաբար՝ $P\{\xi = 0\} = 1$: \square

(M5) Եթե $\xi \geq \eta$, ապա $M\xi \geq M\eta$:

Ապացույց: Հատկություն (M5)-ը ամփոփապես բխում է հատկություն (M4)-ից:

(M6) $M(\xi - M\xi) = 0$:

Ապացույց: Օգտվելով (M2) և (M3) հատկություններից, ստանում ենք՝

$$M(\xi - M\xi) = M\xi - M(M\xi) = M\xi - M\xi = 0 : \quad \square$$

(M7) Եթե ξ_1 և ξ_2 պատահական մեծություններն անկախ են, և գոյություն ունեն դրանց մաթեմատիկական սպասելիները, ապա՝

$$M(\xi_1 \cdot \xi_2) = M\xi_1 \cdot M\xi_2 :$$

Ապացուցենք այս առնչությունը դիսկրետ պատահական մեծությունների համար:

Ենթադրենք՝ z_1, z_2, \dots թվերը $\xi_1 \cdot \xi_2$ պատահական մեծության բոլոր արժեքներն են: Համաձայն մաթեմատիկական սպասելիի սահմանմանը՝

$$M(\xi_1 \cdot \xi_2) = \sum_{k=1}^{\infty} z_k P(\xi_1 \cdot \xi_2 = z_k), \quad (7.4)$$

երե աջ մասի շարքը բացարձակ զուգամետ է: Ենթադրենք՝ x_1, x_2, \dots

թվերը ξ_1 պատահական մեծության բոլոր հնարավոր արժեքներն են, իսկ y_1, y_2, \dots թվերը՝ ξ_2 -ի: $E_k = ((x_n, y_m) : x_n \cdot y_m = z_k)$, $k = 1, 2, \dots$ բազմությունների $\{(x_n, y_m)\}_{n,m=1}^{\infty}$ հաջորդականությունը տրոհում են իրար

հետ չհատվող խմբերի այնպես, որ՝

$$P(\xi_1 \cdot \xi_2 = z_k) = \sum_{(x_n, y_m) \in E_k} P(\xi_1 = x_n, \xi_2 = y_m):$$

(7.4) հավասարության աջ մասի շարքի անդամների տեղափոխմամբ կստանանք՝

$$M(\xi_1 \cdot \xi_2) = \sum_{n=1}^{\infty} \sum_{m=1}^{\infty} x_n y_m P(\xi_1 = x_n, \xi_2 = y_m):$$

Եվ քանի որ ξ_1 և ξ_2 -ն անկախ են, ապա՝

$$P(\xi_1 = x_n, \xi_2 = y_m) = P(\xi_1 = x_n) \cdot P(\xi_2 = y_m),$$

հետևաբար՝

$$M(\xi_1 \cdot \xi_2) = \left(\sum_{n=1}^{\infty} x_n P(\xi_1 = x_n) \right) \left(\sum_{m=1}^{\infty} y_m P(\xi_2 = y_m) \right) = M\xi_1 \cdot M\xi_2 : \quad \square$$

§7.3. Ստանդարտ բաշխումների մաթեմատիկական սպասելիները

1. Դիցուք ξ պատահական մեծությունը բաշխված է բինոմական օրենքով՝ $P(\xi = k; k = 0, 1, \dots, n) = P_k = C_n^k \cdot p^k (1-p)^{n-k}$, $0 \leq p \leq 1$:

Այդ դեպքում՝

$$\begin{aligned} M\xi &= \sum_{k=0}^n kP(\xi = k) = \sum_{k=0}^n kC_n^k p^k (1-p)^{n-k} = \sum_{k=0}^n k \frac{n!}{k!(n-k)!} p^k (1-p)^{n-k} = \\ &= np \sum_{k=1}^n \frac{(n-1)!}{(k-1)!((n-1)-(k-1))!} p^{k-1} (1-p)^{(n-1)-(k-1)} = \\ &= np \sum_{l=0}^{n-1} \frac{(n-1)!}{l!(n-l)!} p^l (1-p)^{n-l} = np \cdot (p+1-p)^{n-1} = np : \end{aligned}$$

Այսպիսով, $M\xi = np$, եթե $\xi \sim B_{n,p}$:

2. Եթե ξ -ն ունի երկրաչափական բաշխում ($\xi \sim G_p$)՝

$$P_k = P(\xi = k) = q^{k-1} \cdot p, \quad k = 1, 2, \dots, \quad 0 \leq p \leq 1, \quad q = 1 - p,$$

այսինքն՝

$$\begin{aligned} M\xi &= \sum_{k=1}^{\infty} kq^{k-1}p = p \cdot \sum_{k=1}^{\infty} kq^{k-1} = p \cdot \frac{d}{dq} \left(\sum_{k=1}^{\infty} q^k \right) = \\ &= p \cdot \frac{d}{dq} \left(\frac{q}{1-q} \right) = p \cdot \frac{1}{(1-q)^2} = \frac{1}{p} : \end{aligned}$$

3. Եթե ξ -ն ունի Պուասոնյան բաշխում՝ $\xi \sim \Pi_\lambda$, այսինքն՝

$$M\xi = \sum_{k=0}^{\infty} k \frac{\lambda^k}{k!} e^{-\lambda} = \lambda \cdot e^{-\lambda} \cdot \sum_{k=0}^{\infty} \frac{\lambda^{k-1}}{(k-1)!} = \lambda \cdot e^{-\lambda} \cdot e^\lambda = \lambda :$$

4. Դիցուք ξ պատահական մեծությունը $[a, b]$ հատվածում ենթարկվում է հավասարաչափ բաշխմանը՝ $\xi \sim U_{a,b}$: Այդ դեպքում՝

$$M\xi = \int_a^b \frac{x}{b-a} dx = \frac{1}{b-a} \int_a^b x dx = \frac{1}{b-a} \cdot \frac{x^2}{2} \Big|_a^b = \frac{b^2 - a^2}{2(b-a)} = \frac{b+a}{2} :$$

5. Եթե $\xi \sim N(a, \sigma^2)$, այսինքն՝

$$\begin{aligned} M\xi &= \frac{1}{\sigma\sqrt{2\pi}} \int x e^{-\frac{(x-a)^2}{2\sigma^2}} dx = \frac{1}{\sigma\sqrt{2\pi}} \int_{-\infty}^{\infty} (x-a) e^{-\frac{(x-a)^2}{2\sigma^2}} dx + \\ &\quad + \frac{a}{\sigma\sqrt{2\pi}} \int_{-\infty}^{\infty} e^{-\frac{(x-a)^2}{2\sigma^2}} dx : \end{aligned}$$

Քանի որ

$$\int_{-\infty}^{\infty} (x-a) e^{-\frac{(x-a)^2}{2\sigma^2}} dx = \sigma^2 \int_{-\infty}^{\infty} z \cdot e^{-\frac{z^2}{2}} dz = 0,$$

(որպես կենտ ֆունկցիայի սիմետրիկ ինտեգրալ), իսկ

$$\frac{1}{\sigma\sqrt{2\pi}} \int_{-\infty}^{\infty} e^{-\frac{(x-a)^2}{2\sigma^2}} dx = \frac{1}{\sqrt{2\pi}} \int_{-\infty}^{\infty} e^{-\frac{z^2}{2}} dz = 1,$$

(որպես $N(0,1)$ նորմալ բաշխում ունեցող պատահական մեծության խտության ինտեգրալ), ապա՝ $M\xi = a$:

6. Կոշիի օրենքով բաշխված ξ պատահական մեծության համար ($\xi \sim C_{a,\sigma}$).

$$\begin{aligned} \int_{-\infty}^{\infty} |x| f_{\xi}(x) dx &= \frac{1}{\pi} \int_{-\infty}^{\infty} \frac{|x|}{1+x^2} dx = \frac{2}{\pi} \int_0^{\infty} \frac{x}{1+x^2} dx = \frac{2}{\pi} \int_0^{\infty} \frac{d(1+x^2)}{1+x^2} = \\ &= \frac{2}{\pi} \ln(1+x^2) \Big|_0^{\infty} = \infty, \end{aligned}$$

հետևաբար՝ $M\xi$ գոյություն չունի:

7. Եթե ξ -ն ունի ցուցչային բաշխում՝ $\xi \sim E_a$, ապա՝

$$\begin{aligned} M\xi &= \int_0^{\infty} x a e^{-ax} dx = a \int_0^{\infty} x e^{-ax} dx = a \cdot \left(-\frac{1}{a}\right) \int_0^{\infty} x d e^{-ax} = \\ &= -\left(x e^{-ax} \Big|_0^{\infty} - \int_0^{\infty} e^{-ax} dx\right) = \int_0^{\infty} e^{-ax} dx = -\frac{1}{a} e^{-ax} \Big|_0^{\infty} = : \\ &= -\frac{1}{a}(0-1) = \frac{1}{a}: \end{aligned}$$

§7.4. Դիսպերսիա և բարձր կարգի մոմենտներ

Դիցուք $\xi = \xi(\omega)$ պատահական մեծությունը որոշված է (Ω, \mathcal{F}, P) կամայական հավանական տարածության վրա:

Սահմանում 7.3 : Դիցուք $M|\xi|^k < \infty$: ξ պատահական մեծության n -րդ կարգի մոմենտը է կոչվում

$$v_n = M\xi^n, \quad n = 0, 1, 2, \dots$$

թիվը, իսկ n -րդ կարգի կենտրոնական մոմենտը է կոչվում

$$\mu_n = (\xi - M\xi)^n, \quad n = 0, 1, 2, \dots:$$

թիվը:

$M|\xi^n|$ թիվը կոչվում է n -րդ կարգի *բացարձակ մոմենտ*, իսկ $M|\xi - M\xi|^{n-1}$ n -րդ կարգի *կենտրոնական բացարձակ մոմենտ*, մասնավորապես, $D\xi = M(\xi - M\xi)^2$ թիվը (երկրորդ կարգի կենտրոնական մոմենտը) կոչվում է ξ պատահական մեծության *դիսպերսիա*:

Այսպիսով պատահական մեծության մաթեմատիկական սպասումն առաջին կարգի սկզբնական մոմենտն է, իսկ դիսպերսիան՝ երկրորդ կարգի կենտրոնական մոմենտը:

Օրինակ 2: $D\xi = M(\xi - M\xi)^2$ դիսպերսիան հանդիսանում է « ξ պատահական մեծության՝ իր միջինից ունեցած շեղման քառակուսու միջին արժեքը»: Պարզենք, թե ինչ է բնութագրում այս մեծությունը:

Դիցուք ξ պատահական մեծությունը հավասար հավանականություններով ընդունում է ± 1 արժեքները, իսկ η -ն՝ ± 10 արժեքները նույնպես հավասար հավանականություններով: Պարզ է, որ $M\xi = M\eta = 0$, հետևաբար՝ $D\xi = M\xi^2 = 1$, $D\eta = M\eta^2 = 100$:

Այսպիսով, ասում են, որ դիսպերսիան բնութագրում է պատահական մեծության արժեքների «ցրվածության աստիճանը» իր մաթեմատիկական սպասելիի շուրջը:

Մահմանում 7.4: $\sigma = \sqrt{D\xi}$ մեծությունը կոչվում է ξ պատահական մեծության *միջին քառակուսային շեղում*:

Որպեսզի կապ հաստատենք տարբեր կարգերի մոմենտների միջև, ապացուցենք որոշ անհավասարություններ: Նախ՝ ցույց տանք, որ բարձր կարգի մոմենտների գոյությունն ապահովում է ավելի ցածր կարգի մոմենտների գոյությունը:

Թեորեմ 7.1: *Եթե գոյություն ունի ξ պատահական մեծության $t > 0$ կարգի մոմենտը, ապա գոյություն ունեն նաև ξ -ի s -րդ կարգի մոմենտները, եթե $0 < s < t$:*

Ապացույց: Նկատենք, որ ցանկացած x թվի համար ճիշտ են հետևյալ անհավասարությունները՝

$$|x|^s \leq \max(|x|^t, 1) \leq |x|^t + 1:$$

Իսկապես, $|x|^s < |x|^t$, եթե $|x| > 1$ և $|x|^s \geq 1$, եթե $|x| \leq 1$:

Այս անհավասարությունից բխում է, որ $|\xi(\omega)|^s \leq |\xi(\omega)|^t + 1$ ցանկացած ω -ի համար, ուստի, համաձայն մաթեմատիկական սպասելիի (M5) հատկության՝

$$M|\xi|^s \leq M|\xi|^t + 1:$$

Քանի որ $M|\xi|^t < \infty$, հետևաբար՝ $M|\xi|^s < \infty$: \square

Թեորեմ 7.2 (Իենսենի անհավասարություն): *Դիցուք $g(x)$ ֆունկցիան ուռուցիկ է դեպի ներքև: Այդ դեպքում վերջավոր առաջին կարգի մոմենտ ունեցող ցանկացած ξ պատրաստական մեծության համար տեղի ունի*

$$Mg(\xi) \geq g(M\xi)$$

անհավասարությունը: Եթե $g(x)$ ֆունկցիան ուռուցիկ է դեպի վերև, ապա անհավասարության նշանը պետք է փոխել հակառակով:

Ապացույց: Դիցուք $g(x)$ ֆունկցիան ուռուցիկ է դեպի ներքև: Այդ դեպքում ցանկացած x_0 կետի համար գոյություն կունենա այնպիսի $c(x_0)$ թիվ, որ բոլոր x -երի համար

$$g(x) \geq g(x_0) + c(x_0)(x - x_0):$$

Վերջին անհավասարությունն ակնհայտ է, քանի որ ուռուցիկ դեպի ներքև ֆունկցիայի գրաֆիկը ամբողջությամբ գտնվում է իրեն տարված ցանկացած շոշափողից վերև: Այս անհավասարության մեջ տեղադրելով $x_0 = M\xi$ և $x = \xi$, կունենանք՝

$$g(\xi) \geq g(M\xi) + c(M\xi)(\xi - M\xi):$$

Հաշվենք այս անհավասարության երկու կողմերի մաթեմատիկական սպասելիները: Քանի որ $M(\xi - M\xi) = 0$, ապա, (M5) հատկության համաձայն, $Mg(\xi) \geq g(M\xi)$: \square

Հաջորդ անհավասարությունը կապ է հաստատում տարբեր կարգերի մոմենտների միջև:

Հետևանք 7.1: *Եթե $M|\xi|^t < \infty$, ապա՝*

$$\left(M|\xi|^s\right)^{1/s} \leq \left(M|\xi|^t\right)^{1/t}$$

եթե $0 < s < t$:

Ապացույց: Քանի որ $0 < s < t$, ապա $g(x) = |x|^{t/s}$ ֆունկցիան ուռուցիկ է դեպի ներքև: Կիրառելով Իենսենի անհավասարությունը $\eta = |\xi|^s$ պատահական մեծության նկատմամբ, կստանանք՝

$$\left(M|\xi|^s\right)^{t/s} = (M\eta)^{t/s} = g(M\eta) \leq M g(\eta) = M|\eta|^{t/s} = M|\xi|^{s \cdot t/s} = M|\xi|^t :$$

Հետևաբար՝

$$\left(\left(M|\xi|^s\right)^{t/s}\right)^{1/t} = \left(M|\xi|^s\right)^{1/s} \leq \left(M|\xi|^t\right)^{1/t} : \quad \square$$

Իենսենի անհավասարությունից ստացվում են, օրինակ, հետևյալ անհավասարությունները՝

$$\begin{aligned} M e^{\xi} &\geq e^{M\xi}, & M \xi^2 &\geq (M\xi)^2, & M|\xi| &\geq |M\xi|, \\ M \ln \xi &\leq \ln M\xi, & M \frac{1}{\xi} &\geq \frac{1}{M\xi}, & M\sqrt{\xi} &\leq \sqrt{M\xi} : \end{aligned}$$

Վերջին երեք անհավասարությունները ճիշտ են միայն դրական ξ -երի համար:

§7.5. Դիսպերսիայի հատկությունները

Դիսպերսիայի հատկությունները բխում են մաթեմատիկական սպասելիի համապատասխան հատկություններից: Նկատենք, որ երկրորդ կարգի մոմենտի գոյությունից հետևում են մաթեմատիկական սպասելիի գոյությունը և դիսպերսիայի վերջավորությունը: Ստորև բերված բոլոր հատկություններում ենթադրվում է պատահական մեծությունների երկրորդ կարգի մոմենտի գոյությունը:

(D1) Դիսպերսիայի համար տեղի ունի հետևյալ բանաձևը՝

$$D\xi = M\xi^2 - (M\xi)^2 :$$

Ապացույց: Նշանակենք $a = M\xi$: Այդ դեպքում՝

$$\begin{aligned} D\xi &= M(\xi - a)^2 = M(\xi^2 - 2a\xi + a^2) = \\ &= M\xi^2 - 2aM\xi + a^2 = M\xi^2 - a^2 : \end{aligned} \quad \square$$

(D2) Ցանկացած c հաստատունի համար՝

$$D(c\xi) = c^2 D\xi, \quad D(\xi + c) = D\xi, \quad Dc = 0 :$$

Վարժություն: Ապացուցել (D2) հատկությունը:

(D3) Եթե ξ_1 և ξ_2 պատահական մեծություններն անկախ են, ապա

$$D(\xi_1 + \xi_2) = D\xi_1 + D\xi_2:$$

Ապացույց: Իրոք,

$$\begin{aligned} D(\xi_1 + \xi_2) &= M(\xi_1 + \xi_2)^2 - (M(\xi_1 + \xi_2))^2 = \\ &= M\xi_1^2 + M\xi_2^2 + 2M(\xi_1\xi_2) - (M\xi_1)^2 - (M\xi_2)^2 - 2M\xi_1M\xi_2 = D\xi_1 + D\xi_2, \end{aligned}$$

քանի որ անկախ պատահական մեծությունների արտադրյալի մաթեմատիկական սպասելին հավասար է դրանց մաթեմատիկական սպասելիների արտադրյալին: \square

Մաթեմատիկական սպասման հետևյալ կարևոր հատկությունը թույլ է տալիս ստանալ նոր ներկայացում դիսպերսիայի համար:

§7.6. Ստանդարտ բաշխումների դիսպերսիաները

1. Դիցուք ξ պատահական մեծությունը բաշխված է բինոմական օրենքով՝ $\xi \sim B_{n,p}$: Այդ դեպքում $M\xi = np$ և

$$\begin{aligned} M\xi^2 &= \sum_{k=0}^n k^2 C_n^k p^k (1-p)^{n-k} = \sum_{k=0}^n k^2 \frac{n!}{k!(n-k)!} p^k (1-p)^{n-k} = \\ &= \sum_{k=1}^n k \frac{n!}{(k-1)!(n-k)!} p^k (1-p)^{n-k} = \sum_{k=1}^n (k-1+1) \frac{n!}{(k-1)!(n-k)!} p^k (1-p)^{n-k} = \\ &= \sum_{k=1}^n (k-1) \frac{n!}{(k-1)!(n-k)!} p^k (1-p)^{n-k} + \sum_{k=1}^n \frac{n!}{(k-1)!(n-k)!} p^k (1-p)^{n-k} = \\ &= \sum_{k=2}^n \frac{n!}{(k-2)!(n-k)!} p^k (1-p)^{n-k} + np = \\ &= n(n-1)p^2 \sum_{l=0}^{n-2} \frac{(n-2)!}{l!(n-2-l)!} p^l (1-p)^{n-2-l} + np = \\ &= n(n-1)p^2 \cdot (p+1-p)^{n-2} + np = n^2p^2 - np^2 + np: \end{aligned}$$

Հետևաբար՝

$$D\xi = M\xi^2 - (M\xi)^2 = n^2p^2 - np^2 + np - (np)^2 = np(1-p):$$

2. Եթե ξ -ն ունի երկրաչափական բաշխում՝ $\xi \sim G_p$, ապա $M\xi = \frac{1}{p}$: Հաշվենք ξ -ի երկրորդ ֆակտորիալ մոմենտը՝

$$\begin{aligned} M\xi(\xi-1) &= \sum_{k=1}^{\infty} k(k-1)q^{k-1}p = pq \sum_{k=0}^{\infty} \frac{d^2 q^k}{dq^2} = pq \cdot \frac{d^2}{dq^2} \left(\sum_{k=0}^{\infty} q^k \right) = \\ &= pq \cdot \frac{d^2}{dq^2} \left(\frac{q}{1-q} \right) = pq \cdot \frac{2}{(1-q)^3} = \frac{2q}{p^2} : \end{aligned}$$

Այժմ, օգտվելով ֆակտորիալ մոմենտից, գտնենք երկրաչափական բաշխման դիսպերսիան՝

$$D\xi = M\xi(\xi-1) + M\xi - (M\xi)^2 = \frac{2q}{p^2} + \frac{1}{p} - \frac{1}{p^2} = \frac{q}{p^2} :$$

3. $\xi \sim \Pi_\lambda$ Պուասոնյան բաշխում ունեցող պատահական մեծության համար ունենք $M\xi = \lambda$, հետևաբար՝

$$\begin{aligned} D\xi &= M\xi^2 - (M\xi)^2 = \sum_{k=0}^{\infty} k^2 \frac{\lambda^k}{k!} e^{-\lambda} - \lambda^2 = \\ &= \lambda \cdot e^{-\lambda} \cdot \sum_{k=1}^{\infty} k \frac{\lambda^{k-1}}{(k-1)!} - \lambda^2 = \lambda \cdot e^{-\lambda} \cdot \sum_{k=1}^{\infty} ((k-1) + 1) \frac{\lambda^{k-1}}{(k-1)!} - \lambda^2 = \\ &= \lambda \cdot e^{-\lambda} \cdot \sum_{k=1}^{\infty} (k-1) \frac{\lambda^{k-1}}{(k-1)!} + \lambda \cdot e^{-\lambda} \cdot \sum_{k=1}^{\infty} \frac{\lambda^{k-1}}{(k-1)!} - \lambda^2 = \\ &= \lambda^2 \cdot e^{-\lambda} \cdot \sum_{k=2}^{\infty} \frac{\lambda^{k-2}}{(k-2)!} + \lambda - \lambda^2 = \lambda : \end{aligned}$$

4. $[a, b]$ հատվածում $U_{a,b}$ հավասարաչափ բաշխման համար՝

$$M\xi^2 = \frac{1}{b-a} \int_a^b x^2 dx = \frac{1}{3}(a^2 + ab + b^2),$$

$$D\xi = M\xi^2 - (M\xi)^2 = \frac{1}{3}(a^2 + ab + b^2) - \left(\frac{a+b}{2} \right)^2 = \frac{(b-a)^2}{12} :$$

5. $N(a, \sigma^2)$ նորմալ օրենքի համար՝

$$D\xi = M(\xi - a)^2 = \frac{1}{\sigma\sqrt{2\pi}} \int_{-\infty}^{\infty} (x-a)^2 e^{-\frac{(x-a)^2}{2\sigma^2}} dx .$$

Կատարելով $z = \frac{x-a}{\sigma}$, կստանանք $x = z\sigma + a$, $dx = \sigma dz$: Հետևաբար.

$$\begin{aligned} M(\xi - a)^2 &= \frac{\sigma^2}{\sqrt{2\pi}} \int_{-\infty}^{\infty} z^2 e^{-\frac{z^2}{2}} dz = -\frac{2\sigma^2}{\sqrt{2\pi}} \int_0^{\infty} z de^{-\frac{z^2}{2}} = \\ &= -\frac{2\sigma^2}{\sqrt{2\pi}} \left(ze^{-\frac{z^2}{2}} \Big|_0^{\infty} - \int_0^{\infty} e^{-\frac{z^2}{2}} dz \right) = \frac{2\sigma^2}{\sqrt{2\pi}} \sqrt{\frac{\pi}{2}} = \sigma^2: \end{aligned}$$

6. Բաշխման ցուցչային օրենքի համար՝

$$\begin{aligned} M\xi^2 &= \int_0^{\infty} x^2 ae^{-ax} dx = - \left(x^2 e^{-ax} \Big|_0^{\infty} - 2 \int_0^{\infty} xe^{-ax} dx \right) = -\frac{2}{a} \int_0^{\infty} x de^{-ax} = \\ &= -\frac{2}{a} \left(xe^{-ax} \Big|_0^{\infty} - \int_0^{\infty} e^{-ax} dx \right) = \frac{2}{a^2}, \end{aligned}$$

$$D\xi = M\xi^2 - (M\xi)^2 = \frac{2}{a^2} - \frac{1}{a^2} = \frac{1}{a^2}:$$

§7.7. Բաշխումների այլ թվային բնութագրիչներ

Պատահական մեծությունների բաշխումները կարելի է բնութագրել մի շարք այլ ցուցանիշներով, որոնց մեծ մասը լայն կիրառություն է գտել մաթեմատիկական վիճակագրությունում:

ξ պատահական մեծության բաշխման *միջին* է կոչվում

$$P(\xi \leq \mu) \geq \frac{1}{2}, \quad P(\xi \geq \mu) \leq \frac{1}{2}$$

անհավասարությունները բավարարող μ թվերից յուրաքանչյուրը:


Բաշխման միջինը միշտ գոյություն ունի, սակայն այն կարող է չլինել միակը: Օրինակ, եթե ξ -ն ունի բինոմական բաշխում 3 և $1/2$ պարամետրերով, ապա այս բաշխման միջինը $[1, 2]$ հատվածի կամայական թիվ է: Իրոք, այս դեպքում ξ -ն ընդունում է 0, 1, 2 և 3 արժեքներ՝ համապատասխանաբար $\frac{1}{8}, \frac{3}{8}, \frac{3}{8}$ և $\frac{1}{8}$ հավանականություններով, հետևաբար ցանկացած $\mu \in [1, 2]$ թվի համար՝

$$P(\xi \leq \mu) \geq \frac{1}{2}, \quad P(\xi \geq \mu) \leq \frac{1}{2}:$$

Եթե ξ պատահական մեծության բաշխումը բացարձակ անընդհատ է, իսկ բաշխման ֆունկցիան խիստ մոնոտոն, ապա միջինը $F(\mu) = \frac{1}{2}$ հավասարման միակ լուծումն է: Թվային ուղղի վրա այս կետից աջ և ձախ կուտակված է ամբողջ հավանականային զանգվածի ուղիղ կեսը (նկ. 7.1): Եթե գոյություն ունի բաշխման f խտությունը, ապա խտության գրաֆիկի տակ μ կետից աջ և ձախ գտնվող տիրույթներն ունեն միևնույն մակերեսները:

Ընդհանրապես, միջինը բաշխման քանորդիչներից մեկն է: Պարզության համար ենթադրենք, որ $F(x)$ բաշխման ֆունկցիան խիստ մոնոտոն է, այդ դեպքում $\delta \in (0,1)$ մակարդակի քանորդիչ կանվանենք $F(x_\delta) = \delta$ հավասարման լուծումը:

Համաձայն սահմանման δ մակարդակի՝ x_δ քանորդիչը բաշխման խտության գրաֆիկի տակ գտնվող տիրույթը տրոհում է այնպիսի երկու տիրույթների, որ իրենից ձախ գտնվող տիրույթն ունի δ մակերես, իսկ աջ տիրույթը՝ $1 - \delta$ (նկ. 7.1):



Նկ. 7.1. Միջինը և քանորդիչները բաշխման ֆունկցիայի և խտության գրաֆիկների վրա.

Բացարձակ անընդհատ բաշխման խտության գրաֆիկի ցանկացած լոկալ մաքսիմումի կետ կոչվում բաշխման *մոդ*: Դիսկրետ բաշխումների համար մոդ են համարում այն բոլոր a_i արժեքները, որոնց հավանականությունները ավելի մեծ են, քան հարևան արժեքների հավանականությունները:

$N(a, \sigma^2)$ նորմալ բաշխման միջինը, մաթեմատիկական սպասելին և մոդան համընկնում են և հավասար են a -ի: Եթե բաշխումն ունի

միայն մեկ մոդա, ապա այն անվանում են *ունիմոդալ*: Ունիմոդալ բաշխման վառ օրինակ է նորմալ բաշխումը: Ունիմոդալ բաշխման խտության գրաֆիկը նորմալ բաշխման խտության գրաֆիկի համեմատ կարող է լինել ինչպես ավելի հարթ (հավասարաչափ բաշխում), այնպես էլ ավելի «սրագագաթ», կարող է լինել սիմետրիկ, կամ թեքված որևէ կողմ: Բաշխման խտության այս հատկությունները բնութագրվում են *ասիմետրիայի* և *էքսցեսի* գործակիցներով:

Վերջավոր երրորդ կարգի մոմենտ ունեցող բաշխման ասիմետրիայի գործակից է կոչվում

$$\beta_1 = M\left(\frac{\xi - a}{\sigma}\right)^3$$

թիվը, որտեղ $a = M\xi$, $\sigma = \sqrt{D\xi}$: Սիմետրիկ բաշխումների համար $\beta_1 = 0$: Եթե $\beta_1 > 0$, ապա բաշխման խտության գրաֆիկն աջից ունի ավելի թեքություն, քան ձախից, իսկ $\beta_1 < 0$ դեպքում՝ ընդհակառակը:

Վերջավոր չորրորդ կարգի մոմենտ ունեցող բաշխման էքսցեսի գործակից է կոչվում

$$\beta_1 = M\left(\frac{\xi - a}{\sigma}\right)^4 - 3$$

թիվը: Բոլոր նորմալ բաշխումների համար էքսցեսի գործակիցը հավասար է զրոյի: Իրոք, եթե $\xi \sim N(a, \sigma^2)$, ապա $\eta = \frac{\xi - a}{\sigma}$ մեծությունն ունի ստանդարտ նորմալ բաշխում, որի չորրորդ կարգի մոմենտը հավասար է 3-ի՝ $M\eta^4 = 3$ (համոզվել ինքնուրույն), հետևաբար՝ $\beta_2 = 0$: Երբ $\beta_2 > 0$, ապա բաշխման խտության գրաֆիկը նորմալ բաշխման համեմատ ունի ավելի սուր գագաթ, իսկ $\beta_2 < 0$ դեպքում՝ ավելի հարթ:

§7.8. Պատահական մեծությունների կովարիացիա.

կոռելյացիայի գործակից

ξ_1 և ξ_2 պատահական մեծությունները միմյանց հետ կարող են կապված լինել ֆունկցիոնալ կապով, օրինակ, $\xi_1 = a\xi_2 + b$, $\xi_1 = \xi_2^2$,

$\xi_1 = \sin \xi_2$ և այլն: Սակայն փոխկապակցվածությունը կարող է լինել նաև ստոխաստիկ բնույթի, երբ մի պատահական մեծության պայմանական բաշխման օրենքը փոփոխվում է՝ կախված մյուսի արժեքներից: Պատահական մեծությունների ստոխաստիկ փոխկապակցվածությունը բնութագրվում է երկու պատահական մեծությունների *կովարիացիայի* միջոցով: Ինչպես հայտնի է, դիսպերսիայի հատկություններից վերջավոր երկրորդ կարգի մոմենտ ունեցող անկախ պատահական մեծությունների գումարի դիսպերսիան հավասար է այդ մեծությունների դիսպերսիաների գումարին, իսկ ընդհանուր դեպքում՝

$$D(\xi_1 + \xi_2) = D\xi_1 + D\xi_2 + 2(M(\xi_1\xi_2) - M\xi_1M\xi_2):$$

Մաթեմատիկական սպասելիի (M7) հատկության համաձայն՝ $M(\xi_1\xi_2) - M\xi_1M\xi_2$ մեծությունը հավասար է զրոյի, եթե ξ_1 և ξ_2 պատահական մեծություններն անկախ են: Չնայած որ $M(\xi_1\xi_2) - M\xi_1M\xi_2 = 0$ հավասարությունից դեռ չի բխում ξ_1 և ξ_2 պատահական մեծությունների անկախությունը, սակայն այս մեծությունը կարող է ծառայել որպես պատահական մեծությունների փոխկապակցվածության ցուցանիշ:

Սահմանում 7.5: ξ_1 և ξ_2 պատահական մեծությունների *կովարիացիա* է կոչվում

$$\text{cov}(\xi_1, \xi_2) = M(\xi_1 - M\xi_1)(\xi_2 - M\xi_2) \quad (7.5)$$

թիվը:

Օգտվելով կովարիացիայի սահմանումից և մաթեմատիկական սպասելիի հատկություններից՝ հեշտ է ցույց տալ, որ տեղի ունեն հետևյալ հատկությունները.

1. $\text{cov}(\xi_1, \xi_2) = M\xi_1\xi_2 - M\xi_1M\xi_2$
2. եթե ξ_1 -ը և ξ_2 -ը անկախ են, ապա $\text{cov}(\xi_1, \xi_2) = 0$, սակայն հակառակ պնդումը ճիշտ չէ;
3. $\text{cov}(\xi_1, \xi_2) = \text{cov}(\xi_2, \xi_1)$;
4. $\text{cov}(\xi, \xi) = D\xi$;
5. $\text{cov}(C \cdot \xi_1, \xi_2) = C \cdot \text{cov}(\xi_1, \xi_2)$, որտեղ C կամայական հաստատուն է:

Վարժություն: Ապացուցել վերը նշված հատկությունները:

$\xi = (\xi_1, \dots, \xi_n)$ պատահական վեկտորի կովարիացիոն մատրից է կոչվում

$$\Sigma = \begin{pmatrix} \sigma_{11} & \sigma_{12} & \dots & \sigma_{1n} \\ \sigma_{21} & \sigma_{22} & \dots & \sigma_{2n} \\ \dots & \dots & \dots & \dots \\ \sigma_{n1} & \sigma_{n2} & \dots & \sigma_{nn} \end{pmatrix}$$

մատրիցը, որտեղ $\sigma_{ij} = \text{cov}(\xi_i, \xi_j)$, $i, j = \overline{1, n}$: Անմիջապես կովարիացիայի հատկություններից հետևում է, որ կովարիացիոն մատրիցը համաչափ է, $\sigma_{ii} = D\xi$, $i = \overline{1, n}$:

Հատկություն 4-ից պարզ է, որ կովարիացիան գծորեն կախված է պատահական մեծությունների չափման մասշտաբից (այսինքն, եթե $\xi = C \cdot \zeta \Rightarrow \text{cov}(\xi, \eta) = C \cdot \text{cov}(\zeta, \eta)$): Այդ պատճառով հաճախ ավելի նպատակահարմար է դիտարկել, այսպես կոչված, նորմավորված պատահական մեծություններ:

Կասենք, որ ξ պատահական մեծությունը նորմավորված է, եթե $M\xi = 0$ և $D\xi = 1$: Նկատենք, որ $(\xi - M\xi) / \sqrt{D\xi}$ ձևափոխությունը հանգեցնում է նորմավորված պատահական մեծության: Իսկապես՝

$$M\left(\frac{\xi - M\xi}{\sqrt{D\xi}}\right) = \frac{M\xi - M\xi}{\sqrt{D\xi}} = 0,$$

$$D\left(\frac{\xi - M\xi}{\sqrt{D\xi}}\right) = M\left(\frac{\xi - M\xi}{\sqrt{D\xi}}\right)^2 - 0 = \frac{M(\xi - M\xi)^2}{(\sqrt{D\xi})^2} = \frac{D\xi}{D\xi} = 1:$$

$$\text{Դիցուք՝ } \xi_1 = \frac{\xi - M\xi}{\sqrt{D\xi}} \text{ և } \eta_1 = \frac{\eta - M\eta}{\sqrt{D\eta}}:$$

Սահմանում 7.6: ξ և η պատահական մեծությունների կոռելյացիայի գործակից՝ $\rho(\xi, \eta)$, անվանում են հետևյալ մեծությունը՝

$$\rho(\xi, \eta) = \frac{\text{cov}(\xi, \eta)}{\sqrt{D\xi D\eta}} = \text{cov}(\xi_1, \eta_1) = M\xi_1 \eta_1:$$

Հատկություն 1: $\rho(\xi, \eta) = \text{cov}(\xi_1, \eta_1) = M\xi_1 \eta_1$:

Հատկություն 2: $|\rho(\xi, \eta)| \leq 1$:

Իսկապես, $D(\xi_1 \pm \eta_1) \geq 0$ և

$$\begin{aligned} D(\xi_1 \pm \eta_1) &= M(\xi_1 \pm \eta_1)^2 = M\xi_1^2 \pm 2M\xi_1\eta_1 + M\eta_1^2 = \\ &= 1 \pm 2\rho(\xi, \eta) + 1 = 2 \pm 2\rho(\xi, \eta) : \end{aligned} \quad \square$$

Հատկություն 2: Եթե ξ և η -ն անկախ են, ապա $\rho(\xi, \eta) = 0$:

Հատկություն 3: $|\rho(\xi, \eta)| = 1$ այն և միայն այն դեպքում, երբ ξ -ն և η -ն հ.ա. գծորեն կապված են, այսինքն՝ գոյություն ունեն այնպիսի a և b հաստատուններ, որ $P(\eta = a\xi + b) = 1$:

Ապացույց: Եթե $\eta = a\xi + b$, ապա՝

$$\begin{aligned} |\rho(\xi, \eta)| &= \left| M \left[\frac{\xi - M\xi}{\sqrt{D\xi}} \cdot \frac{a\xi + b - aM\xi - b}{\sqrt{D(a\xi + b)}} \right] \right| = \left| M \left[\frac{\xi - M\xi}{\sqrt{D\xi}} \cdot \frac{a(\xi - M\xi)}{|a|\sqrt{D\xi}} \right] \right| = \\ &= \left| \frac{a}{|a|} \cdot \frac{M(\xi - M\xi)^2}{|D\xi|} \right| = 1 : \end{aligned}$$

Այժմ ենթադրենք, որ $\rho(\xi, \eta) = 1$: Այդ դեպքում՝

$$\begin{aligned} M(\xi_1 - \eta_1)^2 &= M(\xi_1^2 - 2M\xi_1 \cdot \eta_1 + \eta_1^2) = M\xi_1^2 - 2M\xi_1 \cdot \eta_1 + M\eta_1^2 = \\ &= 1 - 2\rho(\xi \cdot \eta) + 1 = 2(1 - \rho(\xi \cdot \eta)) = 0 \end{aligned}$$

Այսինքն՝ $\zeta = (\xi_1 - \eta_1)^2$ պատահական մեծության համար ունենք՝
 $\zeta = (\xi_1 - \eta_1)^2 \geq 0$ և $M\zeta = 0$:

Մաթեմատիկական սպասման հատկություն 3-ից ստացվում է, որ $P(\zeta = 0) = 1$, ինչն էլ տալիս է ξ և η պատահական մեծությունների գծային կախվածությունը: Նույն ձևով դիտարկվում է $\rho(\xi, \eta) = -1$ դեպքը: □

Գ Լ ՈՒ Խ 8

ՀԱՎԱՆԱԿԱՆՈՒԹՅՈՒՆՆԵՐԻ ՏԵՍՈՒԹՅԱՆ ՄԱՀՄԱՆԱՅԻՆ ԹԵՈՐԵՄՆԵՐ

§8.1. Չեբիշևի անհավասարությունները: Մեծ թվերի օրենքը

Հավանականությունների տեսության «Սահմանային թեորեմներ» բաժինը սկսվում է անկախ պատահական մեծությունների գումարի սահմանային բաշխումից: Մեծ թվով պատահական մեծությունների գումարը դիտարկելիս հայտնաբերում ենք, որ գումարելիս շեղումների մասնակի մարումն առաջացնում է միջին թվաբանականի ցրման փոքրացում, ինչը թույլ է տալիս գուշակել նրա վարքը: Օրինակ, անկախ միատեսակ բաշխված պատահական մեծությունների միջին թվաբանականը, նրանց քանակի մեծացմանը զուգընթաց, «մոտենում» է մաթեմատիկական սպասմանը: Նմանատիպ օրինաչափությունները և դրանց առաջացման պայմանները կազմում են «մեծ թվերի օրենք» անվանումը կրող մաթեմատիկական թեորեմների բովանդակությունը: Պարզվում է, որ որոշ բավականաչափ ընդհանուր պայմանների դեպքում մեծ թվով անկախ պատահական մեծությունների գումարի բաշխումը մոտենում է նորմալին: Վերջինս էլ կենտրոնական սահմանային թեորեմի բովանդակությունն է:

Դիցուք $\xi = \xi(\omega)$ պատահական մեծությունը որոշված է (Ω, \mathcal{F}, P) հավանականային տարածության վրա: Հետևյալ երկու անհավասարությունները կոչվում են **Չեբիշևի անհավասարություններ**:

1. Եթե $\xi(\omega) \geq 0$, $\forall \omega \in \Omega$, ապա $\forall \varepsilon > 0$

$$P(\xi \geq \varepsilon) \leq \frac{M\xi}{\varepsilon} : \quad (8.1)$$

2. Եթե ξ պարահական մեծությունն ունի վերջավոր դիսպերսիա, ապա $\forall \varepsilon > 0$

$$P(|\xi - M\xi| \geq \varepsilon) \leq \frac{D\xi}{\varepsilon^2} : \quad (8.2)$$

Նկատենք, որ (8.2) անհավասարությունը (8.1)-ի հետևանքն է: Իսկապես, եթե վերցնենք $\eta(\omega) = (\xi - M\xi)^2$, $\forall \omega \in \Omega$, ապա կունենանք $\eta(\omega) \geq 0$ և $M\eta = M(\xi - M\xi)^2 = D\xi$: Այժմ (8.1)-ը կիրառելով η -ի նկատմամբ, կստանանք՝

$$P(\eta \geq \varepsilon^2) \leq \frac{M\eta}{\varepsilon^2},$$

կամ

$$P(|\xi - M\xi| \geq \varepsilon) \leq \frac{D\xi}{\varepsilon^2} :$$

Մնում է ապացուցել (8.1)-ը: Ներմուծենք հետևյալ գաղափարը:

Սահմանում 8.1: A պատահույթի *ինդիկատոր* կանվանենք $I(A)$ մեծությունը, որը հավասար է մեկի, եթե A պատահույթը տեղի է ունեցել, և զրոյի, եթե A -ն տեղի չի ունեցել:

Համաձայն սահմանման՝ $I(A)$ մեծությունն ունի Բեռնուլիի բաշխում՝ $p = P(I(A) = 1) = P(A)$ պարամետրով, որի մաթեմատիկական սպասելիին հավասար է հաջողության հավանականությանը՝ $M(I(A)) = p = P(A)$: Պարզ է, որ $I(A) + I(\bar{A}) = 1$: Հետևաբար, որպես A պատահույթ վերցնելով $A = \{\omega : \xi(\omega) \geq \varepsilon\}$, կունենանք՝

$$\xi = \xi \cdot I(\xi \geq \varepsilon) + \xi \cdot I(\xi < \varepsilon) \geq \xi \cdot I(\xi \geq \varepsilon) \geq \varepsilon \cdot I(\xi \geq \varepsilon),$$

որտեղից՝

$$M\xi \geq M(\varepsilon \cdot I(\xi \geq \varepsilon)) \geq \varepsilon \cdot M(I(\xi \geq \varepsilon)) \geq \varepsilon \cdot P(\xi \geq \varepsilon): \quad \square$$

Չեփիշկի անհավասարությունը թույլ է տալիս ապացուցել որոշ սահմանային առնչություններ վերջավոր դիսպերսիաներով անկախ պատահական մեծությունների հաջորդականությունների համար:

Թեորեմ 8.1 (Չեփիշկ): *Եթե գոյություն ունի $c > 0$ այնպիսի հասարակություն, որ $D\xi_n \leq c$, $n = 1, 2, \dots$, ապա $\forall \delta > 0$*

$$\lim_{n \rightarrow \infty} P\left(\left|\frac{1}{n} \sum_{k=1}^n \xi_k - \frac{1}{n} \sum_{k=1}^n M\xi_k\right| \geq \delta\right) = 0 : \quad (8.3)$$

Ապացույց: Նշանակենք $\zeta_n = \xi_1 + \xi_2 + \dots + \xi_n$ և կիրառենք (8.2) անհավասարությունը ζ_n / n պատահական մեծության նկատմամբ $\varepsilon = \delta$ դեպքում: Կստանանք՝

$$\begin{aligned} P\left(\left|\frac{\zeta_n}{n} - \frac{M\zeta_n}{n}\right| \geq \delta\right) &\leq \frac{D\left(\frac{\zeta_n}{n}\right)}{\delta^2} = \frac{D\zeta_n}{\delta^2 n^2} = \frac{D\xi_1 + \dots + D\xi_n}{\delta^2 n^2} = \\ &= \frac{n \cdot D\xi_k}{\delta^2 n^2} \leq \frac{c}{\delta^2 n} \rightarrow 0, \quad n \rightarrow \infty: \quad \square \end{aligned} \quad (8.4)$$

Դիտողություն: Թեորեմի ապացուցման ընթացքում ստացանք հետևյալ օգտակար գնահատականը անկախ միատեսակ բաշխված պատահական մեծությունների միջին թվաբանականի վերաբերյալ՝

$$P\left(\left|\frac{\xi_1 + \dots + \xi_n}{n} - M\xi_1\right| \geq \delta\right) \leq \frac{D\xi_1}{n\delta^2}:$$

(8.4) անհավասարությունում $\xi_1, \xi_2, \dots, \xi_n$ պատահական մեծությունների անկախության պայմանը կարելի է փոխարինել ավելի թույլ՝

$$\lim_{n \rightarrow \infty} \left(\frac{D(\xi_1 + \dots + \xi_n)}{n} \right) = 0 \quad (8.5)$$

պայմանով: Իրոք, այս դեպքում նույնպես (8.4)-ից, երբ $n \rightarrow \infty$ կստանանք (8.3):

Այսպիսով, $\xi_1, \xi_2, \dots, \xi_n$ պատահական մեծությունների համար տեղի ունի Չեբիշևի թեորեմի ընդհանրացումը:

Թեորեմ 8.2 (Մարկով): *Եթե տեղի ունի (8.5) պայմանը, ապա $\forall \delta > 0$ թվի համար տեղի ունի (8.3) սահմանային առնչությունը:*

Անմիջապես Չեբիշևի թեորեմից բխում է հետևյալ պնդումը:

Հետևանք: *Եթե $\xi_1, \xi_2, \dots, \xi_n$ պատահական մեծություններն անկախ են և միատեսակ բաշխված, ընդ որում, եթե*

$$M\xi_n = a, \quad D\xi_n = \sigma^2 < \infty, \quad n \geq 1, \quad (8.6)$$

ապա $\forall \delta > 0$ թվի համար տեղի ունի

$$\lim_{n \rightarrow \infty} P\left\{\left|\frac{\xi_1 + \xi_2 + \dots + \xi_n}{n} - a\right| \geq \delta\right\} = 0 \quad (8.7)$$

հավասարությունը:

(8.7) պնդումն անկախ միանման բաշխված պատահական մեծությունների համար, առանց (8.6)-ի երկրորդ պայմանի, ներկայացնում է *Խինչինի թեորեմը*:

(8.3), (8.7) տիպի սահմանային հավասարությունները կրում են *մեծ թվերի օրենք* անվանումը: Մեծ թվերի օրենքը նաև պատահական մեծությունների հաջորդականության *զուգամիություն* տեսակ է:

Դիցուք ξ_1, ξ_2, \dots պատահական մեծությունները որոշված են միևնույն (Ω, \mathcal{F}, P) հավանականային տարածության վրա:

Սահմանում 8.2: Կասենք, որ պատահական մեծությունների $\{\xi_n\}_{n=1}^\infty$ հաջորդականությունը *ըստ հավանականության զուգամի-*

ություն է ξ պատահական մեծությանը, երբ $n \rightarrow \infty$, և կգրենք $\xi_n \xrightarrow[n \rightarrow \infty]{P} \xi$, եթե $\forall \varepsilon > 0$.

$$\lim_{n \rightarrow \infty} P\{\omega : |\xi_n - \xi| \geq \varepsilon\} = 0 \quad (\text{կամ } \lim_{n \rightarrow \infty} P\{|\xi_n - \xi| < \varepsilon\} = 1): \quad (8.8)$$

Օգտվելով այս սահմանումից՝ Խինչինի թեորեմը կարելի է ձևակերպել հետևյալ կերպ.

Եթե $\xi_1, \xi_2, \dots, \xi_n$ պատահական մեծություններն անկախ են և $M\xi_k = a$, $k = 1, 2, \dots$, ապա՝

$$\frac{1}{n}(\xi_1 + \xi_2 + \dots + \xi_n) \xrightarrow[n \rightarrow \infty]{P} a :$$

Գործնական խնդիրներ լուծելիս հաճախ անհրաժեշտություն է առաջանում հաշվելու տարբեր պատահույթների հավանականությունները՝ կապված Բեռնուլիի սխեմայում n անկախ փորձերի ժամանակ «հաջողությունների» հանդես գալու թվի հետ: Նշանակենք μ_n -ով Բեռնուլիի n անկախ փորձերում «հաջողությունների» թիվը, իսկ ξ_k -ով՝ k -րդ փորձում «հաջողությունների» թիվը (պարզ է, որ ξ_k -ն ընդունում է 0 կամ 1 արժեքներ): Նկատենք, որ μ_n -ը կարող ենք ներկայացնել n անկախ միատեսակ բաշխված պատահական մեծությունների գումարի տեսքով՝

$$\mu_n = \xi_1 + \xi_2 + \dots + \xi_n, \quad (8.9)$$

որտեղ $P(\xi_k = 1) = p$, $P(\xi_k = 0) = 1 - p$: Պարզ է, որ $M\xi_k = p$,

$D\xi_k = p(1 - p)$, $k = 1, 2, \dots$:

Դժվար չէ համոզվել, որ $D\xi_k$ դիսպերսիաները սահմանափակված են միևնույն հաստատուն թվով՝

$$D\xi_k \leq \frac{1}{4},$$

հետևաբար, (8.9) գումարի նկատմամբ կիրառելով Չեբիշևի թեորեմը, կստանանք հետևյալը:

Թեորեմ 8.3 (Բեռնուլիի): *Դիցուք n անկախ փորձերից յուրաքանչյուրում «հաջողության» հավանականությունը հավասար է p -ի: Այդ դեպքում*

$\frac{\mu_n}{n} \xrightarrow{P} p$ և կամայական $\varepsilon > 0$ թվի համար

$$P\left(\left|\frac{\mu_n}{n} - p\right| \geq \varepsilon\right) \leq \frac{p(1-p)}{n\varepsilon^2}: \quad (8.10)$$

Օրինակ 1: Դիցուք կանոնավոր մետաղադրամը նետվում է 10^4 անգամ: Գնահատենք հավանականությունը, որ զինանշանի ի հայտ գալու հաճախականությունը կտարբերվի 0,5-ից ոչ պակաս, քան 0,01-ով:

Դիցուք $\xi_1, \xi_2, \dots, \xi_n$ -ը $p = 1/2$ պարամետրով Բեռնուլիի բաշխում ունեցող անկախ պատահական մեծություններ են, որոնցից յուրաքանչյուրն ընդունում է 1 արժեք, եթե համապատասխան նետման արդյունքում հայտվել է զինանշան և 0 արժեք՝ հակառակ դեպքում: Օգտվելով (8.10) առնչությունից, գնահատենք

$P\left(\left|\frac{\mu_n}{n} - \frac{1}{2}\right| \geq 0,01\right)$ հավանականությունը, որտեղ $n = 10^4$, իսկ $\mu_n = \xi_1 + \xi_2 + \dots + \xi_n$ զինանշանի ի հայտ գալու թիվն է.

$$P\left(\left|\frac{\mu_n}{n} - \frac{1}{2}\right| \geq 0,01\right) \leq \frac{p(1-p)}{n \cdot 0,01^2} = \frac{\frac{1}{2} \cdot \left(1 - \frac{1}{2}\right)}{10^4 \cdot 10^{-4}} = \frac{1}{4}:$$

Այսպիսով, կարող ենք եզրակացնել, որ կանոնավոր մետաղադրամի 10000 նետումներից ոչ ավել, քան քառորդ դեպքում զինանշանի հայտվելու հաճախականությունը կտարբերվի 0,5-ից ոչ պակաս, քան 0,01-ով:

* Այս անհավասարությունը բխում է $f(x) = x(1-x), x \in [0,1]$ ֆունկցիայի դիտարկումից:

§8.2. Ծնորդ ֆունկցիա

Դիցուք ξ պատահական մեծությունն ընդունում է ամբողջ, ոչ բացասական արժեքներ

$$P(\xi = k) = p_k, \quad k = 0, 1, 2, \dots \quad (8.11)$$

հավանականություններով: Պարզ է, որ՝

$$\sum_{k=0}^{\infty} p_k = 1: \quad (8.12)$$

Սահմանում 8.3: ξ պատահական մեծության (26.1) բաշխման *ծնորդ ֆունկցիա* է կոչվում հետևյալ շարքը.

$$\Pi_{\xi}(x) = Mx^{\xi} = \sum_{k=0}^{\infty} x^k \cdot p_k, \quad (8.13)$$

որտեղ x -ը ($|x| \leq 1$) իրական կամ կոմպլեքս փոփոխական է:

Թեորեմ 8.4: Դիցուք $\Pi_{\xi}(x)$ -ը *ծնորդ ֆունկցիա է որոշված (8.13) բանաձևով, այդ դեպքում.*

1°. $\Pi_{\xi}(x)$ -ը *որոշված է $[-1, 1]$ հատվածի բոլոր կետերում:*

2°. $\Pi_{\xi}(1) = 1:$

3°. (8.12) բանաձևով փոխմիարժեք համապատասխանությունն է հաստատվում $\Pi_{\xi}(x)$ *ծնորդ ֆունկցիաների բազմության և $\{p_k\}$ բաշխումների բազմության միջև:*

Ապացույց. Առաջին պնդումը հետևում է այն փաստից, որ (8.12) գումարներ շարքը մաժորանտ է (8.13)-ի աջ մասի աստիճանային շարքի համար: $\Pi_{\xi}(1) = 1$ հավասարությունը համընկնում է (8.11)-ին: Թեորեմի երրորդ պնդումը բխում է ֆունկցիայի Թեյլորի շարքի վերլուծության միակությունից: \square

Օգտագործելով Թեյլորի շարքի գործակիցների բանաձևերը՝ կարելի է գտնել $\Pi_{\xi}(x)$ *ծնորդ ֆունկցիային համապատասխան բաշխման $\{p_k\}$ հավանականությունները՝*

$$p_k = \frac{1}{k!} \Pi_{\xi}^{(k)}(0), \quad k = 0, 1, 2, \dots: \quad (8.14)$$

Սահմանում 8.4: ξ պատահական մեծության k -րդ կարգի ֆակտորիալ մոմենտ է կոչվում

$$M\xi^{[k]} = M[\xi \cdot (\xi - 1) \cdot \dots \cdot (\xi - k + 1)] \quad (8.15)$$

մաթեմատիկական սպասումը:

Թեորեմ 8.5: Եթե ξ պատահական մեծության k -րդ կարգի ֆակտորիալ մոմենտը գոյություն ունի, ապա այն կարելի է հաշվել

$$M\xi^{[k]} = \frac{d^k}{dx^k} \Pi_\xi(x) \big|_{x=1}, \quad k = 1, 2, \dots \quad (8.16)$$

բանաձևով, մասնավորապես՝

$$M\xi = \Pi'_\xi(1) \quad \text{և} \quad D\xi = \Pi''_\xi(1) + \Pi'_\xi(1) - [\Pi'_\xi(1)]^2: \quad (8.17)$$

Ապացույց: Քանի որ աստիճանային շարքն իր զուգամիտության միջակայքում անվերջ դիֆերենցելի է, ապա ցանկացած $|x| < 1$ կետում որոշված են $\Pi_\xi(x)$ ֆունկցիայի k -րդ ($k \geq 1$) կարգի ածանցյալները.

$$\Pi_\xi^{(k)}(x) = \sum_{m=0}^{\infty} m \cdot (m-1) \cdot \dots \cdot (m-k+1) \cdot x^{m-k} \cdot P(\xi = m): \quad (8.18)$$

Համաձայն թեորեմի պայմանի, k -րդ կարգի ֆակտորիալ մոմենտը վերջավոր է, ուստի

$$\begin{aligned} M\xi^{[k]} &= M[\xi \cdot (\xi - 1) \cdot \dots \cdot (\xi - k + 1)] = \\ &= \sum_{m=0}^{\infty} m(m-1) \cdot \dots \cdot (m-k+1) \cdot P(\xi = m) < \infty: \end{aligned} \quad (8.19)$$

Պարզ է, որ (8.19)-ը (8.18) շարքի գումարն է $x = 1$ կետում, հետևաբար, համաձայն Արելի թեորեմի, $\Pi_\xi^{(k)}(x)$ -ը ամբողջատ է $x = 1$ կետում և

$$\begin{aligned} \lim_{x \rightarrow 1-0} \Pi_\xi^{(k)}(x) &= \Pi_\xi^{(k)}(1) = \\ &= \sum_{m=0}^{\infty} m(m-1) \cdot \dots \cdot (m-k+1) \cdot P(\xi = m) = M\xi^{[k]}: \quad \square \end{aligned}$$

Օրինակ 1. Դիցուք ξ պատահական մեծությունն ունի $B_{n,p}$ բինոմական բաշխում՝

$$P(\xi = m) = C_n^m \cdot p^m \cdot q^{n-m}, \quad m = 0, 1, \dots, n:$$

Համաձայն (8.13) բանաձևի՝

$$\Pi_\xi(x) = \sum_{k=0}^{\infty} C_n^k \cdot p^k \cdot q^{n-k} \cdot x^k = (px + q)^n: \quad (8.20)$$

Երկու անգամ ածանցելով (8.20)-ը, կստանանք՝

$$\begin{aligned}\Pi'_\xi(x) &= n \cdot p \cdot (px + q)^{n-1}, \\ \Pi''_\xi(x) &= n \cdot (n-1) \cdot p^2 \cdot (px + q)^{n-2} : \end{aligned}$$

Այժմ, օգտվելով (8.17) բանաձևերից, կստանանք՝

$$\begin{aligned}M\xi &= p'_\xi(1) = np(p+q)^{n-1} = np, \\ D\xi &= p''_\xi(1) + p'_\xi(1) - [p'_\xi(1)]^2 = \\ &= n \cdot (n-1) \cdot p^2 \cdot (p+q)^{n-2} + np - n^2 p^2 = np \cdot (1-p) : \end{aligned}$$

Ծնորդ ֆունկցիաների կիրառումը ամբողջ արժեքներ ընդունող անկախ պատահական մեծությունների գումարներն ուսումնասիրելիս հիմնված է հետևյալ թեորեմի վրա:

Թեորեմ 8.6: *Եթե $\xi_1, \xi_2, \dots, \xi_n$ պարահական մեծությունները անկախ են, ապա՝*

$$\Pi_{\xi_1+\xi_2+\dots+\xi_n}(x) = \Pi_{\xi_1}(x) \cdot \Pi_{\xi_2}(x) \cdot \dots \cdot \Pi_{\xi_n}(x) :$$

Ապացույց: Օգտվելով ծնորդ ֆունկցիայի ներկայացումից մաթեմատիկական սպասելիի տեսքով, կստանանք՝

$$\Pi_{\xi_1+\xi_2+\dots+\xi_n}(x) = Mx^{\xi_1+\xi_2+\dots+\xi_n} = M[x^{\xi_1} \cdot x^{\xi_2} \cdot \dots \cdot x^{\xi_n}] : \quad (8.21)$$

Պարզ է, որ $x^{\xi_1}, x^{\xi_2}, \dots, x^{\xi_n}$ պատահական մեծություններն անկախ են, որպես ֆունկցիաներ անկախ պատահական մեծություններից, ուստի՝

$$M[x^{\xi_1} \cdot \dots \cdot x^{\xi_n}] = Mx^{\xi_1} \cdot \dots \cdot Mx^{\xi_n} :$$

Այստեղից և (8.21)-ից հետևում է թեորեմի պնդումը, քանի որ $Mx^{\xi_k} = \Pi_{\xi_k}(x)$: □

Սահմանային թեորեմներն ապացուցելիս հաճախ օգտվում ենք ծնորդ ֆունկցիաների բազմության և բաշխումների բազմության անընդհատության համապատասխանության հատկությունից, որը հետևյալ թեորեմի բովանդակությունն է:

Թեորեմ 8.7: *Դիցուք կամայական ֆիքսած n -ի դեպքում $n = 1, 2, \dots$, $\{p_k(n)\}$ հաջորդականությունը հավանականությունների բաշխում է, այսինքն՝*

$$p_k(n) \geq 0, \quad \sum_{k=0}^{\infty} p_k(n) = 1 : \quad (8.22)$$

Որպեսզի կամայական ֆիքսված k -ի համար

$$\lim_{n \rightarrow \infty} p_k(n) = p_k \quad \text{և} \quad \sum_{k=0}^{\infty} p_k = 1, \quad (8.23)$$

անհրաժեշտ է և բավարար, որ ցանկացած x -ի համար $x \in [0; 1)$,

$$\lim_{n \rightarrow \infty} \Pi_n(x) = \Pi(x) \quad (8.24)$$

$$\text{որտեղ } \Pi_n(x) = \sum_{k=0}^{\infty} p_k(n) x^k, \quad \Pi(x) = \sum_{k=0}^{\infty} p_k x^k, \quad \Pi(1) = 1.$$

Ապացույց: Ենթադրենք՝ տեղի ունեն (8.23) առնչությունները: Ներկայացնենք $\Pi_n(x) - \Pi(x)$ տարբերությունը հետևյալ տեսքով՝

$$\Pi_n(x) - \Pi(x) = \sum_{k=0}^N (p_k(n) - p_k) x^k + \sum_{k=N+1}^{\infty} p_k(n) x^k - \sum_{k=N+1}^{\infty} p_k x^k,$$

որտեղ N -ը ամբողջ թիվ է: Դիցուք $x \in [0; 1)$ ֆիքսված է: Ցույց տանք, որ տեղի ունի (8.24)-ը: Քանի որ $0 \leq p_k(n) \leq 1$, $0 \leq p_k \leq 1$, ապա կամայական $\varepsilon > 0$ թվի համար կարելի է ընտրել N -ն այնպես, որ ցանկացած $n \geq N$ -ի դեպքում

$$\sum_{k=N+1}^{\infty} p_k(n) \cdot x^k \leq \sum_{k=N+1}^{\infty} x^k < \frac{\varepsilon}{3}, \quad \sum_{k=N+1}^{\infty} p_k x^k < \frac{\varepsilon}{3}:$$

Այսպիսով, տրված N -ի համար

$$|\Pi_n(x) - \Pi(x)| \leq \sum_{k=0}^N |p_k(n) - p_k| \cdot x^k + \frac{2}{3} \varepsilon:$$

Վերջին անհավասարության աջ մասի գումարը, բավականաչափ մեծ n -երի դեպքում, կարելի է դարձնել փոքր $\frac{\varepsilon}{3}$, քանի որ այն պարունակում է 0 -ի ձգտող վերջավոր թվով գումարելիներ: $\Pi(1) = 1$ հավասարությունը անմիջապես հետևում է (8.23)-ից:

Այժմ ենթադրենք՝ տեղի ունի (8.24)-ը: Ապացուցենք (8.23)-ը հակասող ենթադրությամբ: Դիցուք այն տեղի չունի: Այդ դեպքում կգտնվեն երկու՝ n'_m և n''_m հաջորդականություններ, որոնց համար

$$\lim_{n'_m \rightarrow \infty} p_k(n'_m) = \bar{p}_k, \quad \lim_{n''_m \rightarrow \infty} p_k(n''_m) = \bar{\bar{p}}_k, \quad (8.25)$$

ընդ որում, $\{\bar{p}_k\}$ և $\{\bar{\bar{p}}_k\}$ չեն համընկնում: Համաձայն թեորեմի արդեն ապացուցված մասի և (8.25) առնչությունների՝

$$\lim_{n'_m \rightarrow \infty} \Pi_{n'_m}(x) = \bar{\Pi}(x) = \sum_{k=0}^{\infty} \bar{p}_k x^k, \quad \lim_{n''_m \rightarrow \infty} \Pi_{n''_m}(x) = \bar{\bar{\Pi}}(x) = \sum_{k=0}^{\infty} \bar{\bar{p}}_k x^k$$

և $\bar{\Pi}(x) \neq \bar{\bar{\Pi}}(x)$: Վերջինս անհնար է, քանի որ գոյություն ունի (8.25) սահմանը: \square

Օրինակ 2. Դիցուք μ_n -ը Բեռնուլիի սխեմայում n անկախ փորձերի ժամանակ «հաջողությունների» հանդես գալու թիվն է, իսկ p_n -ը՝ «հաջողության» հավանականությունը մեկ փորձում: Ենթադրենք՝ գոյություն ունի $\lim_{n \rightarrow \infty} np_n = \lambda$, $0 < \lambda < \infty$ սահմանը, և հաշվենք $\lim_{n \rightarrow \infty} P(\mu_n = m)$ սահմանը՝ օգտվելով թեորեմ 8.4-ից:

Նշանակենք $\lambda_n = np_n$: Քանի որ μ_n պատահական մեծությունն ունի բինոմական բաշխում $p_n = \frac{\lambda_n}{n}$ պարամետրով, ապա համաձայն (8.20) բանաձևի՝

$$\Pi_{\mu_n}(x) = \left(\frac{\lambda_n}{n} x + 1 - \frac{\lambda_n}{n} \right)^n = \left[1 + \frac{\lambda_n}{n} (x - 1) \right]^n :$$

Հետևաբար՝

$$\lim_{n \rightarrow \infty} \Pi_{\mu_n}(x) = e^{\lambda(x-1)} = \sum_{m=0}^{\infty} \frac{\lambda^m}{m!} e^{-\lambda} x^m :$$

Այստեղից, համաձայն թեորեմ 8.4-ի՝

$$\lim_{n \rightarrow \infty} P(\mu_n = m) = \frac{\lambda^m}{m!} e^{-\lambda} :$$

Այսպիսով, ստացանք Պուասոնի թեորեմի մեկ այլ ապացույց:

§8.3. Բնութագրիչ ֆունկցիա

Նախորդ պարագրաֆում ներմուծած ծնորդ ֆունկցիայի գաղափարը սահմանվում էր միայն ամբողջ արժեքներ ընդունող պատահական մեծությունների համար: Կամայական տիպի պատահական մեծությունների բաշխումներն ուսումնասիրելիս օգտվում են բնութագրիչ ֆունկցիաներից: *

Սահմանում 8.5: $F(x) = P(\xi < x)$ բաշխման ֆունկցիայով ξ պատահական մեծության *բնութագրիչ ֆունկցիա* է կոչվում

$$\varphi_{\xi}(t) = M e^{it\xi} = \int_{-\infty}^{\infty} e^{itx} dF(x)$$

ֆունկցիան:

Մասնավորապես, եթե գոյություն ունի $f(x) = F'(x)$ բաշխման խտությունը, ապա՝

$$\varphi_{\xi}(t) = \int_{-\infty}^{\infty} e^{itx} f(x) dx:$$

$p_k = P\{\xi = x_k\}$ հավանականություններով $x_k, k = 1, 2, \dots$ արժեքներ ընդունող դիսկրետ պատահական մեծության համար

$$\varphi_{\xi}(t) = \sum_{k=1}^{\infty} e^{itx_k} \cdot p_k:$$

Թեորեմ 8.8: Դիցուք $\varphi(t)$ -ն ξ պատահական մեծության բնութագրիչ ֆունկցիան է: Տեղի ունեն հետևյալ հատկությունները.

1. $|\varphi(t)| \leq \varphi(0) = 1, \quad t \in R;$

* Բնութագրիչ ֆունկցիաները սահմանվում են ինչպես իրական, այնպես էլ կոմպլեքս արժեքներ ընդունող պատահական մեծությունների համար: Նշենք, որ $\eta + i\xi$ կոմպլեքս պատահական մեծության մաթեմատիկական սպասելիք որոշվում է $E(\eta + i\xi) = E\eta + iE\xi$ առնչությամբ: Այստեղ և ենթադրում ամենուրեք $i = \sqrt{-1}$ -ը կեղծ միավորն է, t -ն՝ իրական փոփոխական: Հիշենք, որ $z = x + iy$ կոմպլեքս թվի մոդուլ է կոչվում $|z| = \sqrt{x^2 + y^2}$ դրական թիվը: Համաձայն Էյլերի բանաձևի՝ $e^{it} = \cos t + i \sin t$, հետևաբար՝ $|e^{it}| = 1$:

2. $\varphi(t)$ -ն ըստ $t \in R$ -ի հավասարաչափ անընդհատ է;

3. Եթե $\eta = a \cdot \xi + b$, որտեղ a -ն և b -ն հասարակունեն են, ապա

$$\varphi_{\eta}(t) = e^{itb} \cdot \varphi_{\xi}(at) :$$

Ապացույց: 1. Քանի որ $\forall x \in R$ -ի համար $|e^{itx}| \leq 1$, հետևաբար՝

$$|\varphi(t)| = \left| \int_{-\infty}^{\infty} e^{itx} dF(x) \right| \leq \int_{-\infty}^{\infty} |e^{itx}| dF(x) \leq \int_{-\infty}^{\infty} dF(x) = \varphi(0) = 1 :$$

2. Այս հատկությունը հետևում է

$$|\varphi(t+h) - \varphi(t)| = |Me^{it\xi}(e^{ih\xi} - 1)| \leq M|e^{it\xi}(e^{ih\xi} - 1)| = M|e^{ih\xi} - 1|$$

գնահատականից, քանի որ $M|e^{ih\xi} - 1| \rightarrow 0$, երբ $h \rightarrow 0$:

3. Դիցուք $\eta = a \cdot \xi + b$: Այդ դեպքում՝

$$\varphi_{\eta}(t) = Me^{it(a\xi+b)} = e^{itb} \cdot Me^{ita\xi} = e^{itb} \cdot \varphi_{\xi}(at) : \quad \square$$

Այժմ գտնենք որոշ բաշխումների բնութագրիչ ֆունկցիաները:

Օրինակ 1: Դիցուք ξ պատահական մեծությունն ունի նորմալ բաշխում $(0,1)$ պարամետրերով: Քանի որ ստանդարտ նորմալ բաշխ-

ման համար $f(x) = \frac{1}{\sqrt{2\pi}} e^{-x^2/2}$, ապա՝

$$\varphi_{\xi}(t) = \frac{1}{\sqrt{2\pi}} \int_{-\infty}^{\infty} e^{itx - \frac{x^2}{2}} dx : \quad (8.26)$$

Ածանցելով (8.26) հավասարության երկու կողմը ըստ t -ի (վերջինս դժվար չէ համոզվել, որ գոյություն ունի), կստանանք՝

$$\varphi'_{\xi}(t) = \frac{i}{\sqrt{2\pi}} \int_{-\infty}^{\infty} e^{itx - \frac{x^2}{2}} x dx : \quad (8.27)$$

(8.27) ինտեգրալում կատարելով մասերով ինտեգրում, կունենանք՝

$$\begin{aligned} \varphi'_{\xi}(t) &= \frac{i}{\sqrt{2\pi}} \int_{-\infty}^{\infty} e^{itx} de^{\frac{-x^2}{2}} = -\frac{i}{\sqrt{2\pi}} \left[e^{itx} \cdot e^{\frac{-x^2}{2}} \Big|_{-\infty}^{\infty} - it \int_{-\infty}^{\infty} e^{itx} e^{-x^2/2} dx \right] = \\ &= -\frac{t}{\sqrt{2\pi}} \int_{-\infty}^{\infty} e^{itx - \frac{x^2}{2}} dx = -t \cdot \varphi(t) : \end{aligned}$$

Այսպիսով, $\varphi_{\xi}(t)$ ֆունկցիան բավարարում է

$$\frac{d\varphi_{\xi}(t)}{dt} = -t \cdot \varphi(t) \quad (8.28)$$

դիֆերենցիալ հավասարմանը և $\varphi_{\xi}(0) = 1$ սկզբնական պայմանին: (8.28) հավասարումից կստանանք, որ $\varphi_{\xi}(t) = e^{-t^2/2} \cdot c$: Հաշվի առնելով $\varphi_{\xi}(0) = 1$ պայմանը՝ կունենանք $c = 0$: Այսպիսով՝

$$\varphi_{\xi}(t) = e^{-t^2/2}:$$

Եթե η պատահական մեծությունն ունի $N(a, \sigma^2)$ նորմալ բաշխում, ապա տեղադրելով $\xi = \frac{\eta - a}{\sigma}$, կունենանք, որ ξ պատահական մեծությունն ունի $N(0, 1)$ նորմալ բաշխում, հետևաբար՝ $\varphi_{\xi}(t) = e^{-t^2/2}$: Թեորեմ 8.8-ի 3-րդ պնդման համաձայն՝

$$\varphi_{\eta}(t) = \varphi_{\sigma \cdot \xi + a}(t) = e^{ita} \varphi_{\xi}(\sigma \cdot t) = e^{\frac{ita - \sigma^2 t^2}{2}}:$$

Օրինակ 2: Դիցուք ξ -ն Պուասոնյան պատահական մեծություն է՝

$$P(\xi = k) = \frac{e^{-\lambda} \cdot \lambda^k}{k!}, \quad k = 0, 1, 2, \dots:$$

Այդ դեպքում

$$\varphi_{\xi}(t) = M e^{it\xi} = \sum_{k=0}^{\infty} e^{itk} \cdot \frac{e^{-\lambda} \cdot \lambda^k}{k!} = e^{-\lambda} \sum_{k=0}^{\infty} \frac{(\lambda \cdot e^{it})^k}{k!} = e^{-\lambda} e^{\lambda \cdot e^{it}} = e^{\lambda(e^{it} - 1)}:$$

Դիտողություն 1: Դժվար չէ նկատել, որ բացարձակ անընդհատ պատահական մեծության $\varphi_{\xi}(t)$ բնութագրիչ ֆունկցիան ներկայացնում է $f_{\xi}(x)$ խտության ֆուրյեի ձևափոխությունը, որտեղից $f_{\xi}(x)$ խտությունը կարտահայտվի $\varphi_{\xi}(t)$ -ի միջոցով ֆուրյեի հակադարձ ձևափոխությամբ:

$$f_{\xi}(x) = \frac{1}{2\pi} \int_{-\infty}^{\infty} \varphi_{\xi}(t) e^{-itx} dt$$

(այս բանաձևը կոչվում է շրջման բանաձև):

Իմանալով պատահական մեծության բնութագրիչ ֆունկցիան՝ հեշտությամբ կարելի է գտնել պատահական մեծության մոմենտները:

Թեորեմ 8.9 : Եթե գոյություն ունի ξ պատահական մեծության n -րդ կարգի բացարձակ մոմենտը՝ $M|\xi|^n < \infty$, ապա $\varphi_\xi(t)$ բնութագրիչ ֆունկցիան n անգամ դիֆերենցելի է, և $k \leq n$ դեպքում տեղի ունի հետևյալ առնչությունը՝

$$\varphi_\xi^{(k)}(0) = i^k \cdot M\xi^k :$$

Ապացույց: Պարզության համար թեորեմի ապացույցը կատարենք բացարձակ անընդհատ պատահական մեծության համար: Նկատենք, որ n -րդ կարգի մոմենտի գոյությունից բխում է $k \leq n$ կարգի բոլոր մոմենտների գոյությունը: Այժմ նկատենք, որ բնութագրիչ ֆունկցիայի k -պատիկ ֆորմալ դիֆերենցումը բերում է

$$\varphi_\xi^{(k)}(t) = i^k \int_{-\infty}^{\infty} x^k e^{itx} f_\xi(x) dx \quad (8.29)$$

հավասարությանը: Քանի որ

$$|\varphi_\xi^{(k)}(t)| = \left| \int_{-\infty}^{\infty} x e^{itx} f_\xi(x) dx \right| \leq \int_{-\infty}^{\infty} |x|^k f_\xi(x) dx = M|\xi|^k < \infty, ,$$

ապա (8.29) հավասարության ձախ կողմում գրված ինտեգրալը, ըստ t -ի, հավասարաչափ զուգամիտում է: Հետևաբար, ճշմարտացի է բնութագրիչ ֆունկցիայի k -պատիկ դիֆերենցման հնարավորությունը: Ընդունելով (8.29)-ում $t = 0$, ստանում ենք՝

$$\varphi_\xi^{(k)}(0) = i^k \int_{-\infty}^{\infty} x^k f_\xi(x) dx = i^k \cdot M\xi^k : \quad \square$$

Պատահական մեծության $k \in \mathbb{N}$ կարգի բացարձակ մոմենտների գոյությունը թույլ է տալիս $\varphi_\xi(t)$ բնութագրիչ ֆունկցիան վերլուծել Թեյլորի շարքի $t = 0$ կետի շրջակայքում: Մասնավորապես, համաձայն թեորեմ 8.9-ի, տեղի ունի հետևյալ վերլուծությունը՝

$$\begin{aligned} \varphi_\xi(t) &= \varphi_\xi(0) + \sum_{j=1}^k \frac{t^j}{j!} \varphi_\xi^{(j)}(0) + o(|t|^k) = 1 + \sum_{j=1}^k \frac{i^j t^j}{j!} M\xi^j + o(|t|^k) = \\ &= 1 + it M\xi - \frac{t^2}{2} M\xi^2 + \dots + \frac{i^k t^k}{k!} M\xi^k + o(|t|^k) : \end{aligned}$$

Օրինակ 3: Դիցուք ξ -ն ունի $N(a, \sigma^2)$ նորմալ բաշխում: Այդ դեպքում $\eta = \xi - a$ պատահական մեծության բնութագրիչ ֆունկցիան

կունենա հետևյալ տեսքը՝

$$\varphi_{\eta}(t) = e^{-ita} \varphi_{\xi}(t) = e^{ita} \cdot e^{\frac{ita - \sigma^2 t^2}{2}} = e^{\frac{-\sigma^2 t^2}{2}} :$$

Օգտվելով e^x ֆունկցիայի Մակլորենի վերլուծությունից, կստանանք՝

$$\varphi_{\eta}(t) = \sum_{k=0}^{\infty} (-1)^k \cdot \left(\frac{\sigma^{2k}}{2^k k!} \right) \cdot t^{2k} = \sum_{k=0}^{\infty} (-1)^k \cdot \left(\frac{\sigma^{2k} (2k)!}{2^k k!} \right) \cdot \frac{t^{2k}}{(2k)!} :$$

Վերջին հավասարությունից հետևում է, որ

$$\varphi_{\eta}^{(2k+1)}(0) = 0 ,$$

իսկ

$$\begin{aligned} \varphi_{\eta}^{(2k)}(0) &= (-1)^k \frac{(2k)!}{2^k k!} \cdot \sigma^{2k} = (-1)^k (2k-1)(2k-3) \cdot \dots \cdot 3 \cdot 1 \cdot \sigma^{2k} = \\ &= (-1)^k (2k-1)!! \cdot \sigma^{2k} , \end{aligned}$$

որտեղից, համաձայն թեորեմ 8.9-ի, կստանանք կենտրոնական մոմենտները.

$$M(\xi - a)^{2k+1} = 0, \quad M(\xi - a)^{2k} = (2k-1)!! \cdot \sigma^{2k} :$$

Թեորեմ 8.10: Եթե $\xi_1, \xi_2, \dots, \xi_n$ պատահական մեծություններն անկախ են, ապա

$$\varphi_{\sum_{k=1}^n \xi_k}(t) = \prod_{k=1}^n \varphi_{\xi_k}(t) :$$

Ապացույց: Համաձայն բնութագրիչ ֆունկցիայի սահմանման՝

$$\varphi_{\sum_{k=1}^n \xi_k}(t) = M e^{it \cdot \sum_{k=1}^n \xi_k} = M \left(\prod_{k=1}^n e^{it \cdot \xi_k} \right) = \prod_{k=1}^n M e^{it \cdot \xi_k} = \prod_{k=1}^n \varphi_{\xi_k}(t) : \quad \square$$

§8.3. Թույլ զուգամիտություն. անընդհատության թեորեմ

Գոյություն ունեն պատահական մեծությունների հաջորդականության զուգամիտության տարբեր տեսակներ: §8.1-ում սահմանեցինք պատահական մեծությունների հաջորդականության զուգամիտությունն ըստ հավանականության: Այժմ սահմանենք թույլ զուգամիտության գաղափարը:

Դիցուք միևնույն (Ω, \mathcal{F}, P) հավանականային տարածության վրա տրված են ξ_1, ξ_2, \dots պատահական մեծությունների հաջորդականությունը և կամայական ξ պատահական մեծություն՝ $F_\xi(x)$ բաշխման ֆունկցիայով:

Մահմանում 8.6: Կասենք, որ պատահական մեծությունների $\{\xi_n\}_{n=1}^\infty$ հաջորդականությունը *թույլ զուգամիտում է* ξ պատահական մեծությանը, երբ $n \rightarrow \infty$, և կգրենք $\xi_n \Rightarrow \xi$, եթե $F_\xi(x)$ ֆունկցիայի անընդհատության բոլոր կետերում

$$\lim_{n \rightarrow \infty} F_{\xi_n}(x) = F_\xi(x):$$

Դիտողություն 1: Նկատենք, որ $\xi_n \Rightarrow \xi$ զուգամիտությունը բաշխումների և ոչ թե պատահական մեծությունների զուգամիտություն է: Եթե, օրինակ, ξ սահմանային պատահական մեծությունը փոխարինենք մեկ այլ η պատահական մեծությամբ, որն ունի նույն բաշխումը ինչ ξ -ին, ապա դրանից ոչինչ չի փոխվի, այսինքն՝ $\xi_n \Rightarrow \eta$:

Վարժություն: Ապացուցել, որ եթե $\xi_n \Rightarrow \xi$ և $c = \text{const}$, ապա $c\xi_n \Rightarrow c\xi$ և $\xi_n + c \Rightarrow \xi + c$:

Դիտողություն 2: Ընդհանրապես, թույլ զուգամիտության համար «գումարի սահմանը հավասասար է սահմանների գումարին» հատկությունն իմաստ չունի. $\xi_n \Rightarrow \xi$ և $\eta_n \Rightarrow \eta$ զուգամիտությունները նշանակում են, որ մեզ հայտնի են այդ հաջորդականությունների սահմանային բաշխումները: Սակայն դրանց գումարի սահմանային բաշխումը, կախված ξ_n -ի և η_n -ի համատեղ բաշխումից, կարող է տարբերվել: Այլ է, երբ սահմանային բաշխումներից մեկը վերասերված է (հաստատուն է): Այդ դեպքում գումարի սահմանային բաշխման ֆունկցիան որոշված է միարժեք:

Թեորեմ 8.11: Եթե $\xi_n \xrightarrow{P} c = \text{const}$ և $\eta_n \Rightarrow \eta$, ապա՝

$$\xi_n + \eta_n \Rightarrow c + \eta:$$

Ապացույց: Քանի որ $\eta_n \Rightarrow \eta$ զուգամիտությունից հետևում է $\eta_n + c \Rightarrow \eta + c$ զուգամիտությունը, ապա բավական է թեորեմի պնդումն ապացուցել $c = 0$ դեպքի համար: Դիցուք $\xi_n \xrightarrow{P} 0$ և $\eta_n \Rightarrow \eta$: Ապացուցենք, որ $\xi_n + \eta_n \Rightarrow \eta$:

Ենթադրենք՝ x_0 -ն $F_\eta(x)$ բաշխման ֆունկցիայի անընդհատության կետ է: Պետք է ցույց տանք, որ

$$\lim_{n \rightarrow \infty} F_{\xi_n + \eta_n}(x_0) = F_\eta(x_0):$$

Ընտրենք $\varepsilon > 0$ թիվն այնպես, որ $x_0 \pm \varepsilon$ կետերում $F_\eta(x)$ ֆունկցիան լինի անընդհատ:

Քանի որ $H_1 = \{|\xi_n| \geq \varepsilon\}$ և $H_2 = \{|\xi_n| < \varepsilon\}$ պատահույթները կազմում են լրիվ խումբ, ապա՝

$$F_{\xi_n + \eta_n}(x_0) = P\{(\xi_n + \eta_n < x_0) \cap H_1\} + P\{(\xi_n + \eta_n < x_0) \cap H_2\} = P_1 + P_2:$$

Գնահատենք $P_1 + P_2$ գումարը: P_1 -ի համար ունենք՝

$$0 \leq P_1 = P\{(\xi_n + \eta_n < x_0) \cap H_1\} \leq P(H_1) = P\{|\xi_n| \geq \varepsilon\}:$$

P_2 հավանականության համար մի կողմից՝ ունենք

$$P_2 = P\{(\xi_n + \eta_n < x_0) \cap (-\varepsilon < \xi_n < \varepsilon)\} \leq P\{-\varepsilon + \eta_n < x_0\} = F_{\eta_n}(x_0 + \varepsilon)$$

անհավասարությունը, իսկ մյուս կողմից՝

$$\begin{aligned} P_2 &= P\{(\xi_n + \eta_n < x_0) \cap (-\varepsilon < \xi_n < \varepsilon)\} \geq P\{(\varepsilon + \eta_n < x_0) \cap (-\varepsilon < \xi_n < \varepsilon)\} \geq \\ &\geq P\{(\varepsilon + \eta_n < x_0)\} - P\{|\xi_n| \geq \varepsilon\} = F_{\eta_n}(x_0 - \varepsilon) - P\{|\xi_n| \geq \varepsilon\}: \end{aligned}$$

Այստեղ վերջին անհավասարությունը հետևում է հավանականության հետևյալ հատկություններից. քանի որ $P(A\bar{B}) \leq P(\bar{B})$, ապա $P(AB) = P(A) - P(A\bar{B}) \leq P(A) - P(\bar{B})$:

Այսպիսով, $F_{\xi_n + \eta_n}(x_0) = P_1 + P_2$ գումարի համար ստացանք հետևյալ ստորին և վերին գնահատականները՝

$$F_{\eta_n}(x_0 - \varepsilon) - P\{|\xi_n| \geq \varepsilon\} \leq F_{\xi_n + \eta_n}(x_0) \leq F_{\eta_n}(x_0 + \varepsilon) + P\{|\xi_n| \geq \varepsilon\}:$$

Անցնելով այս առնչությունում սահմանի, երբ $n \rightarrow \infty$, և հիշելով, որ $x_0 \pm \varepsilon$ կետերում $F_\eta(x)$ ֆունկցիան անընդհատ է, կստանանք՝

$$F_\eta(x_0 - \varepsilon) \leq \lim_{n \rightarrow \infty} F_{\xi_n + \eta_n}(x_0) \leq \overline{\lim_{n \rightarrow \infty}} F_{\xi_n + \eta_n}(x_0) \leq F_\eta(x_0 + \varepsilon): \quad (8.30)$$

Քանի որ ցանկացած բաշխման ֆունկցիա ունի ոչ ավել, քան հաշվելի թվով խզման կետեր, ապա կարելի է ընտրել 0 -ին զուգամիտող այնպիսի ε նվազող հաջորդականություն, որ $x_0 \pm \varepsilon$ կետերում $F_\eta(x)$ ֆունկցիան լինի անընդհատ և, հետևաբար, պահպանվեն (8.30) անհավասարությունները: Անցնելով սահմանի՝ ըստ $\varepsilon \rightarrow 0$ հա-

ջորդականության, և հիշելով, որ x_0 -ն $F_\eta(x)$ բաշխման ֆունկցիայի անընդհատության կետ է, ստանում ենք, որ $F_{\xi_n+\eta_n}(x_0)$ ֆունկցիայի ստորին և վերին սահմաններն համընկնում են և հավասար են $F_\eta(x_0)$ -ին: \square

Հաջորդ թեորեմի համաձայն, ըստ հավանականության զուգամիտությունից հետևում է թույլ զուգամիտությունը: Հակառակ պնդումն ընդհանուր դեպքում իմաստ չունի (տե՛ս դիտողություն 1):

Թեորեմ 8.12: *Եթե $\xi_n \xrightarrow{P} \xi$, ապա $\xi_n \Rightarrow \xi$:*

Ապացույց: Ներկայացնենք ξ_n -ը հետևյալ գումարի տեսքով՝ $\xi_n = (\xi_n - \xi) + \xi$: Այստեղ $(\xi_n - \xi)$ հաջորդականությունը, ըստ հավանականության, զուգամիտում է 0-ի, ξ «հաջորդականությունը» թույլ զուգամիտում է ξ -ին, հետևաբար, համաձայն թեորեմ 8.11-ի՝ $\xi_n = (\xi_n - \xi) + \xi$ գումարը թույլ զուգամիտում է ξ -ին: \square

Այժմ կարող ենք ձևակերպել բնութագրիչ ֆունկցիաների հիմնական հատկությունը, որը կօգտագործենք սահմանային թեորեմներն ապացուցելիս:

Թեորեմ 8.13 (անընդհատության թեորեմ): *Պատահական մեծությունների $\{\xi_n\}_{n=1}^\infty$ հաջորդականությունը թույլ զուգամիտում է ξ պատահական մեծությանը այն և միայն այն դեպքում, երբ ցանկացած $t \in \mathbb{R}$ -ի դեպքում բնութագրիչ ֆունկցիաների $\{\varphi_{\xi_n}(t)\}_{n=1}^\infty$ հաջորդականությունը զուգամիտում է $\varphi_\xi(t)$ բնութագրիչ ֆունկցիային:*

Ձևակերպված թեորեմը հաստատում է անընդհատ համապատասխանություն $\langle F_\xi, \Rightarrow \rangle$ և $\langle \varphi_\xi, \rightarrow \rangle$ դասերի միջև, այլ կերպ ասած. բաշխման ֆունկցիաների թույլ զուգամիտությանը համապատասխանում է բնութագրիչ ֆունկցիաների զուգամիտությունը բոլոր կետերում: Համապատասխանության անընդհատությունն այն է, որ մի դասում տրված զուգամիտության նկատմամբ սահմանին համապատասխանում է սահման մյուս դասում տրված զուգամիտության նկատմամբ:

§8.4. Կենտրոնական սահմանային թեորեմ

Դիցուք $S_n = \xi_1 + \xi_2 + \dots + \xi_n$ -ը վերջավոր դիսպերսիաներով անկախ և միատեսակ բաշխված պատահական մեծությունների գումար է:

Համաձայն մեծ թվերի օրենքի՝ $\frac{S_n}{n} \xrightarrow{P} M\xi_1$, կամ՝

$$\frac{S_n - nM\xi_1}{n} \xrightarrow{P} 0:$$

Քանի որ $(S_n - nM\xi_1)$ մեծության սահմանը n -ի բաժանելիս, ըստ հավանականության, զուգամիտում է 0 -ի, ապա բնական հարց է առաջանում. արդյո՞ք հնարավոր է $(S_n - nM\xi_1)$ մեծությունը բաժանել n -ից դանդաղ անվերջության ձգտող այնպիսի մեծության, որ արդյունքում ստացվի ոչ զրոյական սահման: Պարզվում է, որ արդեն իսկ

$$\frac{S_n - nM\xi_1}{\sqrt{n}}$$

հաջորդականությունը չի զուգամիտում 0 -ին: Այս հաջորդականության անդամների բաշխումները, n -ի մեծացմանը զուգընթաց, նմանվում են նորմալ բաշխմանը: Կարելի է ապացուցել, որ այն զուգամիտում է նորմալ բաշխում ունեցող պատահական մեծության, սակայն զուգամիտությունն այստեղ տեղի ունի ոչ թե ըստ հավանականության, այլ թույլ զուգամիտության իմաստով:

Թեորեմ 8.12 (կենտրոնական սահմանային թեորեմ): *Դիցուք ξ_1, ξ_2, \dots պատահական մեծություններն անկախ են, միատեսակ բաշխված և ունեն վերջավոր, ոչ զրոյական դիսպերսիաներ՝ $0 < D\xi_1 < \infty$: Այդ դեպքում տեղի ունի*

$$\frac{S_n - nM\xi_1}{\sqrt{nD\xi_1}} \Rightarrow N(0,1) \quad (8.31)$$

թույլ զուգամիտությունը:

Եթե կատարենք $M\xi_1 = a$ և $D\xi_1 = \sigma^2$ նշանակումները, ապա (8.31) զուգամիտությունը կարող ենք գրել

$$\lim_{n \rightarrow \infty} P \left(\frac{\xi_1 + \xi_2 + \dots + \xi_n - na}{\sigma\sqrt{n}} < x \right) = \frac{1}{\sqrt{2\pi}} \int_{-\infty}^x e^{-\frac{u^2}{2}} du$$

տեսքով, որտեղ $x \in \mathbb{R}$:

Ապացույց: Նշանակենք

$$\eta_n = \frac{\xi_1 + \xi_2 + \dots + \xi_n - na}{\sigma\sqrt{n}} = \frac{1}{\sigma\sqrt{n}} \sum_{k=1}^n (\xi_k - a),$$

և ցույց տանք, որ $\{\eta_n\}$ հաջորդականությունը թույլ զուգամիտում է $N(0,1)$ ստանդարտ նորմալ բաշխմանը: Համաձայն բնութագրիչ ֆունկցիայի հատկությունների, η_n պատահական մեծության բնութագրիչ ֆունկցիան հավասար է՝

$$\varphi_{\eta_n}(t) = \varphi_{\frac{1}{\sigma\sqrt{n}}\Sigma(\xi_k - a)}(t) = \varphi_{\Sigma(\xi_k - a)}\left(\frac{t}{\sigma\sqrt{n}}\right) = \left(\varphi_{\xi_k - a}\left(\frac{t}{\sigma\sqrt{n}}\right)\right)^n:$$

Այժմ, վերլուծելով $(\xi_k - a)$ պատահական մեծության բնութագրիչ ֆունկցիան ըստ Թեյլորի շարքի, կունենանք՝

$$\varphi_{\xi_k - a}(t) = 1 + itM(\xi_k - a) - \frac{t^2}{2}M(\xi_k - a)^2 + o(t^2):$$

Քանի որ $M(\xi_k - a) = 0$, իսկ $M(\xi_k - a)^2 = \sigma^2$, ապա՝

$$\varphi_{\xi_k - a}(t) = 1 - \frac{t^2\sigma^2}{2} + o(t^2), \quad (8.32)$$

որտեղից՝

$$\varphi_{\eta_n}(t) = \left(\varphi_{\xi_k - a}\left(\frac{t}{\sigma\sqrt{n}}\right)\right)^n = \left(1 - \frac{t^2}{2} \cdot \frac{1}{n} + o\left(\frac{t^2}{n}\right)\right)^n \rightarrow e^{-t^2/2}, \quad \text{երբ } n \rightarrow \infty:$$

Այսպիսով, սահմանային բնութագրիչ ֆունկցիան հանդիսանում է $(0,1)$ պարամետրերով նորմալ բաշխման բնութագրիչ ֆունկցիան: Համաձայն §8.3.-ի անընդհատության թեորեմի, $F_{\eta_n}(x)$ բաշխման ֆունկցիան թույլ զուգամիտում է ստանդարտ նորմալ բաշխման ֆունկցիային՝ $\Phi(x)$: Այսինքն՝ տեղի ունի

$$\eta_n = \frac{S_n - nM\xi_1}{\sqrt{nD\xi_1}} \Rightarrow N(0,1)$$

զուգամիտությունը:

□

ՕԳՏԱԳՈՐԾՎԱԾ ԳՐԱԿԱՆՈՒԹՅՈՒՆ

1. Համբարձումյան Գ.Հ. *Նախնականությունների տեսություն, III հրատ.*- Երևան, Լույս, 1977:
2. Հարությունյան Ե.Ա. և ուրիշներ. *Նախնականություն և կիրառական վիճակագրություն.*- Երևան, Գիտություն, 2000:
3. Вентцель Е.С. *Теория вероятностей.*- Москва, Высшая школа, 1999.
4. Гнеденко Б.В. *Курс теории вероятностей.*-М.: 1961г
5. Феллер В. *Введение в теорию вероятностей и ее приложения. Том. 1,2.*- Москва, Мир, 1984.
6. Чистяков В.П. *Курс теории веоятностей.*- М. Наука, 1982.
7. Ширяев А.Н. *Вероятность.*-Москва, Наука, 1989.